

Ruku

Vu'a Anejijihina

¹ Ea ni'ina Tiapirasi ese. Ea mapoka'e une-unecha mapoka ka'ene núni vajakino nimaa renajaho heha 'ahi nivejara.

² Nú raka ka'ene pu 'waravaji pu heha 'ahi vejare 'ee raka ka'ene nitama aneji ea 'ahopo puni nii ki'eme rejaji 'waravara'omo pu heha 'ahi vejare 'ee raka ka'ene vu'a 'waravii'inijipo 'waravaji pu heha 'ahi vena apena roara.

³ Na vwhajujaho mamaijaho na heha 'ahi une-unecha iraka ka'ene kahi aneji rene vena apene rooji ve'ipisana ronare'e veju. Ijihuni maijaho ijí iraka nimaa ka'ene rejajija na hamि hamि kime hejuta.

⁴ Na ike vu'akaho ona'e vejujihuni maijaho pu raka maa ka'ene a najahaji he parahuni jihuna'e veju.

Joni Papitisita Nahehuna Nahama 'Waravajina

⁵ Vea ka'ene Herotira Jutia opuni kinia renani vejijino pirisitia pina Jakaraiasi 'wawujaho hu Apaijara pirisitia ka'ene renaja'ina'e renana. 'Enakaivo huni naparijaho Eroni oni amuja. Huni ihijaho Irisapetina.

⁶ Pu Godoni una'i nih'o arira 'urahe ojure 'ee Natohwi jihuni tamanijara 'waramu ja'ina'e ojura.

⁷ Pu no'o amuja pa'ana. Ijihuni maijaho Irisapetiho amuja paveji'ina'e renana 'ee pu no'o ni ema paranaha'e rejara.

⁸ Na'ii pini Jakaraiasi huni ehi pu'úmo kaukara vehuni vei rejume pirisitiepo Godoni una'i vejuja'ina'e venana.

⁹ Pirisitia puni tamana'omo pu pipia vene hu iji pijaha jihuna'e hu Temiporu vaji va'e Natohwi jihuni inisenisia jaana.

¹⁰ Vea ka'ene inisenisi jaari veijaho ea mapoka ka'ene samai hijajija hine siporua 'ojara.

¹¹ 'E'eme Natohwi jihuni 'ona oji'ina huni roe inisenisia jauri 'aijua rori mana'inija'i naminana.

¹² Vea ka'ene Jakaraiasi hua kamajaho niho'o tea juma paranana.

¹³ 'Enakaivo 'ona oji'ina kajara ijá 'wama Jakaraiasi tea junamujaho arema. Godiho oni siporua henana'omo oni napara Irisapetiho oni hariha nahehuna. 'Enajihuna'e a huni iha Joni 'i'amana 'wamana.

¹⁴ Vea ka'ene hu nahe'amajaho a niho'o teamaname mari'uhuna 'ee ea mapoka teamahuna.

¹⁵ Hu niho'o Godoni rori ea ni'ima'ura mavarasa'ina'e 'urihuna. Hu niho'o 'wainia 'ee toa kikisina pahuna. Hu nahe'avari anejijino rene Godoni 'Aveni samahe tinia apena parahuna.

¹⁶ Hura kú'o Isureri oni harihija aherama ta'arohe Godi ka'ene puni Natohwi jihuni rohuna.

¹⁷ 'Enajihuna'e hora Iraiha oni oja 'ee harura ijí same Huni una'i vahuna. 'Ene emahwa puni

ojijija ta'arohe harihwaha 'ee ea ka'ene vuataa paheji'inijija veje ea arira maa rehuna. 'Ee ea aherame veje Natohwí jihuni 'unama amairi-arahuna 'wamana.

¹⁸ 'Ejume Jakaraiasira 'ona oji'ina kajaho ijá 'wama Na ikaho ichá'ina'e hena ka'ejo? Na ni emamaa 'ee nuni napara 'u'o ni paranamaa renu 'wamana.

¹⁹ 'Ejume 'ona oji'inijara eha vena ijá 'wama Na Kepireruna. Na Godoni rori namijura'omo Hura ranamiume na aa'e vu'a maiu'ina mamaake 'wara'i routa.

²⁰ 'Enakúne hena! Vea ka'ene nuni vu'ijara nimaa rena roe 'e'u'amajaho nimaa re'ena kaivo a nuni vu'a panimaa ronujihuna'e a iviamaa ira pa'wara'ika'i hi'eje vea ka'ene hariha nahe'amajino ira 'warahuna.

²¹ 'E'eme ea mapoka Jakaraiasi Temiporu vaji 'ajaha hijajaho 'aha jopatu'uma'ura re'eju'e hu iraka vene marako parou ronareja vwilijahara.

²² 'Enakaivo vea ka'ene hu ro'e'unajaho hu ira areri pa'waramana. 'Ejume pu marako ka'ika'i ijá 'wava Hu visoni Temiporu vaji kamare'e ijihuna'e avanu 'wavara. Ḧu ira pu pa'wara'ika'i ijaru 'waravi'i hinana.

²³ Huni kaukara parajumakame kú'o 'unama huni sei va'ana.

²⁴ Ijihuni túna'ijino na'ii pini huni napara Iris-apetihó hari'i nena searu hi'eme masapa iropu pa'arejara.

²⁵ 'Ejume hu ijá rona Iviamai Natohwijara na túchamai ika'ina vwihaniana. Na hariha panahuju jihuna'e eriri nuni vahi'a apena va'ana ronana.

Jesu Nahehuna Nahama 'Waravajina

26 'Enakaivo ivi'a masapa iropu kwinu pa'are'eme 'ona oji'ina Kepireriho Godira ranavume Karari vaji ara natohwa ka'ene Nasaretina 'wavuji roana.

27 Hu Josapi ka'ene Teviti oni amujijara 'asúra ka'ene 'wahuni jihuni vu'a apena roana. 'Asúra kajihuni ihijaho Merina.

28 'Ejume 'ona oji'inijara huni roe ijá 'wama Esi. A maiji ani'ina'e vwihanaajina. 'Ene Natohwi-jaho a hu'úmuna 'wamana.

29 Hu vu'a ka'ene 'waramaji henajaho niho'o puruva rene teajuvume huni vwiha vaji ijá rona Iraki reni'amarono 'ajorime 'warimu ronana.

30 'Ejumakame 'ona oji'inijara ijá 'wama Meri tea junamujaho arema! Godiho a maiji ani'ina'e vwihanaana.

31 'Enakúne hena! A hari'i nenareje hariha nahene huni ihijaho 'ime Jesuna 'wa'amana.

32 Hu niho'o Natohwa rene 'ee Hu maho'o Ichuto Maijhuni Hariha 'wahuna. 'Ene Godi ka'ene Natohwijara Teviti oni ruhijaho Hu mahuna.

33 'Eje Hu Jekapi oni amuhi puni Natohwa'e majama rehuna 'ee Hura kwaa ara ka'ene 'ajo'amajaho niho'o majama nahuna 'wamana.

34 'Ejume Merira 'ona oji'iniji ijá 'wama Ijaho ichá'ina'e re'ena? Ijihuni maijaho na 'asúra 'wamana.

35 'Ejume 'ona oji'inijara eha vene ijá 'wama Godoni 'Aveni samahuna. 'Ee harura ka'ene maho'o Ichuto Maijhunijara raorahuna. Ijihuni hahi Hariha ka'ene arira maiji nahe'amajaho

Godoni Hariha 'wahuna.

³⁶ 'Enakúne hena! Oni vwina ka'ene Irisapetiho amuja pa'ana 'wavura vo hu iviamaa ni-paranaha reji'i hari'i nena hi'eju'e masapa iropu kwinu pa'arenu.

³⁷ Ijihuni majaho unenu'u pini Godi oni una'i kisina pa'ana 'wamana.

³⁸ 'Ejume Merira ijá 'wama Na niheju. Na Natohwi jihuni pweakúne ara iraka ka'ene 'warimu ja'ina'e veje reniama 'wamana. 'E'eme ona'oji'inijaho iji'a ranama va'ana.

Merira Irisapeti Ka'i Va'ajina

³⁹ Ijí vea kajino Meriho marako 'urine ara natohwa Juta vaji kwaa ka'ene huri'a rukiniji va'ana.

⁴⁰ Hu Jakaraiasi oni sei va'e arume Irisapeti 'ajomana.

⁴¹ Vea ka'ene Merira 'ajomaji Irisapeti he'eme hariha huni tea vaja kají pipiju'eme Godoni 'Aveni Irisapeti oni vaja ruha apenana.

⁴² 'Ejume hu ira ajira'e ijá 'wama A napapuni vajijino niho'o merajaha paranana. 'Ee Hariha ka'ene oni hahi vaji hinujaho nimerajahana.

⁴³ 'Ú irakijihuna'e nuni Natohwi jihuni ohakaho na uvani'i roane?

⁴⁴ Ike hena! A 'ajorivume na he'eme harihaka nuni tea vaji hinujaho teamavume pipiju'mana.

⁴⁵ Natohwijara raka ka'ene hua'e rone 'waramajara roe nimai rehuniji hu nima'a ronajihuna'e merajahana 'wamana.

Merira Godi Ta'arohe Javaa Venajina

⁴⁶ 'Ejume Meri ijá 'wama Nuni oja Natohwiji ta'arohu.

⁴⁷ Nuni 'avenijaho Godi ka'ene na ni'ajihah jihu*n*a'i temaranu.

⁴⁸ Ijihuni maijaho huni pweijara masuani ajuaranahinajihuna'e Hu huni hora venana. Heha! Iviasi rene amuja amuja na rone merajihana 'wahuna.

⁴⁹ Ijihuni maijaho Natohwijara uneunecha mapoka mama'ina nuna'e venana. 'Ene Huni ihijaho niho'o aririjina 'wavura.

⁵⁰ Ijihuni maijaho amuja amuja kwinu kwinu irahipo Huni hora vejujaho Hu numirama apena rouna.

⁵¹ Hu Huni iji uneunecha mama'ina vene 'ee ea ka'ene kehi kehi oji'ini jihipuni oja vwiha veju'e ani ani va'ura.

⁵² Hura ea mama'ina veju'e puni ruha mama'inijija pa'arejura 'ee Hu ea ka'ene masuani hiji'inijiji 'unirame ahasingimauna.

⁵³ Hu ea ka'ene matunavi'inijija uneunecha mamaa areri vajihuna. 'Ene ea ka'ene uneunecha ani rejil'inijija irechamiu'e ija maisu va'ajivura.

⁵⁴ Hu huni pwea Isureri ni'ajahuna. 'Ene Hura pu numiramaji vwiha'amarono ni'ajahuna.

⁵⁵ 'Ene opunúna'e Eparahamiho 'ee huni sesahwahiji 'warama ja'ina'e majama 'waramu 'wamana.

⁵⁶ 'Ene Meriho masapa no'opisu hinarena kú'o 'unama huni ari va'ana.

Joni Papitisita Nahejajina

⁵⁷ Ivi'a Irisapetira hariha nahehuni vea roume hu hariha nahenana.

⁵⁸ 'Ejume huni amuja ea ka'ene huni rori hijura 'ee huni vwea vwina Natohwijara hu numimarena venaji henareja pu pu'úmo temarasha-hara.

⁵⁹ 'Enarena vea oma iropu no'opisu para'eme pu hariha kajaho sisa 'uhua'irono apena roara. 'Enareja pu omahoni iha Jakaraiasi 'i'i 'ahiume vejara.

⁶⁰ 'Enakaivo huni ohijara ijá 'iama Pana. Huni iha Jonina 'wa'eja 'iamana.

⁶¹ 'Ejume pu hu ijá 'wava Ijaho oni vwea vwina pina iha ija'ina 'uraha 'wahuna pana 'wavara.

⁶² 'Ejume pu huni omijaho ijaru ijá 'wava A iha irá 'ihuna ura renao? 'wavara.

⁶³ Jakaraiasi heha 'waravume mahume hu ika'ina venamana. Huni iha Joni venana. 'Ejumakame pu ea mapoka niho'o oja hwa'usahara.

⁶⁴ Ijihia kajakaro rena Jakaraia oni ira ka'ene pa'arenajaho ira 'warame 'ee Godi ta'arohana.

⁶⁵ 'Ejumakame ea ka'ene rora rora kají hijujija niho'o tea junama paranana. 'E'eme Jutia huri'a vaja kajaho raka ka'ene renaji 'wamapenojara.

⁶⁶ Ea ka'ene ijí hejajija pira'arame ijá 'wava Sesamaakaho ichá'ina'e re'ena? Ijihuni maijaho Natohwijara Hu 'ajohau 'wavara.

Jakaraiasira Túna'i Rehuniji 'Waramajina

⁶⁷ Huni oma Jakaraiasiho Godoni 'Aveni tinia apejume raka ka'ene ijí'a rehunijaho ika'ina 'waramana.

⁶⁸ Natohwa ka'ene Isureri opuni Godi ijí ta'aroha. Hu ehwaha'e uvanie 'ee kú'o 'unama 'imena'e 'eka'i roana.

69 Huni pwea Teviti oni amuja vajijino núni Ni'ajúhi'ina Natohwa vejume 'urinana.

70 Ikaho Hura nitama iraka ka'ene Huni poropetia arimaijihí puni vaji 'waruvara.

71 Hu núni naka 'ee ea ka'ene nú kúme senavi'inijihi puni vaji ni'ajú'i roana.

72 Ijihuni maijaho Hu opunúna numirame 'ee Hura nahama 'waramaji vwhanuna.

73 Hu nimaa nimaa núni oma Eparahami nahama 'waramana.

74 'Ene Hu núni nakapuni vaji Hu nú ni'ajúhuna nahama 'warumana. 'Ejakame nú pajuhavi'i Huni kaukara vehuna.

75 'Ene Huni una'i arimaa 'ee nimaa nimaa núra hi'avari veijaho hina vena apene vahuna.

76 'Ene harihakere a poropetia ka'ene maho'o Ichuto Maijhuna 'wahuna. Ijihuni maijaho a urana va'e Natohwi jihuni 'unamiji amairiahuna.

77 A Huni ehija ka'ene Hura ni'ajihuniji nahakame puni sisea vwhane arehuniji kama hehuna.

78 Ijihuni hahi Godi ka'ene swasi ma'uri jara nú numirume vea kahi ichutoi ranave rina roe hananúhuna.

79 'Ene ea ka'ene nutuvi'ini hijujija 'ee ea ka'ene nikwamasa'iro vejuijija hananihuna. 'Ene Hu núni mumora 'ajohuakame nú matauma hihuni 'unamiji vahuna 'iamana.

80 'Ejume hariha 'u'ua kajaho emarena ajime 'ee huni vwiha 'u'o emarena paranana. 'E'eme hu nechi'eru hinonu va'u iji'a amura Isureri puni una'i sama hiramana.

*Petirihemi Jesu Nahejajina
(Matiu 1:18-25)*

¹ Ijí vea kajino kamati Sisa Aukasitasira 'waravume ea ka'ene hora kwaa ara ka'ene 'ajohaujija iha ta'irono ea mapoka nianae va'avarono 'waramana.

² Vea ka'ene Kwiriniasi Siria opuni 'ajohai'ina renani vajijino iha amura'e aneja vene tahara.

³ Ea mapoka puni aranejijino iha ve'irono va'ara.

⁴ 'Ejume Josapi 'u'o Nasareti Karari vaji rene Jutia ara natohwa Petirihemi ka'ene Teviti oni araneji va'ana. Ijí hu va'ajihuni maijaho hu Teviti oni amuji jihuna'e va'ana.

⁵ Pu no'o Meri ka'ene hora 'wahuna'e nahama 'waravara ka'ene hari'i nenaji'i puni iha ve'irono va'ara.

⁶ 'Ene pu ijí hijari vea kajino hora hariha nahehuni vea niroa apenana.

⁷ 'Ejumakame hu ijí huni Hariha ka'ene amuri-jaho nahenana. 'Enareja hu apena ateha hwame 'ee hanupo 'iruma ijuri ruhi ranavume hinana. Ijihuni maijaho pura ruha ka'ene hihunijaho pa'ajihuna'e avajara.

Sipia 'Ajohi'ina 'Ee 'Ona Oji'inijihina

⁸ 'Ejumakame ea ka'ene sipia 'ajohi'ina 'aho'a kwaa kajino vea kajihuni na'iijino puni sipia'e 'ajohi'i hijara.

⁹ 'E'eme Natohwi jihuni 'ona oji'ini roe puni una'i nami'eme Natohwi jihuni hanaji'inijara pura namija kajaho hanana apene tauhuhana. 'Ejume pu niho'o natohwa'e tea junama parani-ana.

¹⁰ Ona'oji'inijara ijá iama Juvujaho are'ika'i heha! Na joni vu'a maiu'ina mamaa'e apena routa. 'Ee ijara veje ja 'ee ea mapoka ka'ene kwaa araka mapoka kakino hijukija teamanama parahuna.

¹¹ Ike iviasi na'iakino Teviti oni ara natohwijino joni Ni'ajiji'ina nahejara. Hu Keriso ka'ene Natohwijina.

¹² Jara ijí hena kahunijaho ja vail'i kave pu atehi apene Hariha 'u'ua kajaho hwame hanupo 'iruma ijuri ruhi ranavu'e hinuna'omo ja ijí kahuna 'iamana.

¹³ Ijá ve'eme ni'aha kwino 'ona oji'ina kajaho 'ee 'ona oji'ina 'aho'a mapoka mapoka kahi akúpi 'ahi Godi ta'arohe javaa vejara.

¹⁴ Pu javaa ika'ina vejara

Godi ka'ene niho'o Ichuto Maiji huni pinana 'urinu. 'Ene ea ka'ene Godira iki mwe'i kime teamanamujihi matauvi'inijaho mihu 'wame ta'arohara.

¹⁵ Ona'oji'inijija akúpa 'ahi va'umakivi'i sipia 'ajohi'inijipo ijá 'wava Roe ma arira'e Petirihemi va'e ike unekaka reju'ukame Natohwijara roe nú 'warumuke kava 'wavara.

¹⁶ 'Ejume pu marako vai'i kivume Meri ho Josapi ho Hariha 'u'ua kajaho ijano ijí hanuhapo 'iruma ijuri ruha kajino hijara.

¹⁷ Vea ka'ene sipia 'ajohi'ini jipuhipu Hariha 'u'ua kaji kavajaho raka ka'ene Hariha 'u'ua kaji rona 'waravajaho pu 'waravara.

¹⁸ Ea mapoka'e sipia 'ajohi'inijipo vu'a kaji 'waravume hejajaho niho'o oja hwa'usunahara.

19 'Enakaivo Merira ijí henarena huni oja vaji vwihananama apena va'ana.

20 Sipia 'ajohi'ina kajija 'unama vai'i une ka'ene pu kame hejaji Godi ta'arohe Huni pinana 'unama ahasirivara.

Jesu Temiporui Iha 'Tavajina

21 Na'ia iropu no'o pisu pa'arejume iji'a sisa 'uhu'avarono iha 'iame Jesuna 'wavara. Hu ijí'a mai'o tei vaji muna'amarono ona'oji'inijara iha kajaho mahana.

Jesu Temiporui Godoni Ija Tahi Ranavajina

22 Vea kajara apejume Josapi'o Meri'o Mosisi oni tamani iraka ka'ene 'waramaji vene 'ee har-ihia ara hinajaho pa'are'eme pu Sesamaijaho isnara iramahe Jerusaremi Natohwiji ma'i 'ahiume va'ara.

23 Ikaho Natohwí jihuni tamana vaji ika'ina 'warumana. Hariha ka'ene amurijihi nahena'avajija Godi vajahuna 'úmana.

24 'Ene Natohwí jihuni tamana vaji 'warama ja'ina'e marahu'ora no'ohe'ina 'aho unea no'ohe'i 'eka va'e swasa vejura.

25 Heha! Ea pina huni ihijaho Simionina hu Jerusaremi vaji hinuna. Hu ea arira 'ee huni kaukara oja mahi'ina'omo hu Isureri opuni Mesaia 'ajaha hinuna. 'Ena'omo Godoni 'Avena hu samahana.

26 'Ejume Godoni 'Avenijara hu nahama 'waramajaho hu pakwa'ika'i hi'leje Natohwí jihuni Kerisora roa kahuna 'wavume hinana.

²⁷ Hu 'Aveni vaji Temiporu roana. Vea ka'ene emahwapo Hariha Jesu aheme roajaho varapa tamana ve'i roara.

²⁸ Simioni Hariha kajaho tapane apene huni ija 'ahi rana'ika'i Godi teimani 'wamana.

²⁹ Hu ika'ina 'waramana Natohwe iviamaa Ara Oni ira vaji nahama 'warumajaho renu. 'Enakúne A Oni pwea veje matauma va'ama.

³⁰⁻³¹ Ara Oni Ni'ajúhi'ina ka'ene ea mapokakihi puni una'i amairiaramajaho na nuni niakino kavu.

³² Hu ira ka'ene Jenitaru hananie najahunijina 'ee Hu Oni ehija Isureri opuni Hanani'inijina 'wamana.

³³ Emahwapo vu'a ka'ene Hua rone 'waravaji hejajaho oja hwa'usahara.

³⁴ Simionira pu merajihe 'ee Meri Huni ohijaho ijá 'wama Hena! Ike Harihakaho Isureri opuna pijahana. Hu Isureri ora 'aho'a veje arihe 'aho'a ajihuna. 'Ene Hu aacha'omo ea mapoka ijí kame Hu ninahuna.

³⁵ 'Eje ja temuka'amajaho areri so'wa 'usa rukina joni oja 'ahi naminau ja'ina'e rehuna. Ijihuni maijaho oja vaji hemu vviha roe samaumaa rehuna 'wamana.

³⁶ Napara poropeti Ana Panueri oni 'apaja 'ee Asa oni amuja. Hu paranamaa paruahe'i hinajaho juara iropu no'o pa'arenana.

³⁷ 'E'eme hu amuna hinajaho juara mapoka mapoka (84) pa'arenana. Hu niho'o Temiporu paranamuna 'ee veiri'a na'ia rira 'aura areme 'ee siporua 'onuna.

³⁸ Nijihijakura hu roe Godi teimani 'wamana 'ee ea ka'ene Jerusaremi puni Ni'ajih'i'ina 'ajoha

hijajihmajaa Hu rone 'waramana.

'Unama Nasareti Roajina

39 'Ejume pu Natohwi jihuni tamanijara 'waramajaho ve paranareja vukú'o 'unama Karari puni ara natohwa Nasareti va'ara.

40 'E'eme Sesamaa kajaho haruriji'i emarena ajime 'ee Huni vwiha 'u'o emarene 'ee Godoni maiji vwhanii'inijaho Hu hu'úmo majama namana.

Jesu Paruisea'e Jerusaremi Temiporu Vaji Hina-jina

41 Juara kwinu kwino pa'are'ejue'e emahwaha Jerusaremi Pasova sora i'i va'ura.

42 Vea ka'ene Hu juara iropu ropu no'o renajino pu kú'o tamanijara ve'avarono 'waramu ja'ina'e sora i'iro kahi va'ara.

43 Pura na'ia icharu hihuni veijaho nipa'arejume pu kú'o 'unama ari puni va'eme Jesuho Jerusaremi hinana kaivo Huni emahwahijija ijaho pahena pakavara.

44 Pu vwhajajaho Hu ea mapoka kajihipuni vaji va'u ronareja pu 'urina kwaa jora'e na'ia kwino va'areja ijí pakamareja aneja vene puni napuhija 'ee vwea vwina puni vaja kajino savara.

45 Pu Hu pakamareja kú'o 'unama Jerusaremi sama va'ara.

46 Vea no'opisu pa'are'eme pu Hu Temiporu vaji najahi'inijipo najahaji hene 'ee aporavi'i hi'eme piunavara.

47 Ea mapoka Hura eha mavarasa'ina ka'ene 'waramaji hejajaho pu niho'o oja hwa'usunahara.

48 Pu ijí kame hejajaho pu 'u'o oja hwa'usunahara. 'Ee oahi ijá 'wama Hariha nuna A iraka vene 'unama ika'ina 'ahúane? Nú omune'i niho'o oja hianu'eme Aa'e sarame apenojara 'wamana.

49 Hu pu ijá 'iama 'Ú ja raka vena Na sarivo? 'Ú Na Oma Nunijihuni sei hihunijaho ja pahejo? 'iamana.

50 'Enakaivo Hura raka ka'ene 'warama jihuni maijaho pu pahejara.

51 'Ejume Jesuho pu pu'úmo 'uname Nasareti va'ana. 'Enarena Hu emahwapuni ira hene venana. Oahi raka ka'ene hena kamajaho oja vaji vwhaji'i hinonana.

52 'Ejume Jesuho 'urine emakina rene 'ee vwiha vaji emarene 'ee Godiho 'ee emaa Hu ura rejura.

3

*Joni Papitisitara Najahajina
(Matiu 3:1-12; Maka 1:1-8; Joni 1:19-28)*

1 Sisa ka'ene Taipiriasina 'wavujara natohwa rena hinajaho juara iropu ropu'a mumora rona kwinu rejume Ponachasi Pairati Jutia puni natohwa rejume 'ee Herotira Karari ora 'ajohau'e 'ee huni 'u'ua ka'ene Piripura Ituria 'ee Tekonaitasi 'ajohau'e 'ee Raiseniasira Apirini ora 'ajohauna.

2 'Ejume Anasi'o Kaiapasi'o pirisitia mama'ina rejari vea kajino Godoni vu'a Joni ka'ene Jakaraiasi oni harihaka nechi'i hinonu jihuni roana.

3 'Eju'e hu Jotani rori ara ka'ene hijuji roe emaapo puni sisea vwhana are'eje toi samahuni vu'a 'waramana.

⁴ Poropetia Aiseara ika'ina huni heha vaji venana.

Ea pina nechi'i hine 'ume'ena Natohwi jihuni 'unama amairie 'ee veje arira renama.

⁵ Isoha same 'ee huri'a veje amara reja 'ee 'unama ka'ene 'ajovi'inijaho veje arira reja. 'Unama ka'ene 'onajivi'inijaho amara renama.

⁶ 'Eje ea mapoka Godi oni ni'ajúhi'inijaho kavava 'úmana.

⁷ Ea mapoka huni roajivakame hura 'unirame toi vaji sama'e 'uri'avarono roajivajiji ijá 'iama Ja tapara ka'ene siseijihipuni harihija. Joni eha sisea ni'ima'ura ka'ene túna'lí roujaho irara ja 'waravukame ja juhame iki roajivare?

⁸ 'Ina rukina re'vara! Joni 'unama sahasijaho ta'arohareje niare'i kaivo ea maiu'ina re'vara Ja vwiha ika'ina pavwiha'vara. Eparahami núni oma'omo nú areri rena hiju paro'vara kaivo Godira areri veje ike muna ikihipo Eparahami oni harihija rehuna. Ijihuna'e nú areri rena hiju paro'vara.

⁹ Iviamai taupa icha aneji namuna'omo icha kajija 'ina maa pare'avajaho 'umareje 'uhue veni ato'aruhuna 'iamana.

¹⁰ 'Ejume ea mapoka kajipo apoma ijá 'wava 'Ena'omo nú ichá'ina'e ve'eja? 'wavara.

¹¹ 'Ejume hu eha vene pu ijá 'iama Ea irara setia no'ohe'i re'amajaho ea pina ka'ene pa'aji pina ma'amane 'ee ea irara 'iruma rukina'e re'amajaho 'u'o ijá ve'amana 'iamana.

¹² 'Ejume ea ka'ene takisia apeji'ina 'u'o hu 'unirame toi sama'avarono roara'omo ijipo

apoma ijá 'wava Najahi'ine nú ichá ve'eja 'wavara.

¹³ Hu ijá 'iama Ja takisia'e ape'avajaho icharu 'eka'avarono 'waravajiru 'eka'avara 'iamana.

¹⁴ 'Ejume sorutia 'ahopo apoma ijá 'wava 'Enakaivo núa. 'Ú nú ichá'ina'e ve'eja? 'wavara. Hu ijá 'iama Ea 'ahopuni monia pamajikari 'ejahie 'etuji'avara. 'Ee ea pina pamajikari nama'avara. 'Ee joni anejijaho teamana'avara 'iamana.

¹⁵ Ea mapoka kajija 'ajohe vwiham'i hijura'omo pu Joni kavari veijaho puni oja vaji ijá roja Vejuro'i Kerisora re'ama rojara.

¹⁶ 'Ene Joni eha vene ijá 'iama Na ja toa vaji samauta kaivo Ea ka'ene nuni túna'i roujara samahunijaho Godoni 'Avena 'ee haruriji'i samahuna. Na Hu Hu'úmo areria pana 'ee nara Huni mumora hwana jahenahuna areria pana.

¹⁷ 'Enakaivo soa Huni ija tahi namuna'omo Hura 'witia mutuuri ruhijino mutuareje maijaho niana'ika'i siseijijahija vena ka'ene pautaruti sa'ika'i namujiano ato'aruhuna 'iamana.

¹⁸ Na'ia mapoka'e hu vu'a maa maiu'ina ea najahe 'ee vu'a 'aho'a ani'ina ni'ajihe najahana.

¹⁹ 'Enakaivo hu ea natohwa ka'ene Heroti 'uraraha 'waramana. Ijihuni maijaho hu Herotiasi huni 'u'uijhuni napara turame 'ee uneunecha sisea mapoka'e Heroti venajihuna'e 'uraraha 'waramana.

²⁰ Hu kú'o sisea pina ka'ene huri venajaho Joni apene tipurai ranamajina.

*Jesu Toi Apúsavajina
(Matiu 3:13-17; Maka 1:9-11)*

21 'Enakaivo ea mapoka'e toa vaji samauma para'eme iji'a Jesu 'u'o toa vaji apúsavume 'urinana. Hu hine siporua 'o'eme akúpi 'ahi vwicha jaraana.

22 'E'eme Godoni 'Avena areri marahu'ora puna'i jaima ariha roe huni haha 'ahi ajimana. 'E'eme ira akúpa 'ahi rene roe ijá 'wama A Nuni Hariha ka'ene Na oja mahujina. Na A nihō'o teamanimu 'wamana.

*Jesuni Amuhijijina
(Matiu 1:1-17)*

23 Jesuho juara mapoka mapoka (30) pa'are'eme iji'a Hu Huni kaukara aneja venana. Ea mapoka Jesuho Josapi oni Hariha 'wavura. Josapi oni oma Iraina Irai oni oma Matatina

24 Matati oni oma Rivaina Rivai oni oma Merikaina Merikai oni oma Jenaina Jenai oni oma Josapina Josapi oni oma Matataiasina

25 Matataiasi oni oma Emasina Emasi oni oma Nehamina Nehami oni oma Esirina Esiri oni oma Nekaina Nekai oni oma Meatana

26 Meata oni oma Marataiasina Marataiasi oni oma Semainina Semaini oni oma Josekina Joseki oni oma Jutana Juta oni oma Joananna

27 Joanani oni oma Resana Resa oni oma Jerapaparina Jerapapari oni oma Setiarina Setiari oni oma Nerina Neri oni oma Merikaina

28 Merikai oni oma Atina Ati oni oma Kosamina Kosami oni oma Erimatamina Erimatami oni oma Erina Eri oni oma Josuana

29 Josua oni oma Eriesana Eriesa oni oma Jorimina Jorimi oni oma Matatina Matati oni oma Rivaina Rivai oni oma Simianina

- ³⁰ Simiani oni oma Jutana Juta oni oma Josapina
Josapi oni oma Jonamina Jonami oni oma Ira-
iakima Iraiakimi oni oma Mereana
³¹ Merea oni oma Menana Mena oni oma
Matatana Matata oni oma Netanina Netani oni
oma Tevitina Teviti oni oma Jesina
³² Jesi oni oma Operina Operi oni oma Poasina
Poasi oni oma Sarimonina Sarimoni oni oma
Nasionina Nasioni oni oma Aminatapuna
³³ Aminatapu oni oma Ataminina Atamini oni
oma Ramana Rama oni oma Hesiranina Hesirani
oni oma Peresina Peresi oni oma Jutana Juta oni
oma Jekapina
³⁴ Jekapi oni oma Aisikina Aisiki oni oma Epara-
hamina Eparahami oni oma Terana Tera oni oma
Nehorina Nehori oni oma Serukina
³⁵ Seruki oni oma Reuna Reu oni oma Perekina
Perekki oni oma Hiparuna Hiparu oni oma Sirana
Sira oni oma Kenanina
³⁶ Kenani oni oma Aripakasarina Aripakasari oni
oma Semina Semi oni oma Noana Noa oni oma
Ramekina Rameki oni oma Metusarana
³⁷ Metusara oni oma Inakina Inaki oni oma Jer-
atina Jerati oni oma Mahasarina Maharari oni
oma Kenanina Kenani oni oma Inosina
³⁸ Inosi oni oma Setina Seti oni oma Atamuna
Atamu Godoni hariha.

4

Jesu Vena Kamajina (Matiu 4:1-11; Maka 1:12-13)

¹ Jesuho Jotani rene Godoni 'Aveni ruha apena
para'eme 'Avena kajara aheme nechi'i va'ana.

² Hu ijino na'ia mapoka mapoka (40) hi'eme Setani Hu vena kamana. Hu vea kajija 'iruma painajihuna'e Hu matuma paranana.

³ 'Ejume Setanijara Hu ijá 'wama A Godoni Hariha re'amajaho muna ike veje puretia rejakame ina 'wamana.

⁴ 'Ejume Jesura eha vene ijá 'wama Godoni Irijara ija 'úma Ema mai'o puretieru reje hihuna pana 'úmana 'wamana.

⁵ 'Ejume hu Jesu ahema va'e huri'a 'ahi namine kwaa ara mapoka kajaho ni'aha kwinu nahana.

⁶ 'Ene Setanira Hu ijá 'wama Na harura 'ee kwaa ara mapokakahō vajahuna. Ikaho naa'e mihara'omo nara ea ka'ene na ura reni'amaji mahuna.

⁷ A na oja mi'amajaho ike mapokakahō Ona'e rehuna 'wamana.

⁸ 'Ejume Jesura eha vene ijá 'wama Godoni Irijara a Natohwā ka'ene oni Godi ijiru oja mahe Hunaru vena'amana 'wamana.

⁹ 'Ejume hu Hu ahema va'e Jerusaremi Temiporu 'ahi ranavume namijumakavi'i ijá 'wama A Godoni Hariha re'amajaho iki kami mwama pi'onama 'wamana.

¹⁰ Godoni Ira vaji 'waramajaho Hura Huni 'ona ojilina irechamie pu A 'ajohahuna 'wamana.

¹¹ Pura puni iji 'ahi'enae A Oni mumora muna 'aha pa'anaarahuna 'úmana 'wamana.

Noin

¹² Jesura eha vene ijá 'wama Godoni Ira vaji ijá 'úma A Oni Godi Natohwijaho pavena ka'amana 'úmana 'wamana.

Noin

¹³ Setaniho Jesuho 'unama ani ani vena kama-jaho iji'a are'i kaivo ma'uaku ranama ruva'ana.

*Jesura Huni Kaukara Karari Vaji Aneja
'Emajina*

(*Matiu 4:12-17; Maka 1:14-15*)

¹⁴ 'Ejume Jesuho kú'o 'unama Godoni 'Aveni jihuni haruriji'i Karari va'ana. 'Ejume Huni pinanijaho 'urijume kwaa ara mapoka kajaho he parajara.

¹⁵ 'Ene Hu aneja vene puni Sinakoku vaji na-jahume ea mapoka'e Hu ta'arohara.

Jesu Nasareti Vaji Pataarohajina

(*Matiu 13:53-58; Maka 6:1-6*)

¹⁶ 'Enarena Hu 'uname Nasareti Huni araneji Hura emakina'e renajino va'ana. Sapati hu nivenu ja'ina'e Sinakoku vaji Hu heha ta'iro 'urinana.

¹⁷ Heha ka'ene poropetia Aisea onijaho Huni ijatahi ranavume Hu rasame ika'ina kama tahana.

¹⁸ Natohwí jihuni 'Avenijaho Na hu'úmo hinu.

Hura Na ea ka'ene uneunecha pa'ajihí vu'a ka'ene mamaiji naja'urono ranamiana. Ea ka'ene i'ivani'inijihi rasamie 'ee ea ka'ene nia supavi'iniji veje niri'avarono routa. 'Ene ea ka'ene sisei hiji'inijihi ni'ajihé hanasina ape'avarono routa.

¹⁹ Juara ka'ene Natohwijara ni'ajihuniji 'wara'i routa 'úmána 'iamana.

²⁰ 'Ejume heha tahuhe ea ka'ene naminaji ma'ika'i asuma hinana. 'E'eme ea mapoka

ka'ene Sinakoku vaji hija kajija nia tajahena
apene Hua'e mahara.

²¹ 'Ejume Hu aneja vene ika'ina 'waramana
Joni atai he'eme heha ka'ene Na tahujaho ivia-
maa nimaa renu 'iamana.

²² Ea mapoka ka'ene ijí hijajaho niho'o oja
hianame 'ee vu'a ka'ene Huni iri vaji rena roe
arihume hejajaho niho'o teamanavara. 'Ejume
pu ijá 'wava 'Ú eakaho Josapi oni Harihijine?
'wavarra.

²³ Hu pu ijá 'iama Na niheju. Ja Na areri juke-
takúne orono veje maranaama 'wihuna. Ja Na
ijá 'wihune Ara Kapeniami uneka ka'ene vejume
nú pinana ka'ene hejuji ikine oni ari veja kava
'wihuna 'iamana.

²⁴ Na nimaa nimaa 'waravyu ea ka'ene
poropetia huni ara vajijaho hamि paapene
'ajovura.

²⁵ Na ja nimaa 'waravo. Nimai Iraiija oni
veijaho amuna mapoka'e Isureri vaji ani re'eme
juara no'opisune masapa iropu kwinu neha
papi'eme kwaa ara kajaho ora vea re'eme
matuna hijara.

²⁶ 'Enavo Iraiijaho mai'o amuna mapoka ijí hi-
jara kaivo hu puna pava'ana kaivo hu Saitoni vaji
ara iha Sarepatina 'wavujino amuna kwinu'wi ijí
hinuna'omo ijí ni'aja'iro va'ana.

²⁷ Poropetia Iraisa oni veijaho ea mapoka re-
porosia rukina Isureri vaji hijura vo niho'o ea
pina marahuna pana kaivo Nemani ka'ene Siria
orijiru huhusu maranana 'iamana.

²⁸ Ea ka'ene Sinakoku vaji hija kajipo ijí heja-
jaho pu niho'o ajinamana.

²⁹ Pu 'urimarame Hu tairie apene ma'ahi 'useme aheme va'e huri'a ka'ene puni ara ijihuni toi vejari 'ahi rarahi apúsa'i 'ahiume vejara.

³⁰ 'Enakaivo Hu puni rira kajino ro 'e'une va'ana.

*Ea 'Avena Sisei Rosamajina
(Maka 1:21-28)*

³¹ 'Ejume Hu Kepeniami Karari vaji va'e Sapati vei ea najahana.

³² Pu Huni vu'a ka'ene niho'o harura rukiniji hejajaho oja hwa'usahara.

³³ Ijí Sinakoku vaja kajino ea pina 'avena sisei ajivi'ina hinana'omo hu niho'o ira ajira'e emaa-vanana.

³⁴ Haee! Jesu ka'ene Nasareti orakere A nú iraka'e vetú'irono roane? 'Ú A núa'e 'eka ruaru 'ahaume roane? Na A nihena kavu. A Godoni arira maijina 'wamana.

³⁵ 'Enakaivo Jesu 'uraraha ijá 'wama Irano'a are'i kaivo ema kajaho rana'i kaivo ariha va'a 'wamana. 'Ejume ijí 'avena sisea kajaho hu unenu'u pina pave'ika'i ema kajaho pi'onavume ea mapoka kajihipuni una'i 'ojumakavi'i ro 'e'una va'ana.

³⁶ Ea mapoka ijí kamareja niho'o oja hwa'usunahara. 'Ejume pu ijá 'wava Ike vu'akaho ichá'ine? Harura 'ee ajira rukina'omo ike eakara 'ananajihe 'ee pikinakavi'i 'avena sisea 'waravu'e usevura 'wavara.

³⁷ 'Ejume ijí Huni vu'a kajaho kwaa ara rora rora kajaho marako re'unana.

*Jesura Ea Mapoka Venaume Maraniajina
(Matiu 13:53-58; Maka 1:29-34)*

38 'Ejume Hu 'urina Sinakoku kajaho are'ika'i Saimani oni arijino va'ana. Saimani oni jura paranahijaho haha ohoa natohwale rejume pu Jesura ni'aja'amarono huni iha 'ahi 'ona vejara.

39 'Ejume Hu va'e Huni ruha rorijino nami'i ijí haha ohoa kajaho 'ararihaana. 'Ejume haha ohoa kajaho pa'are'eme hu 'urine 'iruma amairia pu vajihana.

40 Nusirei vea va 'o'i ve'eme ea mapoka ka'ene atama ani ani'ina 'ekajija aherame Jesuni roume Hu ea kwinu kwino puni haha 'ahi Huni ija irechavume pu maraniara.

41 'Ejume 'avena sisea mapoka'e Hura vejume usevi'i ijá 'umejare A Godoni Hariha 'umejara. 'Ejume Hu 'ararihie vejume pu ira pa'waravara. Ijihuni maijaho Hu Kerisoho pu nihena kavura.

*Jesura Sinakoku Vaji Najahajina
(Maka 1:35-39)*

42 Vea nitumajino Hu kwaa kajaho are'ika'i va'e kwaa ka'ene ea pahijujino va'ana. 'Ejume ea mapoka kajipo hina samuva'o piuname pu ura Hu 'unanavakame paranamie va'amarono vejara.

43 'Enakaivo Hu pu ijá 'iama Na va'e ara 'aho'a Godoni ara rona 'waramaji najahuna. Ijihuni hahi Na ranamiume Na ikaho routa 'iamana.

44 'Enarena Hu majaa Jutia Sinakoku mapoka vaja najahana.

5

*Jesura Tisaiporua Amura 'Umenajina
(Matiu 4:18-22; Maka 1:16-20)*

¹ Na'ia pini Hu Jenesareti soha rorijino namine vu'a 'wara'eme ea mapoka Godoni vu'a kaji he'i 'ahiume ijí kahi piijaravi'i roajivara.

² Hu kivume sisima no'ohe'i soha rori na'eme ea ka'ene úa vesavi'inijija puni namea 'eke arihe sovi'i hijara.

³ 'Ejume Hu Saimani oni sisima pini vaji aji'ika'i 'waravume piijahume ma'uako karokaro soha riri va namana. Hu ijihuni vaji hiji'i ea mapoka kajija najahana.

⁴ Hu vu'a 'wara para'ika'i Hu Saimani ijá 'wama Oni sisima piijahe úa riri va'e joni namea same kija siriraha 'wamana.

⁵ 'Ejume Saimani eha vene ijá 'wama Natohwe nú iviasi na'iakaho hine ojuta pahwe'i nú úa kaji vesavara vo niho'o kija pina pa'ejara kaivo A 'warimu jihuna'e na namea sahuna 'wamana.

⁶ Pu puni namea samareja kija niho'o mapoka mapoka siriravume namea aneja vene turamana.

⁷ 'Ejume pu napuhwaha ka'ene sisima pina 'ahi hijajija 'umenaume pu roe ni'ajihara. Pu roajime puni sisima no'ohe'i vejume itusahe sisima kajija aneja vene tusa'i vejara.

⁸ Saimani Pitaho ijí hora une ka'ene vena kaji kamarena Jesuni una'i nitupari sa'ika'i ijá 'wama Natohwe na ea sisea veji'inakúne nuni rori roujaho are'i kaivo ani va'a 'wamana.

⁹ Ijihuni maijaho Hua 'ee ea 'aho'a ka'ene pu pu'úmo hijajipo ijí kija mapoka kaji kivajaho niho'o oja hwa'usahara.

¹⁰ Saimani oni napuhija Joni'o Jemisi ka'ene Jepati oni harihija no'o 'u'o oja hwa'usahara. 'Ejume Jesura Saimani ijá 'wama Tea junamujaho

arema. Iviamaikano rene a emaa sirirahuna 'wamana.

¹¹ 'Ejumakame pu puni sisima 'eka roe amari irechame 'ee puni uneunecha mapoka are'ika'i Hu 'ararihaa va'ajivara.

*Jesura Ea Vejume Maranajina
(Matiu 8:1-4; Maka 1:40-45)*

¹² Na'ii pini Hu ara pini va'eme ea pina reporosia rukina Jesu kamarena Huni una'i mwe'i 'oji'i jarima ijá 'wama Natohwe A ura rena'amajaho veje na maraniama 'wamana.

¹³ Jesura ija jorane 'unavil'i ijá 'wama Na ura reniukúne marana'ama 'wavume ni'aha kwino ea kajihuni reporosia pa'arenana.

¹⁴ Jesura ijá 'wama Ikaho ea 'aho'a pa'wara'amana kaivo va'e pirisiti nahareje iji'a va'e Mosisira 'warama ja'ina'e Godoni swasa ve'amana. 'Ejakame ea mapoka oni reporosia ka'ene pa'arenajaho hena ka'avara 'wamana.

¹⁵ 'Enakaivo Huni pinanijaho ara mapoka henareja ea mapoka'e Huni vu'a hene 'ee atama puna veje pa'are'amaro roajivara.

¹⁶ 'Enakaivo Hu na'ia 'aho'a va'e ea pahijuri kwai siporuua 'onuna.

*Jesura Ea Ija Ajuaravi'ina Vejume Maranajina
(Matiu 9:1-8; Maka 2:1-12)*

¹⁷ Na'ia pini Hu hine naja'eme ijihuni vaja kajino Parasia 'ee ea ka'ene tamana najahi'inijija ijí hijara. Pu ara kwinu kwino Karari vaja 'ee Jutia vaja 'ee Jerusaremi vaji rena roe ijí hijara. 'Ejume Natohwí jihuni harurijaho ijí vea kajaho Jesura ea'e veje marani'amarono namana.

18 'E'eme ea 'ahopo ea pina haha ajuaravi'ina apene kime Jesuni una'i rana'i 'ahiume apene sei roajivara.

19 'Enakaivo ea mapoka'e itu'ona namajihuna pura hua'e apena vahuna 'unama pa'arenana. 'Enajihuna'e pu ea kajaho apene atahuri va'e tita napame ea kajaho huni kicha 'ahi na'eme apúsavume 'onu va'o Jesuni una'i ea rira kajino namana.

20 Hu ichá'ina'e pu nimaar rojuji kimarena ema kaji ijá 'wama Napura nunakera Oni sisea Na vwhiana arevu 'wamana.

21 Parasia 'ee Sikuraipia pu aposarame ijá 'wava Ikaho ea irana'omo Hu Godi matahare'e avano? Ea irara sisea vwhiane arehune? Godira Huhusuna 'wavara.

22 Jesuho pura iraka ka'ene aposaravajaho nikimarena ijá 'iama 'Ú ja iraka vene joni oja vaja aposaravo?

23 Na ichá'ina'e 'wara'ejo? Na huni sisea vwhiana are'eju ho Na 'wave 'urina va'ena? 'iamana.

24 'Enakaivo jara Ema Puni Harihijihuni harura ka'ene iki mwe'i ea vwhianie arevuji hena ka'avarono Hu haha ajuaraji'inijaho ijá 'wama Na a 'waravukúne 'urine oni suha apene ari va'a 'wamana.

25 'Ejume ni'aha kwino ea kajaho puni una kajino 'urine iraka ka'ene hora ijihuni toi namajaho apene ari Godiho ta'arozi'i va'ana.

26 Pu nihoo'o oja hwa'usahaume Godi ta'arohe tea juname ijá 'wava Nú iviasi uneunecha mavarasa'ina kivara 'wavara.

*Jesura Rivai 'Umenajina
(Matiu 9:9-13; Maka 2:13-17)*

²⁷ Ijihuni túna'lijino Hu vai'i kavu'e ea ka'ene takisia apeji'ina iha Rivaiho takisia apejuri sei-jino asuma hinana. 'Ejume Hu ijá 'wama 'Ararihiie roa 'wamana.

²⁸ Hu huni uneunecha mapoka maki'ika'i 'urine Hu 'ararihaa va'ana.

²⁹ 'Enarena Rivaira huni sei 'iruma natohwa Jesuna'e vejume ea ka'ene takisia apeji'inijija 'ee ea 'aho'a mapoka'e pu pu'úmo 'iruma ijara.

³⁰ Parasia 'ee Sikuraipia ijipo aneja vene Huni tisaiporu 'uraraha ijá 'iava Ja iraka vene ea ka'ene takisia apeji'ina 'ee ea sisea pu'úmo 'iruma ijo? 'iavara.

³¹ Jesura eha vene ijá 'iama Ea ka'ene atama pa'ajija juketaija ura parenaura kaivo ea atakini-jipo juketaija ura renaura.

³² Na ea arira maa veji'inijihipuni parouta vo Na ea sisea ka'ene puni sisea vvhane temukavi'ini jihipuni routa 'iamana.

*'Aura Arevuji Rone Apovajina
(Matiu 9:14-17; Maka 2:8-22)*

³³ Ea 'ahopo Jesuho ijá 'wava Joni oni tisaiporu-jija na'ia kwinu kwino 'aura areme 'ee siporua 'oju'e Parasi puni tisaiporu ijija 'u'o ija'ina'e vejura kaivo Oni tisaiporu ijija 'iruma toa ma ijí ijura 'wavara.

³⁴ Jesura ijá 'iama Ja vvhajujaho ea ka'ene napasi nejuihipuni 'iruma vejujaho huni napuhija ka'ene ijí ki'iro roajivujijahija 'aura are-vura araka?

³⁵ 'Enakaivo vea ka'ene napasi neji'ina kajara ijí pu pu'úmo pahi'i kaivo ani va'akama'e pu iji'a 'aura arehuna 'iamana.

³⁶ Hu haa 'waramarena ijá 'iama Ea mai'o ateha maiu'ina isome sahasiji'i pasuhura. 'Enakaivo ija'ina'e ve'avajaho ateha kajija isome ani'ina rehuna.

³⁷ 'Ene vukú'o 'wainia maiu'ina 'eke hanuha sisa sahasa vaji veri'avajaho hanuha sisa sahasa kajaho napame 'wainia arihuna.

³⁸ 'Enakaivo 'wainia maiu'ina hanuha sisa maiu'ina vaji verivura.

³⁹ Ea 'wainia sahasa ijujaho 'wainia maiu'ina ura parenaura. Pu ijá 'warahuna Sahasijaho arerina 'wahuna 'iamana.

6

Sapatia Rone Apovajina (Matiu 12:1-8; Maka 2:23-28)

¹ Vei pini Sapati veijino Hu konesa juasi'a 'uraha va'eme Ħuni tisaiporua konesa tuame iji tanih'i'i 'inijaho ijara.

² 'E'eme Parasia 'aho'a ijá 'iava 'Ú ja iraka vene varapijara Sapati veijino pave'avarono 'warumajaho vejo? 'iavara.

³ Jesura eha vene ijá 'iama 'Ú ja Tevitira huni ehi pu'úmo matuvumakame iraka ka'ene vejajaho ja pataha hejare?

⁴ Hu Godoni sei va'e puretia ka'ene Godi vajahajaho 'eke huna i'ika'i 'aho'a ewhaha vajihana. 'Enavo ijaho tamana'omo ea mamaha pajura kaivo pirisitiepo pupusu ijura 'iamana.

5 'Ejume Hu ijá 'iama Ema Puni Harihijaho Sapatí huni Natohwa 'iamana.

*Ea Ija Ajuaravi'ina Vejume Maranajina
(Matiu 12:9-14; Maka 3:1-6)*

6 Na'ii pini Sapatí veijino Hu va'e Sinakoku vaji najahana. Éma pina ijí hinajaho huni ija mana'inijaho 'irivi'ina.

7 Sikuraipi 'ee Parasia Hu ea pina ijí Sapatia vea kajino veje marajakame nama'i 'ahiume nii vevirinavara.

8 'Enakaivo Hu pu raka ka'ene vwilijahajaho Hu kimarena ea ka'ene ija irivi'ina kajaho ijá 'wama 'Urine iki una'i roa 'wamana. 'Ejume hu 'urine ijino va'ana.

9 'Enarena Jesura pu ijá 'iama Na ja aporavu Joni tamanijaho Sapatí veijaho nú mamaa ve'eja ho sisea ve'eja? Ea ni'aji'eja ho ea 'anae kwa'ena? 'iamana.

10 Hu 'urine nami'i kaivo ea kwinu kwino kima apena vu'u va'ume irivi'inijaho ijá 'wama Oni ija nipima 'wamana. 'Ejume hu ija'ina'e vejume huni ija maranana.

11 Pu niho'o ajinavume pu hine Jesu iraka ka'ene vetihuniji 'wama apenojara.

*Jesura Apasorua Iropu Ropu No'o Pijihajina
(Matiu 10:1-4; Maka 3:13-19)*

12 Vea kajino Hu va'e huri'a 'ahi siporua 'o'i va'ana. Hu na'ia kajaho Godoni siporua hine 'o'eme vea nitumana.

13 Vea nituvumakavi'i Hu Huni tisaiporu 'umenaume rouma ea iropu ropu no'o iji pijiharena iha ihame Apasorua 'iamana.

14-16 Puni ihijaho
 Saimani ka'ene Pitana 'wavujaho
 'ee huni 'u'ua Enituruho
 'ee Jemisi ho
 'ee Joni ho
 'ee Piripu ho
 'ee Pataramiu ho
 'ee Matiu ho
 'ee Tomasi ho
 'ee Jemisi ka'ene Apiasi oni harihijaho
 'ee Saimani ka'ene Seratina 'wavujaho
 'ee Jutasi ka'ene Jemisi oni harihijaho
 'ee Jutasi Isikariati ka'ene Jesu nahamahunai-jina.

Jesura Kaukara Iraka'e Venajina
(Matiu 4:23-25)

17 Hu pu pu'úmo ariha roe amari namiji'i kivume Huni tisaiporu niho'o mapoka mapoka kajihija 'ee ea niho'o mapoka mapoka Jutia rori hijura 'ee Jerusaremi rori hijura 'ee ara ka'ene soha rori Taia 'ee Saitani roara.

18 Pu roajime Huni vu'a hene 'ee puni atama veje pa'are'amarono roara. 'Ene ea ka'ene 'avena sisea ajimal'inijija 'u'o roume Hu vejume maraniara.

19 'Ejumakame ea mapoka Huni haha 'una'iro vejara. Ijihuni maijaho Huni harura ni'ima'ura Huni vaji rena roe ea mapoka vejume maraniara.

Temara 'Ee Temuka
(Matiu 5:1-12)

20 Hu 'arohe Huni tisaiporu kivi'i aneja vene ijá 'iama Ja ea ka'ene pivusahujija ivi'a tea manamama. Ijihuni maijaho Godoni arijaho ivi'a jona'e renu.

21 'Ene ja ea ka'ene iviamaa matunavujaho ivi'a teamanamama. Ijihuni maijaho Godira veje ja tú'ahuna. 'Ene ja ea ka'ene niravujija ivi'a tea manamama. Ijihuni maijaho ja ijasahuna.

22 Ja Emaa Puni Harihijihuni hahi emaapo kima sename 'ee pataarorahe 'ee ira sisea namahe erapo ira sisea 'warame ja 'ararihie vu'a sisea ani ani'ina 'ee joni iha 'urihi'i sisea vwhaja ki'avajaho ja teamanamama.

23 Vea kajaho ja niho'o teamanama para'eje mari'uvil'i ohurikusaha. Ijihuni maijaho joni eha mamaa kahino Godoni ara akúpa 'ahi namu. Puni sahipo nijano poropetia ka'ene marako hijajija sise'i 'ahiaja'ina'e ja 'u'o sise'i 'ahihuna.

24 Ja ea ka'ene iviamaa uneunecha mapoka ani re'eju'e hijujaho niho'o sisea piunahuna. Ijihuni maijaho ja iviamaa hamí hihunijaho maho'o apeju.

25 Ja ea ka'ene iviamaa túavujaho niho'o sisea piunahuna. Ijihuni maijaho ja matunahuna. Ja iviamaa ea ka'ene hine ijasahujaho sisea piunahuna. Ijihuni maijaho ja chora hine niramuhuna.

26 Ja ea ka'ene iviamaa joni vu'a mamairu 'wavujaho sisea piunahuna. Ijihuni maijaho nitama puni sahipo niarerri ija'ina'e poropetia ka'ene ira'asinijija 'ahiara.

*Naka Oja Mihunijina
(Matiu 5:38-48; 7:12)*

²⁷ 'Enakaivo Na ja ea irahipo hejuji Na 'waravu. Joni naka oja mihe 'ee ea irahipo jaa'e senavujija hamī 'ahie

²⁸ 'ee ea ka'ene jaa'e siripa'avajija merajihe 'ee ea ka'ene ja sise'i 'ahi'ava jihipuni siporua 'o'avara.

²⁹ Ea pini a noa 'ahi tahijaha'e ka'amajaho maka'eje ropuna'a 'u'o 'ana'amana. Ea 'ahopo oni kositia ape'avajaho maki'ika'i oni setia 'u'o mi'amana.

³⁰ Ea irara uneunecha jarirave ka'amajaho ma'amana. 'Ene oni kukua'e ei pini ape'amajaho kú'o paape'i 'ahae 'wara'amana.

³¹ Ea 'ahopo jona'e vena'avarono ja ura renuja'ina'e ja ea 'ahopuna vena'avara.

³² Ja ea ka'ene jaa'e oja mihujiru oja mi'avajaho ja maa iraka vejare? Ijihuni maijaho ea sisea 'u'o ea ka'ene pu oja vajihujiru oja mihura.

³³ 'Ene ja ea ka'ene jaa'e hamī 'ahiujiru hamī 'ahi'avajaho ja iraka'e maa vejare? Ijihuni maijaho ea ka'ene sisea veji'ina 'u'o ija'ina'e vejura.

³⁴ 'Ene ja ea ka'ene eha vajihunijiru uneunecha vaja'avajaho ja iraka maa vejare? Niho'o maa pavenana. Ea ka'ene sisea veji'ina kú'o eha areri 'ekahuna vwhihaji'i ea ka'ene sisea veji'inijaho vajihura.

³⁵ 'Enakúne joni naka oja mihe 'ee pununa'i hamī vene 'ee eha 'ekahuna pavwhihaji'i vaji'avara. Ijihuni maijaho ja eha natohwa'e kahi akúpi 'ahi apene 'ee ja Godi ka'ene niho'o Ichuto Maijhuni harihija'e rehuna. Godiho ea

ka'ene Hu patea manavi'inijija 'ee ea ka'ene sisea ni'ima'ura veji'inijija hami 'ahiuna.

³⁶ Joni Omijara ea 'aho'a numiramu ja'ina'e ja ea 'aho'a numirahuna.

*Ea 'Aho'a Namahujina
(Matiu 7:1-5)*

³⁷ Ja ea 'aho'a panama'irakúne Godi ja panamahuna. Ja ea 'aho'a parona'irakúne Godi ja 'u'o parona'amana. Ea 'ahopuni sisea vwhiane are'irakúne Godira joni sisea vwhiana are'amana.

³⁸ Ja ea vaji'avajaho ja 'u'o vajihuna. Ja hami swara ve'avajaho areri ija'ina'e niho'o nipa nirisame tihitihivajame ajima roe ameurahe ar-ihil'ina'e ja vajihuna. Ja ea 'aho'a'e vajihua ja'ina'e ja 'u'o vajihuna 'iamana.

³⁹ 'Enarena Hu haa 'u'o ika'ina'e pu 'waramana. Ea ka'ene nia supavi'inijaho ea pina ka'ene nia supavi'inijaho areri ahema va'ena raka? Pu no'o areri ma'oa paarihuna raka?

⁴⁰ Sikuru pwea huni najahi'inijaho paasimuna. 'Enakaivo ea irara nahu'e henam kamarale'e ijil'a huni najahi'ina kajihu vare'ina renuna.

⁴¹ A iraka'e vene oni nia vaji taura ni'ima'ura ka'ene navujaho pakama 'wa'i kaivo vweu puni nia vaji taura ma'u'ua ka'ene namujaho kame 'waramo?

⁴² A 'unama ichá'inijino oni vwea ijá 'wa'ena Vwee veje na oni nia vaji taura ka'ene namujaho 'e'onavuma. 'Enakaivo vu oni nia vaji taura ka'ene namujaho a pakamo? A niho'o ira'asinakúne oni nia titi taura ni'ima'ura ka'ene

namujaho marako 'e'ona'i kaivo areri hami niri-areje iji'a vweu puni nia titi taura ka'ene namujaho 'wara'amana.

*Icha 'Ee Huni 'Ina
(Matiu 7:16-20; 12:33-35)*

⁴³ 'Enajihuna'e icha mamaijija mai'o 'ina sisea parejura. 'Ene icha siseijija mai'o 'ina mamaa parejura.

⁴⁴ 'Ene icha mapokakipo 'ina ka'ene rejujaho nú icha raka sa'inijija 'ina kaji kima hejura. Ja mataka 'wija 'ahi rena navu'e ja va'e mene roe ijure? Manu'a mitota 'ahi rena navu'e ja va'e mene ro ijura raka?

⁴⁵ Ea ka'ene oja mamai ijaho uneunecha maa puni oja vaji rena roe ajima arihura. 'Enakaivo ea siseijahija puni oja vaja sisea ka'ene namujiru roe ajima arihura. Ira vaja kakino raka ka'ene roa ajima arihujija puni oja vaji ichá'ina ka'ene navujipo roe ajima arihura.

*Ea No'o Ara Vejajina
(Matiu 7:24-27)*

⁴⁶ Ja iraka vene Natohwe Natohwe 'wi'i kaivo Nara raka ka'ene 'waravujaho pavejo?

⁴⁷ Ea ka'ene roe Nuni ira hena venujaho hu ea ichá'inijaho Na jaa'e najahuna.

⁴⁸ Hu areri ei ara'e venuja'ina. Hu mwe'a 'uma ariha va'u va'u muna 'ahi aneja vene tukeja kikisina samuna. Neha ni'ina pine sai natohwi hiramarena ara kajaho ninamana kaivo niho'o pavarimana. Ijihuni maijaho ara kajaho niho'o hami hamu muna 'ahi rena vejara.

49 'Enakaivo ea ka'ene Nuni ira henare'e pavenujaho areri ea ka'ene huni ara tukeja hami hami pasamuja'ina. 'Ena'omo vea ka'ene sai hirame ninamujaho ni'aha kwino 'aumuna. Niho'o majikari umatematu 'onana 'iamana.

7

*Jesura Romu Puni Natohwijihuni Pwea Vejume
Maranajina
(Matiu 8:5-13)*

1 Jesuho ijaho emaa 'waravume pa'arejumakavi'i 'urine Kapaniami va'ana.

2 'E'eme vea kajikano sorutia natohwijihuni pwea mamaijaho atama 'unama rena kwa'i 'ahauma venana.

3 Vea ka'ene hu hejume Jesuho rou 'wavuma hei'i hu Jua 'aho'a irechamiume roe Hu jarime 'warave vu'e huni pwea kaji veje mara'amarono irechamiume roara.

4 Pu Jesuni roe jarime ijá 'wava Eakaho nimaar nimaal'omo Ara hu ni'aja'ipisa A mamaa veja'a.

5 Hu ehu núna oja miharena huhuso Sinakoku núna venuhana 'wavara.

6 'Ejume Jesuho aneja vene pu pu'lúmo va'ana. Hu ara rori samatu'u re'eme ijí sorutia natohwa kajara napuhwaha 'aho'a irechamiume roara. Pura roe Hu ijá 'wava Natohwe haha paahina'amana. Ara nuni sei rohuna areria pana.

7 Ijihuni hahi na vwhajujaho na ea sisea'omo nara Oni vuhuna areria pana. Ara ma iraru 'warave nuni pwea kajaho maranama.

⁸ Na 'u'o harura rukina'omo sorutia 'aho'a nuni harura hari hijura. Nara ea 'aho'a ijá 'iavure Va'a! 'iavu'e pu va'ura. 'Ene pina Roa! 'wawu'e hu rouna. Na nuni pwea ka'ene kaukara veji'inijaho ike vena 'wawujaho hu venuna 'wama 'wamana.

⁹ Jesura ijí henajaho oja hwa'usahume aroma ea mapoka kajija ijá 'iama Eakara nimaar onuja'ina'e ike Isureri opuni kwaa vajakaho ea hua'ina papiunavuta 'iamana.

¹⁰ Ea ka'ene ona apena roa kajijahija sei 'unama vai'i kavajaho huni pwea ka'ene atami 'unamajaho nimaranana.

Jesura Amunijihuni Hariha Vejume 'Urinajina

¹¹ Ijihuni túna'ijino Jesuho ara iha Naini va'eme Huni tisaiporua 'ee ea mapoka pu pu'úmo va'ajivara.

¹² Hu ijí ara kajihuni vwichajiami va 'e'u'eme pu ea'e kwanana'i 'ahiume apena roara. Ijí ea ka'ene kwamajaho amuna pipuni hariha kwinuna'omo ijara kwavume ea mapoka pu pu'úmo roajivara.

¹³ 'Ejume vea ka'ene Natohwijara hu kama jaho Hu niho'o temuvume ijá 'wama Niramujaho arema 'wamana.

¹⁴ 'Enarame hu va'e ea ka'ene suhi mwavi'inijaho iji 'unavume ea ka'ene kima va'ajaho arema namijara. 'Ejume Hu ijá 'wama Kivasakera Na 'waravukúne 'urina! 'wamana.

¹⁵ 'Ejume ea ka'ene kwama kajaho kú'o 'urine asuma hiji'i vu'a 'waravume Hu apenapi kú'o oaha'e mahana.

¹⁶ Ea mapoka niho'o tea junavume pu Godiho ta'aroha ijá 'wava Núni vajakino poropetia ni'ima'ura núni roana 'ee Godiho ehwaha ura vet'i roana 'wavarara.

¹⁷ 'Ejume ike Huni pinana kajaho 'wama apene va'e Jutia useme 'ee ijí ara rora kajaho he para-jara.

*Joni Papitisita Oni 'Ona Apena Roara
(Matiu 11:2-19)*

¹⁸ Joni oni tisaiporuepo uneunecha mapoka ka'ene rejume pu kivajaho Joni ni'wara parajara.

¹⁹ 'Ejume Jonira huni tisaiporua no'ohe'i 'umenaume roume irechamiume Natohwiji apoma he'i va'ara. Pu va'e ijá 'wava 'Ú A ea ka'ene rohuna'e 'waruvajina ho nú ea pina'e sa'eja? 'wavarara.

²⁰ Pu roe Jesuho piuname apoma ijá 'wava Joni Papitisitara irechamúume nú apora'i 'ahúume roara. 'Ú A ea ka'ene Jonira rohuna'e 'warumajina ho nú ea pina 'ajahe hi'eja? 'wavarara.

²¹ Vea ijihā kajaho Hu ea mapoka vejume atama sonahie 'ee haha hianavi'ina vejume sonahie 'avena sisea siomahe 'ee ea mapoka vejume nia niriara.

²² 'Ejume Hu eha vene ijá 'iama 'Unama va'e uneka ka'ene ja kime 'ee hejajaho Joni 'wara'avara. Ea ka'ene nia supavi'ina nia niri'u'e 'ee irima'ina namina oju'e 'ee ea reporosia ruk-inia maraniu'e 'ee ataa pa'ana veju'e maraniu'e 'ee ea ka'ene kwamasahi'ina veju'e 'urina hiju'e 'ee Godoni vu'a mamaa ka'ene ea pivusahi'ina najahuji 'wara'avara.

²³ Ea irara Nuni hahijihuna'e paju'amajaho niho'o hu merajahi'ina 'iamana.

²⁴ Joni oni tisaiporu va'umakivi'i Hu Joni ronarena ea mapoka kajija 'waramana. Hu ijá 'iama Vea ka'ene ja nechi'i va'ajivajaho ja iraka'e ka'i va'are? 'Ú kurika asiasia 'anae varivarimuji ka'i va'are?

²⁵ Ja ijaho iraka'e ka'irono va'are? Ea pini uneunecha mamaa sama hija ka'i 'ahiume va'ara raka? Heha! Ea ka'ene ija'ina'e hijujija ateha mavarasa'ini same 'ee ara mamaa ka'ene kiniepo hijujino hijura.

²⁶ Ja ijino va'ajaho iraka'e ka'irono va'are? 'Ú poropetia kavare? Kaena. Na ja 'waravu. Hu poropetia asitaha hunanuna.

²⁷ Hua ronarena heha vaji ika'ina'e vejara. Heha! Na nuni 'ona oji'ina ranave hu mako Oni una'i va'e Oni 'unama amairi'ena 'úmana 'iamana.

²⁸ Na niho'o nimaa nimaa ja 'waravu Ea ka'ene napapo nahenaari vajijaho ei pini Joni asihuna areria pana. 'Enakaivo ea ka'ene iviamajai Godoni ari ma'u'ua renujara niho'o Joni asima paranuna 'iamana.

²⁹ Ea ka'ene takisia'e apeji'ina 'ee ea mapoka kajija Godoni 'unama mamaa aririji hene vejume Jonira ija 'unirame toa vaji samahaha.

³⁰ 'Enakaivo Parasia 'ee roia Godoni maiji pataarohume Joniho toa pasamana.

³¹ Jesu ijá 'iama 'Ú Na ea ka'ene iviamaa urijak-ihija iraki manura vene pu ea ichá'inijaho ki'ejo?

³² Pu areri sesamaapo maketi vaji hine uma'aravi'i hijuja'ina. Pu ijá 'umejure Nú

hurisia jona'e hwasihajaho ja pajavavara. Nú virisia vejura kaivo ja paniravura.

³³ Joni Papitisita roe 'iruma 'aura areme 'ee toa kisina pajume ja kame ijá 'wava 'Avena sisei ajimana 'wavara.

³⁴ 'Ejume Emaa Puni Hariha roe 'iruma ine 'ee toa iju'e ja ijá 'wavo Ea ike kaha. Hu 'iruma huhuso maha puna'i ine 'ee toa kisina mapoka ina nanamuna 'ee ea ka'ene takisia'e apeji'inijija 'ee ea sisesa pu'umo napura venuna 'wavu.

³⁵ Na nimaan nimaan'e vwihanare'i 'waravu. Ea ka'ene hena vwiha rukinijija pura ichá'ina vejura najahujaho pu hena kavi'ina 'iamana.

Jesura Saimani Ka'ene Parasi Ijihuni Sei Hinajina

³⁶ 'Enakaivo Parasia pini Hu va'e huni sei 'iruma i'amaroni 'wamana. 'Ejume Hu Parasi ijihuni sei 'iruma i'i 'ahaume va'e asuma hinana.

³⁷ Ijí ara natohwa vaja kajino napara pina sisea veji'i hinuna. Hu hejume Jesuho roe Parasia kajihuni sei 'iruma inu 'wavume henarena senisia kavapwa rukina apene roana.

³⁸ 'Ene roe Jesuni túna'i mumora rora Hunijino namine niravi'i Huni mumora 'aha huni nitua ariha 'aruvume huni húmata sapasa kajikano ijaho ukunahi'i Huni mumora tituhi'i senisia 'onahana.

³⁹ 'Ejume Parasia ka'ene Jesuni ona vejume roajara kamarena ijá rona Eakaho poropetia re'ipisa Hu naparakaho irane 'ee ea ichá'inijara Hu 'unamujaho hena kava'a. Ijihuni maijaho hu ea sisea veji'ina ronana.

⁴⁰ Jesura ijá 'wama Saimani Na ura unenu'u pina a 'wara'i 'ahiu 'wamana. 'Ejume hu ijá 'wama Najahi'ine 'warima 'wamana.

⁴¹ Jesura ijá 'wama Ea no'ohe'i ea monia'e vajih'i'ini jihuni monia 'ekara. Ea pina monia mapoka (K100) 'ekume 'ee pina monia mapoka (K10) 'ekana.

⁴² Pu no'o ijí monia kajaho eha areria pave-nahume hu pu ni'ajihe 'waravume pu eha pava-jahara. 'Ú ea iraka sa'inijara hu oja nih'o natohw'a'e mahane? 'wamana.

⁴³ Saimanira eha vene ijá 'wama Na vvi-hujahajo ea ka'ene monia natohw'a'e 'ekajarana 'wamana. 'Ejume Hu ijá 'wama Oni eha ijaho nimaa 'wamana.

⁴⁴ 'Ejume Hu aroma napara kaji kavi'i Saimani ijá 'wama 'Ú a naparakaho nikamo? Na oni sei routa vo a Nuni mumora kehuni toa pamihana kaivo hu huni nitui Nuni mumora some 'ee huni húmatá sapasi Nuni mumora sirua ukunana.

⁴⁵ A Na pa'ajorime ura manura veniana kaivo Na iki rouji rene hu hine Nuni mumora tituhi'i hinana.

⁴⁶ A senisia paapena Nuni húmatakaho onihana kaivo hu Nuni momora senisi'i 'onihana.

⁴⁷ Na nimaa nimaa 'waravo Huni sisea mapok-ijaho nih'o vvihajume pa'arenana. Ijihuna'e hu Na oja natohw'a'e mihana. Ea irahuni sisea ma'uako pa'arenajaho hu ma'uaku'wi oja mi-huna 'wamana.

⁴⁸ 'Ejume Jesura napara kajaho ijá 'wama Oni sisea vvihane arevu 'wamana.

⁴⁹ 'Ejume ea 'aho'a ka'ene ijí asuma hija kajipo kosarame ijá 'wava Eakaho irana'omo sisea 'u'o

vwiuhane aremo? 'wavara.

⁵⁰ 'Enakaivo Jesura napara kajaho ijá 'wama Ara nimaā ronujara vejume maranaanakúne matauma va'a 'wamana.

8

Napara Ka'ene Jesui Pu'úmo Va'ajina

¹ Na'ii pini Hu ara mama'ina 'ee ara ma'u'umaa kajino 'urahe oji'i Godoni vu'a maa maiu'ina ka'ene Godoni ariji huni vu'a najahana. Huni tisaiporu iropu ropu no'o pu pu'úmo va'ara.

² Napara 'aho'a ka'ene 'avena sisea ajimahi'ina 'ee 'aho'a puni atama vejume marani'inijihi pu'úmo va'ara. Meri ka'ene Matarinina 'wavujihuni haha 'aha kajino 'avena sisea iropu no'o hi'eme siomahana.

³ 'Ene Chusa ka'ene Heroti oni kukua 'ajohi'ini jihuni napara Joanaho 'ee Susana 'ee napara 'aho'a kajipuhipo puni monijikano pu ni'ajihara.

'Ina 'Oji'inijihuni Haa (Matiu 13:1-9; Maka 4:1-9)

⁴ Ea mapoka ara 'oi'oi vaji roe Hu ka'i 'ahiu'e roajivume Hu haa ika'ina'e 'waramana.

⁵ Ea pina huni 'ina 'o'i 'ahaume va'ana. Hu 'ina kajaho ato'aruvume 'aho'a arihe 'unamutoi navume emaapo tautiume 'ee 'aho'a ukapo roe ijara.

⁶ 'Aho'a muna 'ahi arihara 'ee pu riama ajivara kaivo sirua pa'ajihuna'e sarasahara.

⁷ 'Aho'a ija sisea oma rukina vaji arihe riavara kaivo ija kajara 'urine raurihume pamarasahara.

⁸ 'Enakaivo 'aho'a mwe'a mavarasa'ina 'ahi arihe riame maa mapoka mapoka'e (100) re-jara 'iamana. 'Ee Hu ijá 'iama ja ataa rukina re'avajaho heha 'iamana.

*Haa Kajihuni Maijina
(Matiu 13:10-17; Maka 4:10-12)*

⁹ 'Ejume Huni tisaiporu apoma ijá 'wava Ike haa ikehuni maijaho iraka'e rona 'warumo? 'wavara.

¹⁰ 'Ejume Hu ijá 'iama Godoni ira ka'ene vaji namujaho ja samaumai 'waravu'e ja hena kavu kaivo ea 'aho'akija hai 'waravu'e ijihuni maijaho pahena pakavu.

*Jesura Ina Oji'inijihuni Haiji Nahama
Waramajina
(Matiu 13:18-23; Maka 4:13-20)*

¹¹ Ike haa ikehuni maijaho ikena. 'Inijaho Godoni Irakena.

¹² 'Ina ka'ene 'unamutoi arihajihuni maijaho ea pu Godoni ira heju kaivo 'avena siseijara roare'e ijí vu'a kajaho oja vaja puna kajino 'etijiha va'una. Vejuro'i pu

Noinnimaa roje Godira pu ni'aji'amarono avanuna.

¹³ 'Ina ka'ene muna 'ahi arihajihuni maijaho ea Godoni ira hene teamana'eju'e apejura kaivo ira kajaho mai'o hamia oja vaja puna chinuma pasamuna. Pu ma'uako nimaarojura kaivo vea ka'ene sisei puni haha 'ahi renujaho pu marako rana va'ura.

¹⁴ 'Ina ka'ene ija sisea oma rukina vaji arihajihuni maijaho ea Godoni ira hejura kaivo puni

temuka vwhane 'ee uneunecha 'ee monia'e vwhane 'ee temarijara rareju'e pataarohura. 'Eju'e puni 'ina renuna vo mai'o patuvura.

¹⁵ 'Ina ka'ene mwe'a mamai arihajihuni maijaho ea Godoni ira hene puni oja vaji irechavukame pu hina vena apena va'u va'u'e va'e pu 'ina niho'o maa rejura.

*Naheha Si'uara Hari Namajina
(Maka 4:21-25)*

¹⁶ Ea mai'o ira 'ene si'uara vaji paapúrinanavura 'aho puni suha harijino ranavu'e namuna kaivo Hu ira kajaho ira'e irechavu'e navujino navukame pu ea ijino kavi'i roajivura.

¹⁷ 'Ene unenu'u pina apúrinanavu'e namujaho roe samaahirahuna 'ee unenu'u pini hemi nave pakahuna kaivo mapoka kajija samaahirave ki-huna.

¹⁸ 'Enakúne hamि heha! Ea irara mapoka rukina'e re'amajaho kú'o mapoka huri vajahuna. 'Enakaivo ea irara pa'ana'e re'amajaho huna ka'ene ma'uako navujaho 'etujahuna 'ee kukua 'aho'a 'eka'iro vwhaji'i hi'amajaho 'etujahuna.

*Jesuni Oha 'Ee 'U'uhija
(Matiu 12:46-50; Maka 3:31-35)*

¹⁹ Huni oha 'ee 'u'uhwaha roara ka'i ea niho'o ani rejumakame pu paroe Huni roara.

²⁰ Ea 'ahopo Hu ijá 'wava Ohuna 'ee 'u'uhuana kameho ma'ahi Aa'e ka'irono 'úvi'i namiju 'wavara.

²¹ Hu eha vene ijá 'iama Nuni oha 'ee Noin'u'uhija ea ka'ene Godoni ira hene veji'inijina 'iamana.

*Jesura Puura'e 'Waravume Ajuaranajina
(Matiu 8:23-27; Maka 4:35-41)*

²² Na'ii pini Hu Huni tisaiporu pu'úmo sisima 'ahi ajima ijá 'iama Roe ja pu'úmo kara'ahuni va'a 'iavume pu aneja vene va'ara.

²³ Pu va'ají'eme Hu ariha va'e sisima vaji nenana. 'E'eme puura natohwa ijí soha 'aha kajino hiramarena soha kajara ameurahe sisima vaji ariharena itu'o'iro 'ahaume vejumakame pu niho'o vahuna areri parenana.

²⁴ 'Ejume pu 'urina va'e Hu sae ijá 'wava Natohwe! Natohwe! Nú nikwamassa'i veju 'wavara. 'Ejume Hu 'urine puura kajaho 'urarahume areme 'ee soha ka'ene amenajaho pa'are'eme soha kajaho niho'o mavarasa renana.

²⁵ 'Enarena Hu pu ijá 'iama 'Ú jara nima rojujaho ichine 'iamana kaivo pu niho'o oja hwa'usahe tea junavume aposarame ijá 'wava 'Ú ikaho Ea irane? Hu puura 'ee soha 'u'o 'waravu'e Huni ira hene veju 'wavara.

*Jesura Ea 'Avena Siseapo Rosavaji Siomahana
(Matiu 8:28-34; Maka 5:1-20)*

²⁶ 'Enareja pu va'e Kekasinisi puni kwai Karari ropuna'i va'ara.

²⁷ Hu karino amari varihajaho ara kaji'ura ea pina 'avena sisei 'aha jora ajivil'ina piunamana. Hu vwiha pa'a 'uraha one 'ee ara pahinuna vo va'e euchi hinonuna.

²⁸ 'Ena'omo vea ka'ene Jesu kamajaho hu 'ona arihe mwe'a 'ahi Huni una'i ninavi'i ira ajira ijá 'umena Jesu ka'ene Godi niho'o Natohwijihuni Harihakera A na ichá'ina 'ahi'iro ura reao?

Na A jariravukúne paruarihe sise'i 'ahi'amana 'umenana.

²⁹ Hu ija'ina 'warama jihuni maijaho Jesura 'avena sisea ka'ene huni haha vaji hijajaho 'ejahie ariha 'iamana. Na'ia mapoka'e ea kajaho jihev'u'ukame ea 'aho'a hu apene kamome ranavu'e namuna kaivo hu 'urine senia kajaho turame irecha'ika'i nechi'i va'una.

³⁰ Jesura apoma ijá 'wama Oni iha irane 'wavume hu ijá 'wama Nuni iha Mapoka 'wamana. Ijihuni maijaho 'avena sisea mapoka'e hua ajivara.

³¹ Ijí 'avena sisea kajipo Hu jarimaa ijá 'wava Paato'arumu'e nú ma'oa vaji va'avara 'wavara.

³² Maha mapoka'e puni rori hareha 'aha kajino 'iruma ine 'urahojara'omo ijí 'avena sisea kajipo Hu jarimaa ijá 'wava Nú irechamúe kare maha karehi súmaha 'wavara. 'Ejume Hu pu irechami-ume va'ara.

³³ 'Ejume 'avena sisea kajija useme maha kajijipuni vaji va'ume maha kajija hareha 'aha kajino ninukujaha va'e rarahi arihe úi imwasami-ume kwamasahara.

³⁴ Ea ka'ene ijí maha 'ajoha hija kajipo uneka ka'ene rena kaji kamareja va'ajime ea ka'ene ari hijujija 'warame 'ee ea ka'ene ijino rori hinojajija 'u'o 'waravara.

³⁵ Ea mapoka Hura raka ka'ene vejume renaji ka'i 'ahiume va'ajivara. 'Ejume pu roi'i kavu'e ea ka'ene 'avena sisei súmahil'inaka Jesura vejume maranajaho Jesuni mumora rora kajino vwiha irame asuma mavarasa'ina'e hijume pu ijí kavajihuna'e tea junamana.

³⁶ Ea ka'ene 'avena sisei ajivi'iniji vejume

maranaji kavajipo ea mapokijija 'waravara.

³⁷ Kekasinisi ora ea mapoka kajija tea ju-navume Hu va'amarono 'waravara. 'Ejume Hu sisima 'ahi ajima toa ropuna'i 'unama va'ana.

³⁸ 'Ejume ea ka'ene Hu vejume 'avena sisea usevajara Hu hu'úmo va'i 'ahaume jarima ijá 'wama 'Wariate na A hu'úmo vu'uma 'wamana kaivo Jesura hu raname ijá 'wama

³⁹ 'Unama ari va'e Godira iraka ka'ene a vetaaji ea 'wara'amana 'wamana. 'Ejume ea kajaho ara mama'ina mapoka vaja kajino va'e Jesura iraka ka'ene hua'e vetiajaho 'waramana.

Jairasi Oni 'Apaja 'Ee Napari Jesuni Ateha 'Unamajina

(Matiu 9:18-26; Maka 5:21-43)

⁴⁰ 'E'eme Jesuho toa 'ona kara'i va 'e'ujume ea mapoka ka'ene ijí Hua'e 'ajaha hijajipo Hu 'ajovara.

⁴¹⁻⁴² 'E'eme heha! Ea pina Jairasina 'wavura. Hu Sinakoku 'ajohi'ina natohwa'omo roe ijí 'e'unana. 'Ene hu mwe'i 'ona arihe Jesuni mumora rori navi'i jarime ijá 'wama Nuni 'apaja juara huni iropu ropu no'ona vo kwa'i venukúne nuni sei roe veje maranama 'wamana. Jesuho va'eju'e ea mapoka Huni rora kajaho ani rejara.

⁴³ 'E'eme napara pina juara iropu ropu no'o 'ai vurajukame hu va'e juketa puni na'ia mapoka amairiahura kaivo hu pamaranuna. Hu monia mapoka 'úsia 'imenuna kaivo venahujaho pamanuna.

⁴⁴ Hu ea vaja kajino Huni túna'i rou va'o Huni ateha 'unavume huni 'aa ka'ene vuramajaho ni'aha kwino pa'arenana.

45 Jesura ijá 'iama Ea irara Na vwenimane? 'iavume pu ea mapoka'e hevara. 'Ejume Pitara ijá 'wama Natohwe ea mapoka Oni rori ani reju-jihuna'e puruva renu 'wamana.

46 'Enakaivo Jesura ijá 'iama Oo ea pini Na vwenimana. Ijihuni maijaho Nuni harura va 'e'unu 'iamana.

47 Napara kajaho nikavuma kimareme tatovi'i roe Jesuni una'i ariha ninamana. 'Ejume ijí ea rira kajino nahame irakijihuna'e Hu vve-vumakame ichá'ina'e ni'aha kwinu maranajaho nahama 'waramana.

48 'Ejume Hu ijá 'wama Nuni 'apaje ara nimaa ronujara vejume maranaana. 'Enakúne matauma va'a 'wamana.

49 Hu ijí hine 'wara'eme ea pina Sinakoku 'ajohi'ini jihuni sei rene ro ijá 'wama A hine Najuhi'ina apene iha vetiuna arema. Oni 'apaja nikwamanakúna 'wamana.

50 'Enakaivo Jesura ijí henarena Jairasi ijá 'wama Jumujahe are'i kaivo nimaa rojakame oni 'apaja mara'ena 'wamana.

51 Pu va ijí usemareja Hu sea vaji va'i 'ahaume ea 'aho'a tanurihume pu vaja pava'ara ka'i Pita ho Jemisi ho Joni ho 'ee huni oma 'ee oaha ijano 'waravume vaji va'ara.

52 Ea ka'ene ijino hijajaho chora hiji'i niramaruvara. 'Ejume Jesura ea kajija ijá 'iama Niramaruvujaho areha. Napaiseakahoh mai'o pakwamana kaivo manenukúna 'iamana.

53 Pu Hu niho'o apena 'ijahara. Ijihuni maijaho pu hena kavajaho hu nikwama jihuna'e pu Hu 'ijahara.

54 'Enakaivo Jesura Huni ija kajino 'unama apene 'uriyi'i ijá 'umena Napaisekera 'urina 'umenana.

55 Huni 'avena kú'o 'unama roume hu ni'aha kwino 'urijume Jesura ijá 'iama 'Iruma vajaha 'iamana.

56 Huni oha 'ee oma nihō'o oja hianavara kaivo Jesura ea 'aho'a iraka ka'ene renajaho pa'warahuna'e 'waramana.

9

Jesura Tisaiporua Iropu Ropu No'o Irechamiume Usema Va'ajina

(Matiu 10:5-15; Maka 6:7-13)

1 Hu Huni tisaiporu 'umenaume harura ka'ene 'avena sisea siomahuna 'ee atama'e veje sonahi-hunijaho mihana.

2 'Enarena Hu irechamiume pu va'le Godoni arijihuni maijaho ea mapoka'e ea 'aho'a najahe ea atama rukiniji veje sonahi'avarono va'ajivara.

3 Jesura ijá 'iama Ja va'aji'avajaho uneunecha pa'eka va'vara. Pijuha ka'ene pijumojujaho pa'eka'avare joni tuja pa'eka'avare joni 'iruma pa'eka'avare joni monia pa'eka'avare 'ee setia 'aho'a pa'eka'avara.

4 Ja va'aji'eje ea irahipo ja hami 'ajorave ki'avajaho puni sea kajiru hinuva'o ara kajaho are'i kaivo 'urine ara pini va'vara.

5 'Enakaivo ea irahipo ja pa'ajorame vu'akake pahe'avajaho ara kajaho are'i kaivo joni mumora 'ahi túa ka'ene navujaho taireve ari'amana. 'Ejakame ijara pu namahuna 'iamana.

6 Pu arename va'ajime arara kajino Godoni Ira mamaa kaji najahe 'ee ea atama 'uniravi'inijijahija vejume maraniara.

*Heroti Puruva Retiajina
(Matiu 14:1-12; Maka 6:14-29)*

7 Heroti ka'ene 'ajohna'inijara uneka ka'ene renuji henajaho ea 'ahopo ijá 'wava Joni kú'o 'urinana 'wavuma henarena hu puruva reju-makame niho'o jumana.

8 Ea 'aho'a ijá 'wavare Iraiha kú'o 'unama roana 'wavume 'aho'a ijá 'wava Poropeti nitama 'waravi'inijara kú'o 'urina roana 'wavara.

9 Herotira ijá 'iama Nara Joni oni húmata ahatumahuta kaivo Ea ka'ene iviamaa pinana 'uriyu'e na hejukaho irarane? 'iamana. 'Enarena hu Jesu ka'i 'ahau'e niri'i hinuna.

*Jesura Ea Mapoka (5,000) Tuasamahajina
(Matiu 14:13-21; Maka 6:30-44; Joni 6:1-14)*

10 'Enarena apasoru 'unama roe Jesu pura raka ka'ene vejajaho 'waravara. 'Ejume Hu pu aherame ara ka'ene Petasaita 'wavujino pu pusumano va'ajivara.

11 'Ejumakame ea mapoka kajipo henareja pu 'ararihia va'ajivara. Hu pu 'ajorame 'ee aneja vene Godoni arijihuni vu'a 'warame 'ee ea ka'ene venae maranihuna ura renajija vejume maraniara.

12 Vea va'o'irono ve'eme Huni ea iropu ropu no'o roe ijá 'wava Ea ikija irechamie arara ijino va'e 'iruma sarame ine 'ee notua. Ijihuni maijaho ike kwaakahao savasakúna 'wavara.

¹³ 'Enakavi'i Jesura ijá 'iama Jara 'iruma vajihe ija 'iamana. Pu eha vene ijá 'wava Nú kija no'one 'ee puretia iropu ijano navu. A ura rena'amajaho nú va'e 'iruma 'imene roe ea kija vajihe ija 'wavara.

¹⁴ Parua niho'o mapoka mapoka'e (5,000) hijara. Hu Huni tisaiporu ijá 'iama 'Warave pu nia ani ani ea mapoka (50) ruha pini hije vu ruha pini ea mapoka (50) hina apena va'a 'iamana.

¹⁵ Huni tisaiporu Hura 'warama ja'ina'e vene 'waravume pu asuma hijara.

¹⁶ Jesura puretia iropune kija no'o 'eke akúpi 'ahi nia niri'i Godiho teamani 'wa'i kaivo tuachame Huni tisaiporua vajihume pu 'eke ea kaji vajihara.

¹⁷ Pu ijume tú'amana. 'Ejume pu pwina ka'ene tú'avume irechavajaho tuja iropu ropu no'o 'eke vejume itu'usahara.

*Pitara Jesu Rona 'Waramajina
(Matiu 16:13-19; Maka 8:27-29)*

¹⁸ Na'ii pini Jesuho huhusu Huni tisaiporua pu'úmo hine siporua 'onana. 'Enuva'o Hu pu aporama ijá 'iama Ja vwilijahujaho ea mapokakija Na ea irana 'wavure? 'iamana.

¹⁹ Pu Hu ijá 'wava Ea 'aho'a A Joni Papitisitana 'wavume ea 'aho'a A Iraiijana 'wavu'e ea 'aho'a A poropetia nitama hijajipo kú'o 'urine hinu 'wavura 'wavara.

²⁰ 'Enakaivo Hu pu aporama ijá 'iama Ja ichá'ina vwilijaho? Ja Na irana rojo 'iamana. Pitara ijá 'wama A Keriso ka'ene Godoni rena roajina 'wamana.

*Jesura Ahia Apene 'Ee Kwahuniji Rone
'Waramajina*

(*Matiu 16:20-28; Maka 8:30-9:1*)

²¹ 'Ejume Hu rurame ea pa'wara'avarono 'waramana.

²² Hu pu ijá 'iama Ema Puni Harihijaho ea mama'ina 'ee Sikuraipia epo veje haha ni'ima'ura hiame 'ee pu pataaro'eja. 'Ene pu Hu 'anae kwame na'ia no'opisu namareje kú'o 'urihuna 'iamana.

²³ 'Enarena Hu pu ijá 'iama Ea irara Nuni túna'i ro'i ve'amajaho hu huni oja makame mwe'a kakino huni uneunecha mapoka maki'i kaivo hu huni korosia apene Nuni túna'i ro'amana.

²⁴ Ea irara huni hiji ori ni'ajara'amajaho huni hijaho ranahuna. 'Ene ea irara huni hiji Nunijihuna'e Godoni vu'a mai maiu'ini jihuna'e rana'amajaho hu huni hia 'unanahuna.

²⁵ Ei pini uneunecha ka'ene mwe'aka ke-hunijaho huna rerana'eje hia nimaa nimai ijí asina'ipisa hu maa iraka apeja'e?

²⁶ Ea irara Nunijihuna'e Na pataarorihe 'ee Nuni ira pataaro'amajaho vea ka'ene Emaa Puni Harihijara Huni harura 'ee 'ona oji'ina arira majihipuni harura 'ee Amoni harura vaji ro'amajaho hu 'u'o pataarohuna.

²⁷ Na nimaa nimaa ja 'waravu. Ea ka'ene ja ike namijukija 'aho'a mai'o pakwamasa'eje Godoni Ara roe kahuna 'iamana.

Ta'arohe Ani'ina Renajina

(*Matiu 17:1-8; Maka 9:2-8*)

²⁸ Hura 'waramajaho na'ia iropu no'opisu pa'are'eme Jesura Pita ho Joni ho 'ee Jemisi ho

ijano aherame huri'a 'ahi siporua'e 'o'i 'ahaume va'ana.

²⁹ Hu hine siporua'e 'o'eme Huni niura niho'o ta'arohe ani'ina rene 'ee Huni ateha niho'o sa-jasa'ina'e 'ee hanaji'ina'e renana.

³⁰ Ni'aha kwino ea no'ohe'i pu pu'úmo namine vu'a 'wavara. Ea kajija Iraiija'o Mosisi una.

³¹ Pu niho'o hanana para'eme namine Hu hu'úmo Hura raka ka'ene mai'o Jerusaremi venareje vahunijihuni vu'a 'wavara.

³² Pita ho napuhwa pu'úmo nii vahivume notu-ara'omo 'urine nia niriuni'eme Huni hanaji'ina 'ee ea no'ohe'i pu pu'úmo namijajija kivara.

³³ Ea kajija Hu raname va'eju'e Pitara Je-suho ijá 'wama Natohwe nú mamaa vena ro hijara. Nú ara vene pina One pina Mosisi one pina Iraiija ona'e vehuna 'wamana. 'Enakaivo hu nimaa raka ka'ene 'waramajaho pavwihami'i 'waramana.

³⁴ Hu ijí 'wara'eme 'imiti puni huri saturihume Huni pwehija niho'o tea junamana.

³⁵ 'E'eme ijí 'imitia vaja kajino ira rena rouma he'eme ijá 'iama Ikaho Nuni Hariha ka'ene Nara iji pijahujinakúne Huni ira he'avara 'iamana.

³⁶ 'E'eme vu'a ka'ene hejajaho pa'are'eme Je-suho Huhusu ijí naminana. Ijihuna'e pu irano'a areme ira parasahareja uneka ka'ene vea kajino pu kavajaho ea 'aho'a pa'waravara.

Jesura Paruisea 'Avena Sisei Rosamaji Vejume Maranajina

(Matiu 17:14-18; Maka 9:14-27)

³⁷ Ijihuni sú'uha kajino huri'a are'i kaivo arihe ro'eme ea mapoka kajipo roe Hu piunavara.

³⁸ Heha! Ea pina ea rira kajino namine ijá 'umena Najuhi'ine na A jariravukúne nuni harihá ike kama. Hu nuni hariha nikwinu'wina.

³⁹ Ike kama! 'Avena sisei kajara ajivu'e emaavaji'i 'unama apene onavu'e mwe'i 'one kuchikuchivi'i ira sapa anि re'eju'e namuna. Hu majamano veju'e hu hiamuna kaivo na'ia kwinu kwino paajima rurahuna.

⁴⁰ Na Oni tisaiporua jarirame pura veje use'avarono 'waravura kaivo pu areri pavejara 'wamana.

⁴¹ Jesura eha vene ijá 'iama Panimaa roji'ina ka'ene ea sisemaakije panimaa rojo? Na na'ia icharu ja pu'úmo hi'ejo? 'Ene Na na'ia icharu ja najaha apene va'ejo? 'iamana. 'E'ikaivo vu iji'a ea kajaho ijá 'wama Oni hariha ikino ahema roa 'wamana.

⁴² Hu sesamaa kajaho ro'eme 'avena sisea kajara 'anaa pi'onavume mwe'i 'one kuchikuchimana. 'Ejume Jesura 'avena sisea kajaho 'waravume 'ariha va'ume sesamaa kajaho marajumakavi'i omaha mahana.

*Jesura Kwahuniji Kú'o Nahama 'Waramajina
(Matiu 17:22-23; Maka 9:30-32)*

⁴³ Ea kajipo ijí Godoni harura natohwa kaji kavajaho oja hwa'usahana. Pu ea mapoka ijí Hura uneunechaka mapoka ka'ene venaji kamareja oja hwa'usaha'eme Hu Huni tisaiporua ijá 'iama

⁴⁴ Nara 'waravujaho niho'o parunami'avara. Emaa Puni Hariha apena ea 'ahopuni ija tahi ranahuna 'iamana.

Ruku 9:45

liv

Ruku 9:52

45 'Enakaivo Hura 'warama jihuni maijaho mai'o pahejara. Pura hehunijaho vaji namujara juvumakame pu pahejara. 'Enakaivo pu tea junavume paapovara.

Irara Natohwane?
(Matiu 18:1-5; Maka 9:33-37)

46 'Enarena Huni tisaiporu puni vaja kajaho ea irara ni'ina 'wamareja hine nakaravara.

47 Jesura pu iraka ka'ene vwhajujaho kimarena sesamaa pina apena roe Huni rori ranavume nami'eme ijá 'iama

48 Ei pini Nunijihuna'e sesamaa ikera'ina hamí 'aha'amajaho hu Naa'e hamí 'ahihuna. 'Ene ea irara Naa'e hamí 'ahi'amajaho Godi ka'ene Naa'e ranamiume rouji 'ajome hamí 'ahaa avahuna. Ea irara ma'u'ua rena joni vajakino hi'amajara ea natohwa rehuna 'iamana.

Ea Irara Ja Pu'úmo Paninakaramujaho Jona
(Maka 9:38-40)

49 Jonira eha vena ijá 'wama Natohwe nú ka'eme ea pina Oni ihi 'urahi'i 'avena sisea siomahume nú hu are'amarono 'waravara. Ijihuni maijaho hu nú pu'úmo pa'urahe onuna 'wamana.

50 Jesura hu ijá 'wama Ja pakileje tanu'ura'ava. Ijihuni maijaho ea irara ja pu'úmo paninakaramujaho hu ja pu'úmo renuna 'wamana.

Sameria Vaji Ara Pini Jesu Pataarohajina

51 Hura vahuni vea nitura'eme 'urine aneja vene Jerusaremi vahuna vwhajii hinana.

52 Hu ijí va'amarono ea nimako irechamiume pu va'e Sameria opuni ari uneunecha 'eke amairi'irono va'ajivara.

⁵³ 'Enakaivo ara kaji'urijija pataarohara. Iji-huni maijaho Hu Jerusaremi va'ujihuna'e pu pataarohara.

⁵⁴ 'Ejume pu ijí kamareja Huni tisaiporu Jemisi'o Joni'o ijá 'wava Natohwe A ura rena'amajaho nú 'warave vena kahi akúpa 'ahi rena ariha roe pu rena'ena 'wavara.

⁵⁵ 'Ejume Hu aromakivi'i pu 'uraraha ijá 'iama 'Avena iraka sa'inijara avanujaho ja mai'o pa-hena pakavu?

⁵⁶ Ijihuni maijaho Ema Puni Harihijara roajaho emaa puni hia patiraku'i 'ahaume roana kaivo emaa'e ni'aji'i roana 'iamana. 'Enareja pu ari pini va'ara.

*Jesu Pa'arariha'iro 'Unama Savujina
(Matiu 8:19-22)*

⁵⁷ 'Ejume pu 'unama toi va'eme ea pini Jesu ijá 'wama Kwaa ichihichihi va'amajaho na A hu'úmo vuuhuna 'wamana.

⁵⁸ 'Ejume Jesura ijá 'wama Achi'a mwe'i vaji ahejure 'ee uka nesa rukina kaivo Ema Puni Harihijara ruha ka'ene nene 'ee siheria vena hihuna pa'ana 'wamana.

⁵⁹ 'Ejume Hu ei pina ijá 'wama 'Ararihie roa 'wamana. 'Enakaivo hu ijá 'wama Natohwe ijinakúne asinamie na marako va'e nuni oma apene kwananavuma 'wamana.

⁶⁰ 'Enakaivo Hu ijá 'wama Ea ka'ene kwavi'ina kajaho maka'eje kwamasahuna kajipo apena va'e ranava kaivo a va'e Godoni arijihuni vu'a ea 'aho'a 'wara'amana 'wamana.

61 'Ejume ea pina 'u'o ijá 'wama Natohwe na 'arariha'ejakúne 'wive na va'e kachihu nuna marako'a 'ajorame rouma 'wamana.

62 'Ejume Jesura ijá 'wama Ea irahipo aneja vene juara meji'i hine majamano aroma niriujija niho'o Godoni 'unamijino vahuna areri pana 'wamana.

10

Jesura Ea Mapoka Irechamiume Va'ajina

1 Ijihuni túna'lí Natohwijara ea mapoka mapoka (70) iji pijihe ea no'o no'o irechamiume pu urasahe Hura ara 'ee kwaa ka'ene rohunijino va'ajivara.

2 Hu pu ijá 'iama 'Iruma mapoka marana navu kaivo ea ka'ene ijihi 'eke ahuma usehunijaho niho'o kwinu kwinuna. 'Enajihuna'e ja Natohwa ka'ene 'iruma anesuri jihuni siporua 'ojakame Hura ea 'aho'a irechamie ijí 'iruma kaji 'eka ahuma use'avara.

3 Heha! Va'ajihā! Na ja irechamiujaho areri sipia 'u'ua 'uanea puni vaji irechamiu ja'ina'e irechamiu.

4 Ja pausia pa'eke tuja pa'eke mumora hwana pa'eke 'ee ea 'unamutoa pa'ajora'avara.

5 Ja va'ajime ea 'ahopuni sei va'avajaho maraku'a 'ajorame ijá 'i'avara Matauvī'inijaho seikino ja pu'úmo na'amana.

6 Ea ka'ene sea kajino hinujaho matauma hijujaho oja mahi'ina'e re'amajaho ara 'u'o matauma hihuna ka'ene 'ajomajaho makave ijino hu hu'úmo na'amana. 'Enakaivo pa'ana'e

re'amajaho oni matauvi'inijaho kú'o apene va'amina.

⁷ Ijí sea kajino hiji'li 'iruma iraka ka'ene vaji'avajaho i'avara. Ijihuni maijaho ea ka'ene kaukaraa veji'ina puni eha apejura. 'Ene ja paarihe sei pini ajima ariha ajima ariha o'avara kaivo sea nikwinu hi'avara.

⁸ Ja ari va'eje ea irahipo 'ajorame 'iruma iraka'e joni una'i irechave ki'avajaho i'avara.

⁹ Atakina ka'ene ara kajino hijujija veje maranie 'ee ea kajija ijá 'waraha Godi oni arijaho joni romai roana i'avara.

¹⁰ 'Enakaivo ja ara pini va'eje pu ja pa'ajorave ki'avajaho va'e ma'aha riri naminareje ijá i'avara.

¹¹ Núni mumora hari saina ka'ene amama navujija taireve ari'eje Godoni ara nimaa nimai joni rori roana kaivo ja pataarohu i'avara.

¹² 'Enakaivo Na nimaa nimaa 'waravu. Vea ka'ene 'otua ve'avari veijaho ea kijahija niho'o ni'ina ani'ina rehuna. Kwaa ka'ene Satami 'wavujino renajaho asimareje niho'o ani'ina rehuna.

*Ara Ka'ene Panimai Roji'inijihina
(Matiu 11:20-24)*

¹³ Ja ea ka'ene Korasini hine 'ee Petasaita hijujija eha sisea apehuna. Ijihuni maijaho Na joni ari uneunecha ea areri pavejura veju'ukame ja panimaa roju kajihuna'e ja eha sisea apehuna. Na Taia 'ee Sairani ija'ina'e ve'ipisa pu niho'o maraku'a puni sisea niaremamaa areva'a.

¹⁴ 'Ena'omo na nimai ja 'waravu. Vea ka'ene Godira mwe'akaki 'otua venuni veijaho kwaa iha

Taia 'ee Sairani ijija jara eha ka'ene ni'ima'ura ape'avaja'ina'e paapehuna.

¹⁵ 'Enakaivo 'ú ja Kabeniami orakija ja ma joni haha kakino 'eka kahino Godoni ari va'iro avajo? Ja niho'o kwaa ka'ene veni renuni kwaa ijino (Hetisi) vahuna.

¹⁶ Ea irahipo joni ira he'avajaho pu Nuni ira hene avahuna. Ea irahipo jaa'e pataarora'avajaho Naa'e pataarorihe avahuna. Ea irara Naa'e pataarori'amajaho hu Godi ka'ene Naa'e ranamiume rouji pataarohe avahuna 'iamana.

Ea Mapoka Ijipo 'Uname Temarasahi'i Roajina

¹⁷ Ea mapoka mapoka (70) ka'ene irechamiume va'ajija 'uname mari'uvi'i ijá 'wava Natohwe Oni ihi rejume 'avena sisesa núni ira niho'o hene vejara 'wavara.

¹⁸ 'Ejume Hu ijá 'iama Na ka'eme Setani kahino akúpa 'ahi vea puna'i pi'l'eme 'onana.

¹⁹ Ike heha! Nara ja harura mihujihuna'e ja tapara 'ee suaka sisea ka'ene amari hiju jihipuni 'ahi namihuna kaivo pu pavenea kwamasahune 'ee naka mapoka ka'ene hijujija mai'o ja paruarahihuna.

²⁰ 'Enakaivo 'avena siseapo joni ira hene vejajihuna'e ja patea mana'avara kaivo joni iha ka'ene kahi akúpa 'ahi veju'e namujihuna'e teamana'avara 'iamana.

Jesura Mari'umajina (Matiu 11:25-27; 13:16-17)

²¹ Ijí vea kajino Godoni 'Avenijara vejume Hu teama'eme siporua 'one ijá 'wama Amo

ka'ene akúpa mwe'a ijihuni Natohwiji'o Na teimani 'wavujihuni maijaho Ara uneunechakija ea ka'ene hene vwhajji'inijihija nuhiume vaji navume pu pakavumakivi'i kasimaaru najahana. Amo Oni ura ijaho ijara ura renana. 'Ejumakame A avanana.

²² 'Enakaivo uneunecha ka'ene mapokijja Amora Nuni ija tahi irechamana. Ijhuna'e eaka mapokijja Godoni Harihijaho pakama pahejura kaivo Amora hena kamuna. 'Eju'e eaka mapokijja Amoho pakama pahejura kaivo Hariahi kama henuna. 'Enakaivo Hariahi ura renujiru Omaha najahuna 'wamana.

²³ 'Enarame Jesuho aroma Huni tisaiporu kivi'i hemi ijá 'iama Nia ka'ene jara kivuke kihunijja merajihana.

²⁴ 'Enajjhuna'e nitama poropetia 'ee kinia mapoka pu ura jara kivuja'ina'e pu ki'iro 'ahiara vo pu niho'o areri pakivara. 'Ene pu jara heju kaja'ina'e he'iro 'ahiara vo pu niho'o areri pahejara 'iamana.

Sameria Ora Ea Mamaijhuni Haa

²⁵ 'Enakaivo heha! Roia pini roe Hu vena ka'i 'ahaume ijá 'wama Najahi'ine na ichá'ina'e vene majama hihuna ape'ejo? 'wamana.

²⁶ Hu ijá 'wama Varapa vajijaho iraka'e vejare? A ichá'ina taha kamo? 'wamana.

²⁷ 'Ejume ijí ea kajara eha vena ijá 'wama A oni Natohwa ka'ene Godiho ni'aha kwinu oni oja 'ee oni 'avena 'ee oni harura 'ee oni vwhajaho mah'o vaja'amana. 'Ene ara oni haha'e vwhahanu ja'ina ea ka'ene oni rori hijujija oja mi'amana 'wamana.

²⁸ Hu ijá 'wama Oni ehijaho niho'o nimaikúne ijá venareje a majama hihuna ape'ena 'wamana.

²⁹ 'Enakaivo ea kajara huni 'unama'e amairia 'ahaume Jesuho apoma ijá 'wama 'Ú nuni rori hinujaho irane? 'wamana.

³⁰ Jesura eha vene ijá 'wama Ea pini Jerusaremi rene Jeriko va'eme anuameji'inapo piunamareja hu apene 'anae 'ee ateha isokunahe 'anauva'o ranavume ijino kwame ojaru 'oj'i namana.

³¹ Hu ija'ina ve'eme pirisiti pina 'unama kajihuna kajino vai'i kavu'e ea kajaho navu kavi'i rori tatumahé va'ana.

³² 'Unama kwinu'ina kajino ea ka'ene Rivai 'wavujaho ijihuna kajino roe ea kajaho kamarena hu 'u'o nii tihi kakavil'i tatumahé rori va'ana.

³³ 'Enakaivo Sameria ora ea pini 'unama kajihuna kajino roe ea kajaho kame hu niho'o temume oja tura'l'i 'ahaana.

³⁴ Hu huni va'e 'weru 'ee 'wainia usetie 'ee panesia hwamaharena apene huni tonikia 'ahi raname va'e nú'úha pini raname 'ajoaha hinana.

³⁵ Ijihuni sú'uhijino hu monia oma no'ohe'i sirirame ijí ea ka'ene ara'e 'ajohi'ina kaji vajahana. Hu ijí ea ka'ene ara kaji 'ajohi'iniji ijá 'wama A eakaho 'ajoha hi'amana. 'E'eje na kú'o 'unama roe ara huni hahi oni monia ka'ene ato'aru'amajaho na eha mahuna 'wamana.

³⁶ Iji'a ijá 'wama A vwihanujaho ijí ea no'opisu vaja kajino irara huni romaijahune? 'wamana.

³⁷ 'Ene hu ijá 'wama Ea ka'ene hu numimajina 'wamana. 'Ejume Jesura ijá 'wama Va'e ija'ina ve'amana 'wamana.

Jesura Mata'o Meri'o Ki'irono Va'ajina

³⁸ Pu va'ajime va'e ara pini use'eme napara iha Matara 'ajorame huni sei aherame va'ana.

³⁹ Huni 'u'ua iha Merina'omo hu Natohwí ji-huni mumora rori asuma hine ataa apúsame Huni vu'a henana.

⁴⁰ Mataho kaukara mapoka ka'ene hu venajara túkiravume roe Hu ijá 'wama Natohwé nuni 'u'ua kaukara mapokakija maki'eju'e na nanasumano vejujaho A ichá vwhi hana? A hu 'warave roe na ni'ajihama 'wamana.

⁴¹ Natohwijara eha vena hu ijá 'wama Mata Mata a uneunecha niho'o mapoka'e hine vwhanare'e oja hianavu kavu.

⁴² 'Ene uneunecha kwinu kwino mama'ina navu. 'Enakaivo nimaijaho nikwinu'wina. Iji-huna'e Meriho 'unama nimaiji piunamana'omo niho'o paapena ruvahuna.

11

Jesura Siporua 'Ohuna Najahajina

(Matiu 6:9-13; 7:7-11)

¹ Na'ia pina Hu kwa a pini hine siporua'e 'onana. Hu 'ojume pa'are'eme Huni tisaiporu pini roe ijá 'wama Natohwé areri Jonira huni tisai poru najaha ja'ina'e siporua'e 'ohuniji najuha 'wamana.

² Hu ijá 'iama Ja siporua ika'ina 'o'avara. Amo Oni iha niho'o nima a'omo A roa nú 'ajohua.

³ Vea kwinu kwinu 'iruma ka'ene areri ihuniji vajúha.

⁴ Núni sisea vwihanúa arema. Ijihuni maijaho nú 'u'o ea 'ahopo sisei 'ahúujaho nú vwihanie arevura. 'Ene paaherume vena kivuri vajijaho va'amana 'iamana.

⁵ Hu pu ijá 'iamama Ja ei pini napura rukina'e re'ira'omo na'ia rira mu'oi va'e ijá 'wava'e napura nune puretia no'opiso vaji'irakúne na túna'i oni puretia eha vajahuna.

⁶ Ijihuni maijaho nuni napura kwaa jori rene roe iviamaa nuni sei roana kaivo nara unekaka mahuna pa'ajihuna'e 'waravu 'wamana.

⁷ 'E'eje oni napura kajara kahino sea vaji eha vene ijá 'wa'ipisa Siuna arema na vwicha nikume sesahu nu pu'úmo ninejura'omo na pa'urine uneunecha 'eka vajahuna 'wava'a.

⁸ Na jaa'e 'waravu. Hu pa'urine pureti pamaha kaivo a huni napuri roe paju'ika'i hine jarimujihunihahi hu 'urine uneunecha mapoka ka'ene hu icháru ura renujaho vajaha'a.

⁹ 'Enajihuna'e Na jaa'e 'waravu. Ja hine jari'avajaho vajihuna. Ja hine sara'avajaho piunihuna. Ja hine 'ana'ana'avajaho tirausahuna.

¹⁰ 'Ene ea irara jarimujaho hu 'ekuna. 'Ene ea irara samujaho hu piunimuna. 'Ene ea irara 'ana'anaujaho jara'usatuhuna.

¹¹ 'Ú ja omahwaha harihu jopo roe kija'e jarira'ipisa ja tapara'e vajihae?

¹² 'Enavo pu 'u'ora kuha'e jarira'ipisa ja suaka vajihae?

¹³ 'Enakaivo ja ea siseakija joni harihija swara mamai vaji'avajaho joni Oma ka'ene akúpa 'ahi hinuji jari'avajaho Hura Huni 'Avena mihuna 'iamana.

*Jesune 'Ee Pierisiparu
(Matiu 12:22-30; Maka 3:20-27)*

14 Hu 'avena sisea ka'ene ira pa'waravi'inijaho 'waravume 'e'una va'eme ema kajaho aneja vene ira 'waramana. 'Ejume ea mapoka kajija nih'o oja hwa'usahara.

15 Ea 'aho'a ijá 'wava Ea ikaho Pierisaparu 'avena sisea puni natohwijara harura mahu'e 'avena sisea 'waravu'e usevu 'wavara.

16 'Ejume ea 'aho'a Hu vena ka'i 'ahiume 'ejahae ijá 'wava Veje aacha pina akúpa 'ahi rene roa kava 'wavara.

17 'Enakaivo Jesura iraka ka'ene pura vwiha-jajaho nikimarena ijá 'iama Kwaa ara irahipo irecharame va'e nia ani ani hine 'arahil'i hil'ipisa pa'areja'a. 'Ene ara irahipo ahaama hil'ipisa ariha pa'areja'a.

18 'Enajihuna'e Setanira ahaama hi'ipisa huni kwaa arijaho ichá'ina'e namija'e? Ijihuni mai-jaho ja ijá 'wavo Na Pierisiparu oni iha 'ahi 'avena sisea 'waravu'e usevu 'wavu.

19 'Enakaivo ja vwihaftujaho Nara Pierisiparu oni iha 'ahi 'waravu'e 'avena sisea usevu 'wavu kaivo joni harihija irahuni iha 'ahi 'waravu'e usevure? Ijihuni hahi pura joni 'otua vehuna.

20 'Enakaivo Nara 'avena sisea ka'ene 'waravu'e usevujaho Godoni ijijara reju'e avaujaho Godi oni arijaho ni joni roana.

21 Ea ka'ene harura rukinijara huni ara juha haja vene 'ajohujaho huni kukua mamaa navura.

22 'Enakal'i ea ajisina huni ajira asimajara roe 'anae huni juha haja ka'ene hura 'eke tarera veji'i hinujaho 'etujahe huni kukua vajúsarama

'ekura.

²³ 'Enakaivo ea ka'ene Na hu'úmo parenujaho hu Nuni pwina pana. 'Ene ea Na hu'úmo parene ea nianaujaho hu veju'e pu jirijiri varanavura.

'Avena Sisei Kú'o 'Unama Roajina

(Matiu 12:43-45)

²⁴ Vea ka'ene 'avena sisea emahuni haha 'ahi hinujara ru'e'unujaho hu va'e kwaa toa pa'ajino va'e ojuta hwehuna samujaho pakamuna.

²⁵ 'Enare'e hu ijá rohune Na kú'o 'unama va'e ruha ka'ene nara hijujino va'uma. Hu 'unama vai'i kavu'e ruha kajaho ea pahiju kaivo túa 'anae amairiana.

²⁶ 'Enareje hu va'e napuhwaha 'avena sisea 'aho'a iropu no'o ajisiniji aherama roe ijí hihuna. 'Ena'avo maraku'ijaho eakaho sise'i hinana vo iviamaa sisei maa hina parahuna 'iamana.

Temara Nimajina

²⁷ Jesuho ijá 'warame pa'are'eme napara pini ea rira kajino 'urina ira ajira ijá 'umena Napara ka'ene Aa'e nahenae 'ee A musa vajahajaho Godi merajahana 'umenana.

²⁸ 'Enakaivo Hu ijá 'wama Ea ka'ene Godoni vu'a hene vejujaho ijihiha Godi merajihuna 'wamana.

*Emapo Areri Pavejuji Veja Ka'irono
Mi'imi'livajina*

(Matiu 12:38-42)

²⁹ Ea mapoka kajija Huni rora kajano ani re'eme Hu aneja vene ijá 'iama Ja ea ka'ene iviamaa 'urijakija niho'o sisea. Ja aacha sarama

'warivu kaivo aacha pina pamihuna kaivo Jona oni aachajiruna.

³⁰ Areri Jonara Ninava opuni aacha renaja'ina'e Ema Puni Harihijaho iviamai ea ka'ene hiju jihipuni aacha rehuna.

³¹ 'Ene vukú'o vea ka'ene Godira 'otua ve'amani veijino vea va'e 'onu karo'i puni kwinia ka'ene hinujara Godoni una'i ja pu'úmo namine namahuna. Ijihuni maijaho ike kwinia karo'i kwaa jori hinujaho roe Saramanira kora mamaiji 'waravume henana. 'Enakúne heha! Ea ka'ene Saramani asimani eijaho iviamaa iki joni vaji hinu.

³² 'Enakaivo vea ka'ene Godira 'otua ve'amani veijino ea ka'ene Ninava orijija pu Godoni una'i ja pu'úmo namine ja namahuna. Ijihuni maijaho Jonara najahaji pu hena nimaa ronareja puni sisea arevara. 'Enakúne heha! Ea ka'ene Jona asimani eijaho iviamaa iki joni vaji hinu.

*Haha Huni Hanaji'inijina
(Matiu 5:15; 6:22-23)*

³³ Ea pina naheha pa'ene si'uara vaja irechavu'e navura kaivo pu icha ka'ene naheha'e 'unamiiji 'unavu'e ea mapoka kavi'i roa ajivura.

³⁴ Hahijihuni naheha ijaho nijina. 'Ena'omo joni nia kajara marana paranujaho joni hahaka mapokijaho maho'o hanana paranuna. 'Enakaivo joni nia sisera'amajaho joni hahaka mapokijija maho'o nutuma nahuna.

³⁵ Joni haha vaji hanaji'ina ka'ene namujaho paveje nutuvi'ina re'amana.

³⁶ Joni haha mapokijaho hanana na'i kaivo pina panutu'ipisa niho'o natohwa'e hanaja'a areri ja

naheha 'ena irechavu'e namare'e hanana paraju ja'ina'e reja'a 'iamana.

*Jesura Parasia 'Ee Varapa Tamana Najahi'iniji
Namahajina*

(Matiu 23:1-36; Maka 12:38-40)

³⁷ Hu ijaho 'waravume pa'are'eme Parasia pini va'e huni sei 'iruma i'amaronona 'waramana. Hu va'e 'aijua rorri asuma hine 'iruma i'i 'ahaume venana.

³⁸ 'E'eme Parasia Jesu ka'eme Hu Huni ija paso'i ijume kamarena hu niho'o tatamana.

³⁹ 'Ejume Natohwi hu ijá 'wama Parasia kapusia 'ee tevua huraru sovura kaivo joni vajijaho niho'o nesa 'ee sisei ani rene navura.

⁴⁰ Vwiha pa'akije 'ú Godi ka'ene hora venajaho vaja 'u'o pavene?

⁴¹ 'Enakaivo joni vaji iraka ka'ene navujaho ea ka'ene uneunecha pa'ajihivaijihakame joni uneunecha mapokakija mamai reja.

⁴² 'Enakaivo Parasia joni eha sisea niho'o ni'ima'ura namu. Ijihuni maijaho ja taisia ka'ene Godi vajahajaho senisia 'ee siaa ani ani'ina juasi'i navujija vajihura kaivo ja 'unama maijaho pataarohe 'ee Godi oja pamahura. 'Enakaivo ikaho uneka ka'ene ja veji'i ea 'aho'a paasinami-hune sa'ina avajura.

⁴³ Ja Parasia joni eha sisea niho'o ni'ima'ura namu. Ijihuni maijaho ja Sinakoku vaji una'i ikikami hihuni tiniji ura renaura. 'Ene ja maketia vaji emaapo pu ja 'ajorahuna'e ura renaura.

⁴⁴ Joni eha niho'o sisei namu. Ijihuni maijaho ja areri eucha ka'ene ea savaji pahena paki'i kaivo ijihuni toi 'urahoju ja'ina veju 'wamana.

⁴⁵ 'Ejume roia pini eha vene ijá 'wama Najaħil'ine A ija'ina'e 'warumujaho núa'e 'uraruhe avanu? 'wamana.

⁴⁶ 'Enakaivo Hu ijá 'iama Ja roia 'u'o joni eha sisea niho'o ni'ima'ura namu. Ijihuni maijaho ja ea ahija mama'ina vaji'i kaivo ni'ajihe iji 'unira 'urihuna pana.

⁴⁷ Joni eha niho'o ni'ima'ura namu. Ijihuni maijaho ja euchā mavarasa'ina poropeti epuna vejura kaivo emahu jopo 'aniume kwamasahara.

⁴⁸ Joni amuhipo poropetia ka'ene 'aniajaho ja nihena kimare'e pura raka ka'ene veja kajaho nijina 'wawu. Ijihuni maijaho ja hine puni euchā amairie veju.

⁴⁹ Ijihuni hahi Godira Huni vwiha vajijino ika'ina 'warumana. Nara Nuni poropetia 'ee apasoru irechamie vu'akame ea 'aho'a pu 'anie kwamasaha 'ee ea 'aho'a ruarahuna.

⁵⁰ 'Enajihuna'e ea ka'ene iviamaa 'urijajipo vea ka'ene mwe'a'e aneja vejajino rene poropetia 'aniajihuni eha apehuna.

⁵¹ Eporu ka'ene ea aririjihuni 'aa arihaji rena roe Jakaraia oni 'aa ka'ene Temiporu 'ee swasa vejuri 'aijua rira mu'oa kaji 'anaji ro 'e'unana. Na ja 'waravu. Ijihuni eha ijaho eaka iviamai hijukipo apehuna.

⁵² Ja roia joni eha sisea niho'o ni'ima'ura namu. Ijihuni maijaho hena kahuni kijaho ja apena ruva'ara kaivo ja 'u'o pava aruvvara. 'Ee ea 'aho'a ka'ene va'e aru'i vejajaho ja tanuvara 'iamana.

⁵³ 'E'eme Hu ara kajaho are'i va'ajaho Siku-raipia 'ee Parasia Jesuho niho'o apene 'urarahe uneunecha mapoka'e ani ani'ina apovara.

54 Ijihuni maijaho Hura unenu'u pina sisea 'waravakame Hua'e apena nama'irono avajara.

12

*Aroaroti Namijuji Ronarena Jujuvua
 'Waramajina*
(Matiu 10:26-27)

1 Ea mapoka'e Huni rora kajaho ani rene ajime ateji tauta'aravi'i hi'eme Hu Huni tisaiporu amura Peresi rone ijá 'iama Ja hamि Parasia puni isitia ki'avara. Ijihuni maijaho pu ira'asina.

2 Uneunecha mapoka ka'ene vaji navu'e ea mapoka pakivura'omo túna'i samahirahuna. 'Ene ea mapoka hemi navujaho ni'i ni'i hena kihuna.

3 Vu'a iraka ka'ene nututi jahejajaho ja samau-mai 'wara'avara. 'Ene vu'a ka'ene sei vaji koravajaho ja ata huri namine 'ume'avara.

Irá Juhahunijina
(Matiu 10:28-31)

4 Ehu nune Na nimaa ja 'waravu. Ike haha huriji erapo 'anaa kwahuniji ja ju'ava. Pu areri ijhuni túna'ijaho unenu pina pavehuna.

5 'Enakaivo ja irá juhahunijaho Na ja 'warahuna. Godi ka'ene areri 'anaa kwavakavi'i pi'onama'e veni vahuniji juha'avara. I'a Na ja 'waravu. Hua'e juha'avara.

6 'Enakaivo 'ú ea uka iropu ma'u'u maa toia no'o 'imejure? 'Ena'avo Godira ijí uka ma'u'u maa kajija hena ki'eju'e hijura.

7 'Ene ijí joni húmata sapasa icharo namujaho Hu nihena kamu. 'Enakúne ja paju'vara. Ijihuni maijaho jara uka ma'u'u maa kajija asitahara.

Keriso Nimai Rone 'Warahuna Ho Pataarohunijina

(Matiu 10:19-20, 32-33; 12:32)

8 'Ena'omo Na nima ja 'waravu. Ea irara Na ronareje ea mapoka puni una'i 'wara'amajaho Emaa Puni Harihijara 'u'o ea kaji rone kahino akúpa 'ahi Godoni 'ona oji'ini jihipuni una'i nahama 'warahuna.

9 'Enakaivo ea irara Na hemihareje ea 'aho'a panaja'amajaho ea kaji 'u'o Godoni 'ona oji'ini jihipuni una'ijaho panahama 'warahuna.

10 'Ene ea irahipo Emaa Puni Harihi jihuna'i ira sisea 'wa'avajaho puni sisea vvhianie arehuna kaivo Godoni 'Aveni jihuna'i sisea 'wa'avajaho Hu niho'o puni sisea pavvihana arehuna.

11 'E'eje pu ja 'eka va'e Sinakoku 'ajohi'ina 'ee ea mama'ini jihipuni una'i nama'iro va'a ki'avajaho vu'a raka ka'ene 'warahunijaho oja pahiana'vara.

12 Ijihuni maijaho ijí vea muka kajino iraka ka'ene jara 'warahunijaho Godoni 'Avenijara naja'eje 'warahuna 'iamana.

*Uneunecha Rukima'ura Ka'ene Puruva
Rej'i'inijihuni Haa*

13 Ea pini ijí ea rira kajino ijá 'wama Najahi'ine nuni poka 'wave nuni aachia ka'ene nuni omijara irechamaji ahaama nuna vajihama 'wamana.

14 Hu ijá 'wama Ea ikera! Ea irara Na joni 'otuae hehuna iji pijihane? 'wamana.

15 Hu pu ijá 'iama 'Unama ani ani'ina ka'ene niho'o ituname urarena parajujija hami 'ajohe ki'avara. Ijihuni maijaho ema ijihuni huijaho kukua mapoka ka'ene huni navujipo reje hihuna pana 'iamana.

16 'Enarena Hu ike haakaho 'waramarena pu ijá 'iama Ea 'iruma niho'o mapoka ani rejii'ini jihuni mwe'i soa savu'e juara 'urina paranana.

17 Hu hine hu husumano vwihanu va'o ijá rona Nara nuni 'iruma'e irechahuni ruha itu'ona paranana'omo na ichá ve'eju ronana.

18 Hu ijá rona Na ika'ina'e ve'eju. Na nuni ara tirasame mama'ina'e vene ijino nuni 'iruma 'ee kukua 'aho'a irecha'eju ronana.

19 'Enarena hu ori'ini ijá rona Na niho'o ea teamanima paraji'ina renareje na hi'eju. Na uneunecha ka'ene juara mapokijino ura renia parahunijaho 'ekuta. 'Enajihuna'e masuani hine 'iruma ine 'ee toa kisina ine teamani'leje hi'eju ronana.

20 'Enakaivo Godira ijá 'wama Ike niho'o vwiha pa'akera. A iviasi na'iakino kwa'amajaho ea irara ike kukua ka'ene ara irechama hinujaho 'eka'ena 'wamana.

21 'Enajihuna'e ea ka'ene mwe'a kakino uneunecha mapoka rukina renujaho hu Godoni una'ijino areri uneunecha pa'ana'e renuna.

*Godi Nimaa Vetihunijina
(Matiu 6:25-34)*

22 'Enarena Hu Huni tisaiporu ijá 'iama Na ja 'waravukúne jara ichá'ina hihunijaho pavwiha'avare 'ee ika'ina pavwiha'avara. Nú

'iruma iraki i'eja pavwiha'avara. 'Ene joni haha ika'ina pavwihana 'wahuna.

²³ Nú iraki núni haha nuha'ara'eja? pa'wahuna kaivo ijí 'iruma kajara venuakame majama hihuna pane 'ee ateha kajara venuakame majama hihuna pana.

²⁴ 'Enakúne ikaho vwhaha. Uka ka'ene jaijasaha oju kare kiha. Pu niho'o puni 'ina pa'one 'ee puni 'iruma pa'ke rira kwino ahuma irechavu kaivo Godira 'iruma vajihu. 'Enakaivo jara uka niho'o asitaha parajara.

²⁵ Ja ea irahipo hine vwhananavi'i temuka ape'avajaho 'ú ijí temuka kajara veje joni hia vea pina kú'o huri ranave hi va'eja?

²⁶ Ja uneunecha ma'u'umai areri pave'avajaho ja irakijihuna'e uneunecha 'aho'akija vwhajo?

²⁷ Ike heha sinara ka'ene nechi orijija ma'opuipo 'urijura kaivo pu opuina harura pavene 'ee opuina majikaria pamarasahura. 'Enakaivo Na nimaa nimai ja 'waravu. Saramaniho nitama huni haha sarira 'enana kaivo ijí hora sarira ka'ene 'enajaho areri sinara huni nia vaja'e kimuja'ina paasimana.

²⁸ 'Ena'omo Godira sinara ka'ene iviasi mai'o navura'omo niari ato'uve veni rehunijija 'ajohamajaho Hu ichá'ina'e ja 'ajohahuna vwhajo? Ema ka'ene joni nimairoa ma'u'umaakije!

²⁹ 'Enakúne jara 'unama ka'ene 'iruma 'eka ine 'ee toa ihunijaho pahine sarame vwiha'avara.

³⁰ Ike uneunecha kijahija ea ka'ene kwaa ara mapokakino hijujija hina saravura. 'Enakaivo joni Oma ka'ene kahi akúpa 'ahi hinujara une-

unechaka mapoka ka'ene ja pivusahujija nihe paranuna.

³¹ 'Enakaivo ja maraku'a Huni ara 'unamiji 'ee Huni 'unama ka'ene arimaiji saravakame iji'a uneunechaka mwe'akaki jara pivusahujaho Hura vajihuna.

*Akúpa 'Ahi Kukua Rukina Rehunijina
(Matiu 6:19-21)*

³² 'Enakúne eakije nih'o patea juna'avara. Ijihuni maijaho joni Omijaho ura rene teamama para'eju'e Huni arijaho ja mihu.

³³ Joni uneunecha 'eke 'imenareje monijaho ea ka'ene 'iruma pa'ajihu vajihua. Ja ojono tuja ka'ene panapavil'iniji 'eka'avara. 'Ee joni uneunecha kahino akúpa 'ahi irechave ea panesi eke kapura pa'uhusa'avara.

³⁴ Joni uneunechaka mamaa kajipo na'avari tinijikano joni oja 'ee vwihiyaho 'u'o ijí nahuna.

Pwea 'Aiha Veji'ine 'Ee Amairiaravi'inijina

³⁵ Ja joni kukua same amairiarama parane joni naheha 'ena pijinamie hana'eje hiha.

³⁶ 'Ene areri pwehwapo puni natohwijara ea mai'o napasi nejuhipuni sori va'ana'e ro'amarono 'ajaha hijuja'ina. Hu roe vwicha 'ana'ana'amajaho pu vwicha ni'aha kwino tirasamahuna.

³⁷ Pwea ka'ene puni natohwijara kú'o 'unama ro'amarono amairiarame 'ajaha hijujija nih'o teamana'eju'e hiju. Na nimaa nimai ja 'waravu. Hu huni ateha apúsame 'warave asuma hi'eje huru 'iruma 'eke vajihé ihuna.

38 'Ena'omo Hu na'ia rimai ro'ena 'aho sú'usú'u vea aharasa'amaji ro'amajaho pwehwaha ka'ene niamairiarame areri rena hijajija teamanahuna.

39 'Enakaivo ja niheju sea anesurijara he'eje nesa apeji'inijara vea muka irakiji roe nesa ape'iro'ipisa hu tanurahakame hu paroe huni sea ruarahe nesa apeja'a.

40 Ijihuni hahi amairie nirisave areri rena para'eje 'ajaha hi'avara. Vea muka ka'ene Ema Puni Harihijara rohunijaho ja pakame pa-hejil'inakúne ijá ve'avara 'iamana.

*Pwea Ka'ene Uchaha Pa'aji'o Uchaha Rukiniji'o
Puni Vu'a*

(Matiu 24:45-51)

41 Pitara ija 'wama 'Ú Natohwé A núa'e haakaho 'warumu 'uho eaka mapokakihi 'waramo? 'wamana.

42 Natohwijara ijá 'wama 'Ú pwea irara pasivi'ina 'ee vwiha hamí vwihami'ine huni natohwijara huni pwea 'ajohe 'iruma vea 'ahi areri vajihuna'e ranamané?

43 'Enareje pwea irara kaukaraa kaji hine veji'i hi'eje vea ka'ene huni natohwijara ro ka'amajaho hu merajahuna.

44 Na nimaa nimai ja 'waravu. Hu ranave huni kukua mapoka kajija maho'o hora 'ajohuna.

45 'Enakaivo pwea siseijaho hu oja vaji ika ronu nuni Natohwijaho paro'aju'e 'aha jora renu ro'ika'i aneja vena huni pwea parui napari 'anie 'ee 'iruma ma ina hine 'ee toa sisea ine nana'ena.

46 'Ene Hu hine ijí ve'i kaivo pavwihamane pave'eje Huni Natohwijaho ro 'e'uhuna. Vea

muka ka'ene Hura rohunijaho pakame pa-heji'ina. 'Enareje Hura heha eha mahareje ranave ea ka'ene ira'asini jihipuni tini ijino vahuna.

⁴⁷ Pwea ka'ene huni Natohwijara 'waramujaho henareje paamairiarava 'aho huni natohwijara iraka ka'ene 'waramuji pavенajaho niho'o 'aha mapoka hijahuna.

⁴⁸ 'Enakaivo pwea irara uneka sisea ka'ene hu puruva re'eme venana re'amajaho eha ma'uako apehuna. Ea irahija'e uneunecha mapoka vaji'amajaho hu areri vajihaka kaja'ina'e 'ekahuna. Ea irara niho'o mapoka mapoka'e vajihujaho ea kajaho areri vajihaka kaja'ina'e mapoka mapoka 'ekahuna.

*Jesura Veju'e Ahaavura
(Matiu 10:34-36)*

⁴⁹ Na mwe'akake veni 'ena apena jae re'amarono routa. 'Enakaivo iviamai kakaro re'ipisa areri renarapa paraja'a.

⁵⁰ Na vea kisini vaji va aruhuna namu. 'Enajihuna'e ijí hine vwhajujaho nuni oja ahisina'e renuna'omo ijara ro pa'arehuniji kavi'i hiju.

⁵¹ Ja vwhajujaho Na matauma hihuniji apene iki mwe'i route? Na nimai ja 'waravu. Matauvilina pana kaivo Na ahaama hihuniji apena routa.

⁵² Iviamai kaka renareje kachi'ina iropu re'avajaho no'opisu 'urine no'ohe'i irechamia va'e no'ohe'i 'urine no'opisu irechamia vai'ina rehuna.

53 Omaha hariaha ninave 'ee hariahi omaha ninave 'ee oahi 'apajaha ninave 'apajahi oaha ninave sasahi sasaha ninahuna. 'Eje pu ahaama hihuna 'iamana.

*Veiji Hena Kahuni Vu'a
(Matiu 16:2-3)*

54 Hu ea mapoka kajija ijá 'iama Ja 'imitia ka'eju'e vea 'onuja'i savu'e kavujaho ja ni'aha kwino ijá neha pil'i venu 'wa'eju'e neha pinuna.

55 'Enakaivo ja he'eju'e asiasia kama'ahuni rene ikikahi 'anau'e hejujaho vea 'e'ui venu 'wa'eju'e vea 'e'ununa.

56 Ja ira'asinakije! Ja akúpa 'ee mwe'a kimare'e iijihuni maijaho 'waravura kaivo 'ú ja iviamaa iraka ka'ene rejujaho pakivo?

*Ea Ka'ene Onuna'i Sena Venuji'i Amairina'amana
(Matiu 5:25-26)*

57 Ja irakijihuna'e ojono irakijara nimaijaho pa'ke mina vene kivo?

58 'Ene ei pini a 'otua veta'iro vejakame ja no'o 'unama toi va'avajaho ja hu hu'úmo 'wame amairi'avara. Ijjihuni maijaho hu a apena va'e 'otua veji'ina natohwi jihuni ija tahi ranamaa ve'enakúne. 'Ejakame ijí 'otua veji'ina natohwa kajara hirisima mihakame pu apena va'e tipura ranamahuna.

59 Na nimai ja 'waravu. Ja ijí pu pu'úmo pa'wame amairi'avajaho ja ijí tipura kajino hinu va'o 'imeja pa'are'eje ijí roe samai usehuna 'iamana.

13

Joni Sisea Are'avajiana Vo Kwamasahuna

¹ Vea kajino ea 'aho'a ijino hijara'omo pu Jesuso ijá 'wava Karari ora 'aho'a hine Godoni swasa'e ve'eme Pairatira 'anie puni 'aa swasa ka'ene pura vejajihuni toi ahumana 'wavara.

² 'Ejume Hu eha vene ijá 'iama Ja vwilijahuaho Karari ora ikihi puni siseijara vu Karari 'aho'a puni sisea asitaha raka?

³ 'Enakaivo Na ja ijá 'iavo Pana! Ja joni sisea pavwiuhane ta'arohe nahama 'wara'avajaho ja 'u'o ija'ina'e kwamasahuna.

⁴ 'Enakaivo ja vwilijahuaho ea 'aho'a (18) ka'ene Sairoami ari 'aume 'anume kwamasaha jihipuni siseijara ea ka'ene Jerusaremi hijujihipuni siseijaho asitahane? 'iamana.

⁵ 'Enakaivo Na ja ijá 'iavo Pana! Ja joni sisea pavwiuhane ta'arohe nahama 'wara'avajaho ja 'u'o ija'ina'e kwamasahuna 'iamana.

Tavo'a Ka'ene Ina Pa'ajina

⁶ 'Enarena Hu haakaho 'waramarena ijá 'iama Ea pina tavo'a huni juasi'l'i 'onavume naminuna'omo hu va'e maa 'eka amena i'i 'ahau'e va'ujaho mai parenuna.

⁷ 'Ena'omo hu huni juara'e 'ajohi'iniji ijá 'wama Na juara no'opisu 'ina 'eka'irono saravuta kaivo pina paapejuta. Ijihuni hahi mwe'a'e nisamukúne vwina pi'onama 'wamana.

⁸ 'Enakaivo ea ka'ene juara kaji 'ajohi'inijara ijá 'wama Natohwe! Maka'eje juara kwinu namijakame Nara 'úsia aneja kajino irechavakame mara'amana.

9 'Ejakame juara pinijino tavo'akara maa re'amajaho mavarasa'ina'e rehuna kaivo maa pare'amajaho vvi'eju 'wamana 'iamana.

Sapati Jesura Napara Túpa Irivi'ina Vejume Maranaajina

10 Na'ia pina Jua puni Sapatia vejino Jesu Jua puni Sinakoku vaji hine najahana.

11 'E'eme napara pina juara mapoka (18) 'avena sisei vejume huni túpa nivunama navukame arini namina ohuna areria pana.

12 'Ejume vea ka'ene Jesura kamarena 'umejume roume ijá 'wama Napara karere oni atama iviamaa maranau 'wamana.

13 'Enarena Huni ija haha 'ahi ranavume ni'aha kwino huni túpa arira'e rejume Godi ta'arohana.

14 'Ejumakame ea natohwa ka'ene Sinakoku 'ajohi'inijaho Jesura ea vejume Jua puni Sapatia vejino marajumakame ajimana. 'Ejume Hu ea kajiji ijá 'iama Ja na'ia iropu kwinu vajijino kaukaraa vehunakúne ijino roajivakame veje marania'a kaivo Jua puni Sapati vejaho paro ve'avara 'iamana.

15 'Ejume Natohwijara eha vene ijá 'wama Ea ira'asinakera ja ea kwinu kwino Sapatia vejino joni toniki 'ee purumakau toa hu'ipisa ja Sapatia vea'omo parasame ahema apene va'e toa maha ija'a raka?

16 'Ena'omo iviamaa ike Eparahami oni 'apajakaho Setani rosavu'e juara mapoka (18) pa'arenajaho hu areri Sapatia veakahao paveje mara'ena? 'wamana.

17 'Enaka'i Hura eha ka'ene 'waramajara vejume ea ka'ene Huni nakijija junamana kaivo

ea mapoka'e Hura uneunecha ka'ene venajhi
kimareja teamanavume mari'uvvara.

Kwava 'Ina Huni Haa
(*Matiu 13:31-32; Maka 4:30-32*)

¹⁸ 'Enajihuna'e Hu ijá 'iama Godoni arijaho icháine? 'Ú Na Godoni arijaho irakijino mina veji'i 'warahune?

¹⁹ Godoni arijaho areri kwava 'ina sa'ina. 'Ena'omo emai apena va'e huni juasi'i 'onamana. 'Ena'omo riamare'e niho'o icha natohwa'e reju'e ukapo roe ijihuni anuama 'ahijino nesa vene hijura 'iamana.

Isitia Huni Haa
(*Matiu 13:33*)

²⁰ Hu kú'o ijá 'iama Na Godoni arijaho irakijino mina veji'i 'warahune?

²¹ Ijaho areri napari isitia ka'ene harava 'eke puretia venare'e 'onahukame hwena ajivuja'ina 'iamana.

Vwicha Ma'u'uijina
(*Matiu 7:13-14, 21-23*)

²² Hu ara mama'ina 'ee ma'u'umaa ijino na-jahi'i Jerusaremi va'i 'ahaume va'ana.

²³ 'E'eme ea 'ahopo ijá 'wava Natohwe ea makwinu kwino majama hihuna apehuna raka 'wavarra. 'Ejume Hu ijá 'iama

²⁴ Na nimai ja 'waravukúne hamि hamি vena kamareje vwicha ka'ene niho'o ma'uatituijaho va'e aru'avara. Ea mapoka'e aru'i 'ahie vehuna kaivo mai'o areri parenahuna.

²⁵ 'Ejume sea anesurijara 'urine vwicha kuna'eje ja ma'ahi namine vwicha 'ana'anae

ijá 'wahune Natohwiji vwicha tirasamúha 'wave anesurijara ijá 'iahune Na ja suja. Ja ichihi rene roajivajaho na pahena pakivurakúne 'iahuna.

²⁶ 'Ejakame ja ijá 'wahune Nú oni una'i 'iruma ine 'ee toa ijura. 'Ee a roe nuni ari ma'ahi vu'a najuhuna 'wahuna.

²⁷ 'Ejakame Hu kú'o ijá 'iahune Ja ichí rene ro'ajaho Na suja. 'Enakúne ike sisea veji'inikije usema va'ajihā.

²⁸ Ja ruha ka'ene niramarume upaja ja'i'uji'i nahunijino hiji'i Eparahami ho Aisiki ho Jekapi ho 'ee poropeti ki'eje Godoni ari 'uraha oja khuna kaivo jajasu ato'aruma'e usehuna.

²⁹ Ea ka'ene vea ajimuja'i hijura vea 'onuja'i hijura kama'i hijura 'ee kaha'i hijujipo roe Godoni ari 'iruma ine hihuna.

³⁰ Heha! Ea ka'ene iviamaa túchamai rejuijia urasahuna 'ee ea ka'ene urasahujija túchamai rehuna 'iamana.

Jesura Jerusaremi Oja Mahajina (Matiu 23:37-39)

³¹ Vea nikwinu'ina kajino Parasia 'aho'a Jesuni roe ijá 'wava A iviamaa ikaho are'i kaivo kwai pini va'amana. Ijihuni maijaho Herotiho A 'ana'i 'ahaukúna 'wavara.

³² 'Ejume Hu ijá 'iama Va'e 'ua nea kajaho ijá 'waraha. Na 'avena sisea siome ato'aruma'e 'ee atama ani an'i'na'e iviasi ea veju'e maranie 'ee niara 'u'o venareje nitui Nuni kaukaraa pa'arehuna.

³³ 'Enakaivo iviasi aneja vene va'ira'omo niari 'unamutoi va'iri nitui va 'e'uhuna. Ijihuni mai-

jaho poropetia kajaho samaumaa pa'anaahuna kaivo Jerusaremi vaji 'anae kwahuna.

³⁴ Oo Jerusaremi ore Jerusaremi ore jara poropeti ka'ene irechamiume joni vu'ajija 'aniume kwamasahare 'ee ea 'aho'aka irechamiu'e joni va'ajaho muni 'aniume kwamasahara. Na'iaka mapoka kikano Na ura joni sesamaa aherame rira kwino irecha'i 'ahiuna. Areri 'u'orapo 'u'uhwaha'e huni taha vaji irechavu'e ahuma hijuja'ina'e ve'iro vejujaho ja nihoo'ura parenaura.

³⁵ Heha! Joni ara kajaho josu pare'eje ranave savasa rehuna. Na ja 'waravu. Ja Na nihoo'ura pakimu va'u'e iji'a ja ika'ina 'wahuna. Nato-hwijihuni iha 'ahi ea ka'ene roujaho merajaho 'wahuna 'iamana.

14

Sapati Jesura Atakina Vejume Maranajina

¹ Sapati vea kwino Jesuho Parasia ea nato-hwa pipuni sei 'iruma'e i'i 'ahaume va'eme ea mapoka'e Hu 'ajohareja vevirinavara.

² 'E'eme ea pina ka'ene haha hweji'inijara Huni una'i hinana.

³ Jesura eha vene roia 'ee Parasia ijá 'iama Mosisi oni tamana ea Sapatia vei veje maranihuni-jaho areri rehuna 'warumana ho pane? 'iamana.

⁴ 'Enakaivo pu ira pa'waravume Hu ea kajaho vejume marajumakavi'i ranavume va'ana.

⁵ 'Enarena Hu pu ijá 'iama Ea pipuni harihina ho purumakaui Sapatia vei 'ma'oi o'ipisa ja ea pina pava'e 'enapi ranava'a raka? 'iamana.

⁶ 'Enakaivo pu ijihuni eha areri pa'waravara.

Masuani Hine 'Ee Ea Hami 'Ahihunijina

7 Vea ka'ene Hu kivume ea ka'ene 'waravume roajipo ruha mamaa ka'ene ea mama'inapo hijuri ruhiji 'eke hi'irono nirie 'ojuma kimarena Hu aneja vene haa ika'ina 'waramana.

8 Ea 'ahopo ja napara mai'o 'wahajihuni sori va'avajaho ruha ka'ene ea mama'inapo hijuri ruhiji pa'eke hi'vara. Ijihuni maijaho ea ni'ina pina ka'ene hora 'waramajara ro'amajaho a 'uri'eje eakara ruhakaho hinama.

9 Ea ka'ene ja no'o 'waravuma roajara roareje a ijá 'wahune Ruhakaho ea ike aremaha 'wave a nih'o juna'eje va túna'i hi'ena.

10 Vea ka'ene ea a 'warave va'amajaho va'e ruha ka'ene túchama ijí apena hi'amana. 'E'irakúne ea ka'ene a 'waravume va'ajara ro'amajaho hu ijá 'wahune Napura nune kahakaro ruha maa kahi va hina 'wave iji'a ea mapoka ka'ene 'aijua rori hijujija a kame ta'arorahuna.

11 Ea irara ori'ini huni pinana ahasiri'amajaho vetie hu ajurana ohuna. 'Enakaivo ea irara ori'ini ajuaran a'umajaho vetie huni pinana 'urihuna.

12 'Enarena Hu ea ka'ene huni sei 'waravume va'ajaho ijá 'wama A ea 'aho'a'e 'iruma vaji'i ve'amajaho oni napuhija vwehija amuhija 'ee ea ka'ene 'iruma ani reji'inaka oni rori hijujija vejuro'i pu a eha veta'ejakúne pa'wara'amana.

13 A ahaja i'i 'ahae ve'amajaho ea ka'ene une-unecha pa'ana irivi'ina nia supavi'ina 'ee atama 'uniravi'ina 'umena'amana.

14 'E'irakúne a meraja'amana. Ijihuni maijaho pu oni eha areri pavehuna. Vea ka'ene ea ma-

maa ka'ene kwamasahajipo 'uri'avajino a eha vajahuna 'wamana.

*Sora Ni'ima'tura Ijuri Haa
(Matiu 22:1-10)*

15 Ea pina ijino pu pu'úmo hinana'omo ijara henarena Hu ijá 'wama Ea irahipo Godoni ari 'iruma ihunijaho nimerajihane? 'wamana.

16 'Ejume Hu ijá 'wama Ea pini ahaja'e i'i 'ahaume ea mapoka 'umenana.

17 'Iruma'e ihuni veijino ea ka'ene ahaja anesurijara huni pwea ranavume ea ka'ene puni ona'e vejajihi ahera'irono va'e ijá 'iama Roha! Uneunecha amairiaravarakúne roajihā 'iamana.

18 'Enakaivo pu ea kajija niho'o 'unama ani ani'ina mapoka'e saravara. Ea pini pwea kajaho ijá 'wama Na mwe'a maiu'ina'e 'imejuta'omo ijí ka'i 'ahiu'e va'ukúne maki'eje va'uma 'wamana.

19 'Ejume pini ijá 'wama Na purumakaua iropu 'imejuta'omo na ijí 'eka irechama ki'i va'ukúne maki'eje va'uma 'wamana.

20 'Ejume ei pini ijá 'wama Na iviamaaakano napara 'wahuta'omo ijihuna'e na pavuhuna 'wamana.

21 'Ejume pweijaho 'unama va'e huni nato-hwijaho ijá 'waramana. 'Ejume huni natohwi-jaho ajivume huni pwea ijá 'wama Marako va'e 'unamutoi 'ee ara mama'ina puni utorijino ea ka'ene 'iruma pa'ana 'ee irivi'ina 'ee nia supavi'inijihi aherame roa 'wamana.

22 'Enarena ijí pwea huna kajara ijá 'wama Ara 'warimajaho na nivejuta kaivo ruha mapoka'e navu 'wamana.

²³ 'Ejume natohwijara ijá 'wama Va'e 'unamutoa 'ee juara arijino ea kimareje 'warave roa kame nuni sea itu'onama 'wamana.

²⁴ Na nima'a 'waravuta'omo ea ka'ene nara marako ona vejume paroajija 'iruma ikehuni sahura pahuna 'wamana 'iamana.

*Tisaiporu Rehuni 'Ahijijina
(Matiu 10:37-38)*

²⁵ Ea mapoka Hu tamatihe va'eme Hu ta'arohe ijá 'iama

²⁶ Ea irara Nuni ro'i 'ahae ve'amajaho hu omaha oaha huni napara harihwaha ma'ipwaha 'ee huni haha 'u'o ori'ina pase'amajaho hu Nuni tisaiporua areri parehuna.

²⁷ Ea irara Na'e 'ararihie sisea piunamareje niho'o pakisina rene nami'amajaho hu Nuni pwea rehunijaho areria pana.

²⁸ Ea irara ara'e ve'i 'ahaujaho 'ú hu marako asuma hine monia icharo 'imene 'ee monia areri reje 'imé parahuniji vwhianune?

²⁹ Vejuro'i hararu ve'ika'i pavesirihe ea mapoka kama 'ijahareje ijá 'wahuna

³⁰ Eakaho nami'une ve'irepuna'i venana kaivo hu pave para'eju'e namu kaji kaha 'wahuna.

³¹ 'Enaho kini irara kini pina'i 'ara'i venujaho 'ú hu marako paasuma hine pira'aramuva'o huni ea mapoka (10,000) ijaho 'ee pipuni ea mapoka (20,000) ka'ene hu hu'umo 'ara'iro roujaho hu areri rehunijaho kama henare'e iji'a va'une?

³² Hu areri harura pare'amajaho ea irechave pura va'e ea natohwa pina mai'o kwaa jori ro'eje piuname ruramareje are'ika'i mataume hiha 'ihuna.

³³ 'Enajihuna'e ja ea irara huni uneunecha mapoka ka'ene navujipo pase'amajaho hu Nuni tisaiporu areri parehuna.

*Misa Vwea Pa'ajina
(Matiu 5:13; Maka 9:50)*

³⁴ Misa niho'o mamaa kaivo vea ka'ene ijihuni vwea pa'are'amajaho 'ú ichá veje vwea vukú'o re'ena?

³⁵ Ijí misa kajara mwe'a usetie mwe'a marahuna pane 'ee teachaha usetie teamarahuna pana. 'Enakúne ea irara ataa rukina re'amajaho ataa apúsame he'amana 'iamana.

15

*Sipia Raname Savajina
(Matiu 18:12-14)*

¹ Na'ia kwino ea ka'ene takisia apeji'ina 'ee ea sisea maho'o roe Huni rori vu'a he'i roara.

² 'Ejume Parasia 'ee Sikuraipi niho'o hine sui'i ijá 'wava Ea ikaho ea sisea aherame pu pu'úmo 'iruma inuna.

³ 'Ejumakame Hu ike haakaho 'waramana.

⁴ 'Ena'omo ja ichá'ina vwhajo? Ei pini sipia mapoka mapoka (100) nami'ira'omo kwinu paka'ipisa hu ichá vej'e? 'Ú hu 'aho'a ka'ene (99) ijija huri'i irechami'i kaivo va'e kwinu'wi sava'a raka?

⁵⁻⁶ Vea ka'ene hu piunamujaho teamavu'e apene twaitoi raname rouna. Vea ka'ene ari roujaho napuhwaha 'ee ea ka'ene huni ara rori hijujija ijá 'iama Na nuni sipia ka'ene ranama

savujaho niipiunavutakúne nú pu'úmo mari'uhá 'iamana.

⁷ Ea arira ka'ene (99) ijija pana kaivo ea kwinu'wi huni sisea nahama 'warama ta'arohujaho akúpa 'aha niho'o ni'ima'ura mari'uvura.

Monia Ranama Savajina

⁸ 'Enaho napara pina monia siriva iropu ropu na'ira'omo oma kwino 'o'ipisa hu ichá'ina'e veja'e? Hu ira 'ene túa anasavi'i masuanu'wi sea vajaka mapoka kajino tinuva'o kame apeja'a.

⁹ Hu ijí kama ape'ama jihuna'e huni napuhija 'ee ehwaha 'umena roajima ahuma hijakivi'i hu pu ijá 'iava Nú pu'úmo mari'uhá! Ijihuni maijaho na nuni monia kwinu ranavujaho na nikame apejuta.

¹⁰ 'Unama nikwinu'ina kajino Na ja 'waravu. Ea sisea kwinu huni sisea vwhane temuvume nahama 'warama jihuna'e niho'o Godoni ona'oji'ina puni una'i teamarasahe mari'uvura 'iamana.

Hariha Ranama Savajina

¹¹ 'Ejume Hu ijá 'iama Ea pina harihwaha no'ohe'ina.

¹² 'Ena'omo 'u'uijara omaha ijá 'wama Amo nuni aachi'ijaho iviamai vajiha 'wavume omahi aachia punijaho ahaame pwina'a 'u'ua'e vajahe 'ee pwina poka'e vajahana.

¹³ 'Ejume na'ia josua pa'are'eme 'u'uijara 'urinajaho huni kukua mapoka kajaho 'eke kwaajori va'e hine huni kukua mapoka kajaho majikarino hine ato'aruvume paranana.

14 Hu monia mapoka ka'ene hununa'i navajaho niho'o ato'aruma paranana. 'E'eme kwaa ara kajaho ora vea ni'lima'ura rejumakame matuna'e hijara. 'Ejume hu matupuna'e pivunanamana.

15 'Ejume hu va'e aea pihuni kaukara'e ve'i 'ahaume 'waravume hu ranavume va'e huni maha mapoka 'ajoha'i va'ana.

16 'Ejume hu ijí asuna ka'ene maha'e vajihaji kimajaho niho'o mamaa'e rejume i'i 'ahaana. Ijihuni maijaho ea hu 'iruma ihuna pavajahara.

17 'Ejumakame hu hine vwhianu va'o ijá rona Ea ka'ene nuni omijihuni kaukara'e vejujija 'iruma mapoka'e i'eju'e na iviamai ike matupuna'e kwa'i 'ahiu'e veju.

18 'Ena'omo na iviamaa 'urina va'e amoho ijá 'wahune Amo na Godiho sise'i 'aha'e 'ee A sise'i 'ahauta.

19 'Enakúne na oni hariha pa'wi'amana kaivo ara ea ka'ene oni kaukara'e vejijihi 'ahiu ja'ina'e 'ahi'amana 'wahuna ronana.

20 'Enarena hu 'urine omahoni 'unama va'ana. Hu mai'o kwaa jori ro'eme omahi kamarena natohwa'e temuvume ariha ninuma va'e hariaha aharu 'oname ura mina vene nirisamana.

21 'Ejume hariahi ijá 'wama Amo na Godiho sise'i 'ahae 'ee a sise'i 'ahauta. 'Ena'omo na oni hariha 'wihunijaho mai'o areri parenu 'wamana.

22 'Enaka'i omahi pwehwaha ijá 'iama Mammako va'e ateha mavarasa'inijino apena roe apúsamaha. 'Ene rinia apena roe arinamahe 'ee mumora hwana hwanamaha.

23 'Enareje purumakau 'u'ua poma paraji'inijino 'anae iji'i temarasaha.

24 Ijihuni maijaho hariha nunakaho nikwa-

mana kaivo 'urina roana 'ee hu niranavuma va'e paranana vo vukú'o piunavuta 'iamana. 'Ejume pu aneja vene ahaja ijí'i niho'o temarassaha para-jara.

²⁵ Pu hine 'iruma'e i'eme hariha ka'ene pokijaho juasi'i 'urahonana. 'Ena'omo hu 'uname ara rori roi'i chaja irumuna ka'ene javavajaho henana.

²⁶ 'Ejume hu pwea pina 'umejume roume apoma ijá 'wama Kahaho iraka'e vejo? 'wamana.

²⁷ 'Ejume pwea kajara ijá 'wama Oni 'u'uijara unenu'u pina pare'eme 'unama roajihuna'e omuni purumakau 'u'ua poma paraji'ina 'anae inare'e ijihuna'e irano'a apeju 'wamana.

²⁸ 'Ejumakame hariaha pokijaho niho'o ajima parajume sei vahuna ura parejume omahi ariha roe pokijara va'e sea vaji aji'amarono 'ejahaana.

²⁹ 'Ejume hu omaha eha vene ijá 'wama Na juara mapoka'e ikino a hu'úmo hine oni pwea puna'i kaukaraa vejura. 'Ene mai'o na'ia kwinu a papataarorahuta. 'Enakaivo a iraka'e na mi-hane? A niho'o kotia kwinu'wi pamihume na napuhu nú pu'úmo 'iruma vene ijuta.

³⁰ 'Enakaivo ike oni hariha kajaho ara kukua ka'ene vajahajaho 'eka va'e paranaha'e sar-avi'i ato'aruma parane kú'o 'unama rou'e a purumakau 'u'ua povilinakaho huna'e 'anaana 'wamana.

³¹ 'Enakaivo omahi ijá 'wama Nuni harihe a ikino nú pu'úmo hinujihuna'e uneunecha mapokakija nunijaho ona.

³² 'Enakaivo nú iviamaa 'iruma ine teamanuhuni jihuni maijaho oni 'u'uijaho

nikwamana kaivo vukú'o 'urine 'ee niranavuma va'e parana vo iviamaa kú'o kavara 'wamana 'iamana.

16

'Ajohi'ina Ka'ene Ariramaa Pa'ajina

¹ Hu Huni tisaiporu ijá 'iama Ea pina kukua ani reji'ini ea pina apene huni monia'e 'ajo'amarono ranamana kaivo hu he'eme ea 'ahopo ijá 'wava Ea ka'ene oni monia 'ajohi'inijaho monia majikarino ato'arumu 'wavume henana.

² 'Enarena hu 'umejume roume ijá 'wama Vu'a ka'ene ike 'wavu'e na hejukaho nimaae? Na a ranama'iro vejukúne iviamaa va'e nuni monia ka'ene ichihichihi va'ajihuni 'unamijaho amairiu va'o apena ro najiha kavuma 'wamana.

³ Hu ijá rona Nuni natohwijaho na'e ranami'i venuna'omo na vi ichá ve'eju ronana. Na harura pana'omo na mwe'a areri pa'uhune 'ee na va'e ea'e jarirahuna junimu.

⁴ Na kaukara ranamileje nara iraka ka'ene vehunijaho na nivwinimu. Na kaukara ranami'avajaho napuhu nupo 'ajorime puni sei aherima ajihuna.

⁵ 'Enarena hu ea ka'ene huni natohwiji monia vajahunijija 'umenaume roajivara. 'Ejume ea pina apoma ijá 'wama A 'weru icharo nuni natohwa vajahane? 'wamana.

⁶ Hu ijá 'wama Na 'weru mapoka mapoka (100) 'ekuta 'wamana. 'Ene hu ijá 'wama Ara moni icharo vehuni heha ijaho ikenakúne asuma hine (50) vena 'wamana.

⁷ Hu ea pina apoma ijá 'wama A nuni natohwi-jaho icharo vajahane? 'wamana. Hu ijá 'wama Na 'witia pekia mapoka (100) 'ekuta 'wamana. 'Ejume ea ka'ene ijí kaukara 'ajohi'inijara na-pusa'i 'ahauma ijá 'wama Ara moni icharo ve-huni heha ijaho ikenakúne asuma hine (80) vena 'wamana.

⁸ Ea ka'ene kukua anesurijarahara ea ka'ene kaukara 'ajohuji kamarena ijá rona Niho'o pisivie paraju kavu ronana. 'Enarena hamि vvi-haha. Areri ija'ina'e ea ka'ene mwe'a ikino hijujaho 'unama ija'ina'e ea pisimiura kaivo ea ka'ene hanaji'ini hijujija ija'ina pavejura 'iamana.

⁹ 'Enarena Na ja 'waravu. Monia puni 'unama ariri jihuniji napura ve'irakúne ijara ni'ajihе sisea pave'avara. Ijihuni maijaho 'unama ija'ina'e vene ni'ajihareje ara ka'ene majama hihunijino vahuna.

¹⁰ Ea irara uneunecha ma'u'umaa hamि vene ihajinanamujaho hu uneunecha mama'ina 'u'o hamि vene ihajinanamiuna. 'Enakaivo ea irara uneunecha ma'u'uma 'eke arira pavenujaho hu mama'ina 'u'o arira pavenuna.

¹¹ Ijihuni hahi ja monia ka'ene 'unama sisei jihunijaho arira pa'ajo'avajaho ea irara monia ka'ene aririjaho ja vaji'ena?

¹² 'Ene ja uneunecha ea 'ahopunijija hamia pa'ajo'avajaho irara vu jona rehunijaho vaji'ena?

¹³ Pwea pina mai'o mama'ina no'ohe'i puni kaukara pavehuna. Hu ea pina oja ma'ika'i pina sehuna. 'Ee ea pina teama'i kaivo pina sehuna. Ijihuni hahi ja Godi oja mahe 'ee monia oja

mahuna areria parehuna 'iamana.

*Jesura Vu'a 'Aho'a Ka'ene 'Waramajina
(Matiu 11:12-13; 5:31-35; Maka 10:11-12)*

14 'Ejume Parasia ijí henareja Hu apene 'ijahara. Ijihuni maijaho pu monia'e oja mihuni jihuna'e avajara.

15 'Ejume Hu pu ijá 'iama Ja emaapo ki'leju'e hami 'urahe oju kaivo Godira joni oja vaja nihe paraji'ina. Ijihuni maijaho iraka ka'ene emaapo vwhahu'e mama'ina rejujaho Godira kimujaho ijijahija niho'o sisemaa.

16 Nitama rene varapa tamana 'ee poropetiapo 'waramape rouva'o roe Jonira hinaji 'e'ujara. Vea kaji rene Godoni arijihuni vu'ijaho najahukame ea mapokakaho ijí 'unama kajino va'aru'iro pii-jaravu.

17 Mwe'a 'ee akúpákaho pa'arehuna kaivo Godoni ira niho'o papa'arehuna.

18 'Enajihuna'e parua ka'ene huni napara kaji ranamajara veje hu parua pina ve'amajaho pu sisea vehuna. 'Ee ea irara napara ka'ene ranavi'iniji 'wa'amajaho hu 'u'o sisea vehuna.

*Uneunecha Mapoka Rukiniji'o Rasarasi Puni
Vu'lijina*

19 Nitama ea pina ateha niho'o mavarasa'ini same 'ee uneunecha mapoka ani re'eju'e ara mavarasa'ini 'iruma mamai iji'i hinuna.

20-21 'E'eju'e ea pina pivuji'ina huni iha Rasarasina 'wavujaho niho'o 'iruma pa'ana 'ee matana reji'ina'omo roe ea ka'ene 'iruma ani reji'ina kajihuni vwicha jiami 'iruma sahura

ka'ene arihuji i'i 'ahau'e roe hinuna. 'E'eju'e 'uapo roe huni matana sihura.

22 'Enuva'o ea ka'ene 'iruma pa'ajaho kwavume Godoni 'ona oji'inapo apene va'e Eparahami oni rori rana'eme ea ka'ene 'iruma ani rej'i'inija 'u'o kwavume kwananavara.

23 Hu vena ka'ene pautarutusavi'inijino rej'i'i a'ama kavume Eparahami oni rori Rasarasiho hinana.

24 'Ejume hu ijá 'umena Nuni oma Eparahami na numirime Rasarasi ranave roe ija toi apúsame nuni mitara 'ahi ranave ohoa ka'ene renujaho paha renama. Ijihuni maijaho na niho'o ni'ima'ura hiani'eju'e vena rirakino hijukúne 'umenana.

25 'Enakaivo Eparahamira ijá 'wama Harihe a mwe'i hinajaho vviha'amana. A mari'uv'i'i hinana. 'Ene uneunecha mamaa 'ekana kaivo Rasarasiho sisea'e piunama jihuna'e hu iviamaa mamaa piuname teama'eju'e a haha ni'ima'ura hianamu.

26 'Ene nú areri ea ka'ene ika'ahuni hijukija kara'ahuna pavu'e 'ee karahuni hijujija ika'ahuna parohuna. Ijihuni maijaho raraha natohma ronu ronu rejara'omo ijí apúsama kara'i ajihuna niho'o areria pana 'wamana.

27-28 'Ejume ea ka'ene uneunecha mapoka ani rej'i'inijara ijá 'wama Oma nune na jarirame 'waravukúne Rasirasiho ranave nuni omijihuni sei va'amana. Ijihuni maijaho popu nuna iropu hijukúne 'warave pu ike ara ka'ene haha hinavi'inakaho ea piña paro'amana 'wamana.

29 Eparahamira ijá 'wama Popuana Mosisiho

'ee poropeti 'waravi'inijija hijukúne ijipo 'warave heja 'wamana.

³⁰ 'Ejume hu ijá 'wama Pana. Nuni oma Eparahami ijaho mai'o areri pareni'ena kaivo ei pini kwamani 'urina va'e 'wara'ipisa pu areri puni sisea ta'aroha'a 'wamana.

³¹ Pu areri Mosisiho 'ee poropeti panimaa rojuji'huna'e ei pini kwamani 'urina va'e 'waramajaho pu panimaa rohuna 'wamana.

17

*Sisea 'Ee 'Unama Ichá'ina'e Vehunijina
(Matiu 18:6-7, 21-22; Maka 9:42)*

¹ Jesura Huni tisaiporu ijá 'iama Siseijaho na'ia mapoka namuna. 'Enakaivo ea ka'ene ijí veju'e ea sisea vejujaho túna'i eha sisea ni'ima'ura ape-huna.

² Ea ka'ene veju'e sesamakihi sisea vejujaho muna natohwa apene oroa 'ahi vevahame soha vaji pi'onave kwa'ipisa areri reja'a.

³ 'Enakúne ojono hamí hamí 'ajo'avara. 'Ene joni ei pini sisea ve'amajaho 'urarahe hu huni sisei temu'amajaho vwihane are'amana.

⁴ 'Enareje hu vea nikwinu'ina vaja kajino 'aha iropu no'o ja sisea vetiareje hu roe siseaka vena kajara temuve are'irono nahama 'warava ka'avajaho vwihana are'avara 'iamana.

Nimai Roa

⁵ Apasorupo Natohwijaho ijá 'wava Núni ni-maaroiji veje natohwa'e renama 'wavara.

6 Natohwijara ijá 'iama Jara nimaa rojujaho kwava 'ina sa'ina'e re'ipisa ja maraa 'warave joni ira hene tanapi tajahene va'e sohi vaji namija'a.

Pwehuni Kaukaraijina

7 Pwea joni pini juasi'i soa samoja ho sipia'e 'ajoho'ira'omo ro'ipisa ja ija'ina pa'wava'a Marako roe hine 'iruma ona ina pa'wava'a.

8 'Enakaivo ja ijá 'wava'a Marako nuni 'iruma amairie 'aijua 'ahi irechamihe na 'iruma ija kama'e iji'a túna'i oni 'iruma i'amana 'wava'a.

9 'Ejakame huni natohwijahoh mai'o pweaha kajaho patea mani 'wava'a. Ijihuni maijaho ijaho huni kaukara ijihuna'e hu venuna 'iamana.

10 Ija'ina'e ja Nara 'warauti Nuni ira 'ahijiru ve'i kaivo ja ojono joni oji pa'ene ve'avajaho nú pwea sisea 'waha 'ee nú núni kaukara ijihuna'e vejara 'waha 'iamana.

Jesura Reporosia Rukina Ea Iropuropu Vejume Maraniajina

11 Hu Jerusaremi va'i 'ahaume Sameria ropua navume Karari ropuna'i na'eme Hu riri va'ana.

12 'Enarena Hu ara pini va'e 'e'u'eme ea iropu ropu reporosia rukina piunimajaho pu karori namijara.

13 'Ene pu ira ajira ijá 'umeja Jesu ka'ene Natohwij'i'o nú numiruma 'umejara.

14 'Ejume Hu kima ijá 'iama Ja va'e pirisiti joni haha naja'avara 'iamana. 'Ejume pu 'unamutoi va'eme puni reporosia ni'aha kwino pa'arenaara.

15 'E'eme ea kwino huni haha'e kamajaho huni reporosia pa'arenana kamarena 'uname roi'i Godiho nihoo'ira ajira'e ta'arohana.

16 'Ena hu roe Huni una'i kajino ona apena ar-ihe niname Jesuho teimanu 'wamana. Ea ka'ene ijá venajaho Sameria ora.

17 'Ejume Jesura eha vene ijá 'wama Ea ja iropu ropu maraniana kaivo ea iropu no'ona no'o ijano ichihune?

18 Iraka vene ike ea apiorakara huhuso 'unama roe Godiho ta'aro'i roane? 'wamana.

19 'Enarena Hu hu ijá 'wama 'Urine va'a! Ara nimaa ronujara venaume maranaana 'wamana.

*Kini Huni Arijara Rohunijina
(Matiu 24:23-28, 37-41)*

20 Parasia Hu apoma ijá 'wava Vea vecha Godoni arijaho roe aneja re'ena 'wavara. 'Ejume Hu ijá 'iama Godoni arijaho aacha ani ani'ina pare'eje rohuna. 'Ejakame ja pakahuna.

21 Ea mai'o ija'ina pa'iahuna. Heha! Ikena karona pa'iahuna. Ijihuni maijaho Godoni arijaho ijí joni vajina 'iamana.

22 'Enarena Hu Huni tisaiporu ijá 'iama Mai'o na'ia pini Emaa Puni Hariha kahuna ura renahuna kaivo ja Hu ikaho pakahuna.

23 'Ejakame ea 'ahopo ijá 'iahuna Karohunakúne kaha 'ee ikehunakúne kaha ijá 'iava he'avajaho ja pausema va'e ki'avara.

24 Areri vei akúpi 'ahi kama'i pi'ima ro va'e karo'i 'onu kaja'ina'e Ema Puni Harihijihuni veijaho ija'ina rehuna.

25 'Enakaivo Hu maraku'ijaho haha natohma
hiame 'ee ea ka'ene iviamai hijujija Hu kame
pataarohuna.

26 Vea ka'ene Emaa Puni Harihijuni veijaho
ea ka'ene iki mwe'i hi'avajaho areri ea ka'ene
Noara mwe'i hi'eme hijaja'ina'e hihuna.

27 Noa oni veijino ea mapokakija hine 'iruma'e
ine 'ee toa sisea ine 'ee napasinene 'ee napara
same areme apene va'eme Noaho huni sisima
vaji va'eme sai hirame ea mapoka kajija 'anume
kwamasahara.

28 Vukú'o areri Rati oni veijino ea ka'ene hijaja'ina'e hihuna. Ea mapoka kajija hine 'iruma
ine 'ee toa sisea ine uneunecha 'imene 'ee ea
'aho'a 'imena'e 'ee soa same 'ee ara vejil'i hijara.

29 'E'eme vea ka'ene Ratira ara iha Satami
arema va'eme vena kahino akúpa 'ahi rena roe
ea mapoka kajija re paranana.

30 Ija'ina'e vea ka'ene Emaa Puni Harihijara
ro'amani veijaho ijá rehuna.

31 Vea kajaho ea pina atahuri nami'amajaho hu
kú'o paariha va'e huni kukua ekahune 'ee ea pina
juasi'i o'amajaho hu pa'unama ara vahuna.

32 Rati oni napari venaji vwhaha.

33 'Eje ea irara huni hiji ori ni'ajara'amajaho
huni hijaho ranahuna. 'Ene ea irara huni hiji
ori rana'amajaho hu huni hia 'unanahuna.

34 Na ja 'waravu. Na'ia kaji ea no'o ahuma notura'omo ea pina apena va'eje ea pina ranahuna.

35 'Ene napara no'o hine ahuma kaukara
ve'ira'omo pina apena va'eje pina ranahuna.

36 Ea no'o juasi'i 'urahe o'ira'omo pina apene
va'eje pina ranahuna 'iamana.

³⁷ 'Ejume pu Hu eha vene ijá 'wava Natohwe vea vecha ijaho re'ena 'wavara. 'Ejume Hu ija 'iama Unenu'u pini kwama na'amajaho púrúha ijá 'emojura 'iamana.

18

Napara Amunijaho 'Ee 'Otua Heji'inijihuni Haa

¹ 'Enarena Hu ike haakaho 'waramana. Ijihuni maijaho Hu ura renajaho pu majamano hine siporua pasena'eje 'o'avarono 'waramana.

² Ara natohwua pini ea 'otua heji'ina pina Godiho pajuhame 'ee ea 'ahopuni hora paveji'i hinuna.

³ 'Ena'omo amuna pina 'u'o ijí ara kajino hinuna'omo hu na'ia mapoka'e va'e 'otua ve'i 'ahau'e pasonanananamuna. Napara kajara hu ijá 'wamune Ea pini na hine sisei 'ahiukúne ni'ajihia 'wamuna.

⁴ 'Enaka'l'i nitama rene hu hine napara kajaho pataarohana kaivo na'ia kwino hu ijá rona Na Godiho pajuhame 'ee ea 'ahopuni hora pavejura.

⁵ 'Enakaivo amunakaho majama roe 'warimu jihuna'e hora ura renuji na vehuna. Ijihuni maijaho hora pasonanavakame na siseranhuni jihuna'e na ni'ajahuna ronana.

⁶ 'Enarena Natohwijara ijá 'iama Ea ka'ene 'otua heji'ina siseijara iraka ka'ene 'waramaji heha!

⁷ 'Ú Godiho Huni ehija ka'ene Hura iji pijihajipo iraka ka'ene veiri'a na'ia ijikano siheria pave'i kaivo jarivi'i navujaho Hu arimaa pamihuna raka? 'Ú Hu hine tetamu va'u'e iji'a vajihuna raka?

8 Na nimai ja 'waravu. Iraka ka'ene arira maijino Hu pu marako vajihuna. 'Enakaivo vea ka'ene Emaa Puni Harihijara ro'amajaho ea vi icharo iki mwe'i nimaa roji'ina hihuna 'iamana.

Parasia 'Ee Takisia 'Eki'ina Puni Haa

9 'Enarena Hu haa ike 'u'o ea ka'ene pu pusumano arira maa ro'ika'i ea 'aho'a senavujiji 'waramana.

10 Na'ia pini ea no'o kahi Temiporu vaji siporua'e 'o'i 'ahiume va'ara. Ea pina Parasia 'ee ea pinijaho takisia'e apeji'ina.

11 Ea ka'ene Parasi ijaho huhusu namiji'i siporua ika'ina'e 'onana. Godi teimani 'wavujaho na ea 'aho'a ka'ene pu pusumano vwhane 'ee ira'ata apene 'ee napara hurichavu ja'ina pana. Na A teimani 'wavy. Ijihuni maijaho na ea ka'ene takisia'e apeji'ina ka'ene kame naminu kaji vare'ina pana.

12 Na hora kwino vaji 'aha no'o 'aura areme 'ee uneunecha ka'ene na 'ekujaho 'aho'a taisia veji'i hijura 'uáme 'onana.

13 'Enakaivo ea ka'ene takisia apeji'inijaho karori namine huni niura akúpa 'aha paniri'i kaivo túra 'ahi 'anai'i ijá 'wama Godi na ea siseakúne numirima 'wamana.

14 'Enajihuna'e Na ja nimaa 'waravu. Ea kajaho arira rena huni sei va'ana kaivo pinijaho pana. 'Ena'omo ea irara ori'ini huni pinana ahásiri'amajaho Godira vetie hu ajuarana ohuna. 'Enakaivo ea irara ori'ini ajuara'amajaho Hu vetie huni pinana 'urihuna 'iamana.

*Jesura Sesamaa Merajihajina
(Matiu 19:13-15; Maka 10:13-16)*

¹⁵ 'Enakaivo ea 'aho'apo kasimaa aherame 'eka roume Hu Huni ija puni húmata 'ahi irechami'amarono roajivara kaivo Huni tisaiporuepo eaka mapoka kajija 'urarahara.

¹⁶ 'Enakaivo Jesura ijá 'iama Kasima kajija maki'eje Nuni roajiva kaivo ja patanu'uriha. Iji-huni maijaho Godoni arijaho kasimaa ikipo vejuja'ina'e vejuihipuni ara.

¹⁷ Na nimaan nimai ja 'waravu. Ea irara sesamapo Godoni ara apeju ja'ina'e paape'amajaho Godoni ara pavahuna 'iamana.

*Ea Uneunecha Rukima'uriijina
(Matiu 19:16-30; Maka 10:17-31)*

¹⁸ Jua puni ea natohwi Hu apoma ijá 'wama Najuhi'ina mavarasa'ine na unenu'u pina maa ichá'ina'e venareje majama hihunijaho ape'ejo? 'wamana.

¹⁹ 'Ejume Jesura ijá 'wama Irakijihuna'e a Na mamaan 'wimo? Godira nikwinu'wi Huhuri mamaana.

²⁰ A Godoni tamana nihenuna. A napara patura'amane 'ee ea pa'anaa kwa'amane 'ee nesa paape'amane 'ee a ea pina sisea panama'amana. 'Ene omuna 'ee ohuna ijihipuni ira hena ve'amana 'wamana.

²¹ 'Ejume hu ijá 'wama Na nitama sesamu'uru rene tamana kajaho hamि venapena routa 'wamana.

²² 'Enakaivo Jesu ijí henarena Hu ijá 'wama A unenu'u pina kwinu mai'o areri pa'ana. A va'e oni uneunecha mapoka 'eke 'imenareja'e monia

ona 'eka ea uneunecha pa'aji vaji'amaji'a oni uneunecha mamaa akúpa 'aha nahuna. 'E'eje iji'a roe Na 'ararihi'amana 'wamana.

²³ Ea kajaho ijí henarena temumana. Ijihuni maijaho hu niho'o kukua mapoka rukini jihuna'e avanana.

²⁴ 'E'eme Jesura ea kajaho kavi'i ijá 'iama Ea ka'ene uneunecha mapoka rukinijipo Godoni 'unami vahunijaho niho'o kisina.

²⁵ 'Enakaivo mahi nitirua huni titi vaji aruma vahuna samaa kaivo ea kukua uneunecha rukima'urijara Godoni ari vahunijaho kikisima'ura 'iamana.

²⁶ Ea 'aho'a ijí henareja ijá 'wava Ea irahipo majama hihuna ape'eja 'wavara.

²⁷ 'Enakaivo Hu ijá 'iama Emapo ija'ina vehuna niho'o areria pana kaivo Godira Huhuso ijá kajaho vehuna 'iamana.

²⁸ 'Ejume Pitara ijá 'wama Hena! Nú núni ara are'i kaivo A 'ararihae oju 'wamana.

²⁹ 'Ejume Hu ijá 'iama Na nimaa nimai ja 'waravu. Ea pina mai'o huni ara napara vwehwaha emahwaha 'ee sesahwaha Godoni arijhuna'e irechamiajara

³⁰ hu niho'o iviamaa iki 'aha mapoka 'ekareje túna'i majama hihuna apehuna 'iamana.

*Jesura Kwahuni Vu'a No'opisuji Rona
'Waramajina
(Matiu 20:17-19)*

³¹ 'Enarena Hu ea iropu ropu no'o aherame ani va'arame ijá 'iama Heha! Nú Jerusaremi va'iro vejura'omo poropeti nitama Ema Puni Harihiji

uneunecha ka'ene rehunaka vejajaho nima'a'e
rehuna.

³² 'Ene pu Hu apene Jenitaru mihe pu apene
sipana asutie 'ee sise'i 'ahae 'ee chera pisotihuna.

³³ 'Ee hisi vene hijahe 'ee pu Hu 'anae kwahuna
kaivo vea no'opisu mwe'i vaji namareje iji'a kú'o
'uruhuna 'iamana.

³⁴ 'Ene pu niho'o ma'uako pina pahejara. Iji-
huni majaho iraka ka'ene 'waramajaho ijihuni
maa vaji navumakame pu pahejara.

*Jesura Nisira Rukina Ka'ene Nia Pa'aji Vejume
Maranajina*

(Matiu 20:29-34; Maka 10:46-52)

³⁵ Hu Jeriko rori ro'eme ea pina nia supavi'ina
'unamutoi asuma hine ea jariravi'i hinana.

³⁶ Hu hejume ea mapoka'e ruva'ume henarame
aporame ijá 'iamma Ikaho iraka'e vejo? 'iamana.

³⁷ 'Ejume pu ijá 'wava Jesu ka'ene Nasareti
orijara roa ruva'u 'wavara.

³⁸ 'Ejume hu ijá 'umena Jesu ka'ene Teviti oni
Harihakere numirima 'umeñana.

³⁹ Ea ka'ene urasahe va'ajipo 'urarahe irano'a
are'amarono 'waravara. 'Enakaivo hu ira
ajira'e ijá 'umena Teviti oni Harihe numirima
'umenana.

⁴⁰ 'Ejume Jesuho areme nami'ika'i 'waravume
pu ahema apene Huni ro'avarono 'waramana.
Hu Jesuni rori ro'eme Hu apoma ijá 'wama

⁴¹ Na iraka'e a veta'urono a ura renao?
'wamana. 'Ejume hu ijá 'wama Natohwe na ura
kú'o nia niri'i 'ahiu 'wamana.

⁴² 'Ejume Jesura ijá 'wama Ara nima'a ronujara
veju'e maranaukúne nia niria 'wamana.

43 Hu ni'aha kwinu nia nirie Jesu 'ararihae oji'i Godiho teimani 'wamana. 'Ejume ea mapoka kajija ijí kamareja Godiho ta'arohara.

19

Jesu'o Sakiasi Puni Vu'ijina

1 Hu Jeriko ari ma'aha rira kajino va'ana.

2 Ea pina takisia'e apeji'ina ni'ine 'ee monia nih'o ani reji'ina iha huna Sakiasina'omo ara kajino hinuna.

3 'Enakaivo ea kajaho ea tu'umaa'omo Jesu ka'i 'ahaume venana kaivo eaka mapokijipo nuhaume pakamana.

4 'Enarena hu urane ninuma va'e turipa 'ahi Jesura vahuni jihuniji va'e ka'i 'ahaume hinana.

5 'E'eme Jesura roe hora hinani hari nami'ika'i a'ame kamarena ijá 'wama Sakiasi mamako ar-ihia roa. Ijihuni maijaho Na iviasa oni sei vu'e hi'ejukúne 'wamana.

6 'Ejume hu mamako ariha roe Hu 'ajomana.

7 'Ejume pu ea mapoka ijí kamareja su'aravi'i ijá 'wava Hu ea ikaho ea sisea ikehuni sei va'u 'wavara.

8 'Ejume Sakiasira 'urine Natohwijaho ijá 'wama Hena! Natohwe na nuni kukua pwinana'a ea ka'ene uneunecha pa'ajihii vajihe 'ee nara ea 'ahopuni nesa'e apejujaho na 'aha no'ona no'ona ijano huri eha venahuna 'wamana.

9 'Ejume Jesura ijá 'wama Godoni Ni'ajihii'iniyaho iviasi sea ikino roana. Ijihuna'e ea ike 'u'o Eparahami oni hariha renana.

¹⁰ Ijihuni maijaho Ema Puni Harihijara ea ka'ene 'unama puruva renau'ukame pivusaha ojujihi sarame nianae ni'ajil'i 'ahaume roana 'wamana.

*Korutia Oma Huni Haa
(Matiu 25:14-30)*

¹¹ 'Enarena Hu ea ka'ene Huni vu'a kaji hejajiji ike haakaho 'waramana. Pu vwilijahajaho Godoni ara niro'i venu 'wavara. Ijihuni maijaho Hu Jerusaremi rori va'ajiva jihuna'e pu vwihana 'wavara.

¹² 'Enarena Hu ijá 'iama Ea pina ara pini va'e ea natohwa renareje 'unama ro'i 'ahaume va'ana.

¹³ Hu iji'a va'i 'ahaume huni pwehija ea iropu ropuna'omo 'umenaume roajivume ea kwinu kwinu monia (K20) vajihai ijá 'iama Na va'eje monia ikaho 'eka va'e unenu'u 'aho'a ve'eje na 'unama routa 'iamana.

¹⁴ 'E'eme huni aea hura puni natohwa'e rehunijaho senavume pu ea irechamiume ona'e apena va'e ijá 'wava Nú ara núni natohwa'e rehunijaho senumu 'wa'i 'ahiume va'ajivara.

¹⁵ Ea kajaho natohwa renarena hu kú'o 'uname roana. 'Enarena hu ni'aha kwino huni pwea ka'ene hu monia vajihajaho pu monia ichá'ina'e vejaji ki'i 'ahaume 'umenaume roajivara.

¹⁶ 'Ejume ea pini ijá 'wama Natohwe ara monia (K20) ka'ene na vajihai ja'ina'e na kú'o areri ija'ina huri (K200) 'ekuta 'wamana.

¹⁷ Hu pwea kajaho ijá 'wama A niho'o mamaa'e venajihuna'e a pwea mamaa. A uneunecha ma'u'umaa hami 'ajoha jihuna'e nara ara

mama'ina iropu ropu vajahe ara ijaho 'ajo'ena 'wamana.

¹⁸ Ea pini roe ijá 'wama Ara monia (K20) ka'ene mihajino na apene huri vahame (K100) 'eka routa 'wamana.

¹⁹ Hu ea kaji ijá 'wama A ara mama'ina iropu 'ajohuna 'wamana.

²⁰ Ea pini roarena ijá 'wama Natohwe oni monia na akisi mwama ranavutakúne apena.

²¹ A ea ajisina'omo soa ka'ene a pasamajaho a juara samuna. 'Ee a oni ija pa'onajaho a menuna 'wamana.

²² 'Ejume ijí ea kajara ijá 'wama Ike niho'o pwea ka'ene ea maa pa'akera ara ichá'ina 'warama jihuni toi na eha mahuna. 'Ú a pahena pakimune? Na ea kisina'omo na raka ka'ene pairechavujaho na 'ekure? 'Ene na nuni iji pa'ojujaho 'ú na pamejure?

²³ Iraka vene monia kajaho pa'eka va'e panika vaji irecha'ira'omo na roe ijaho 'eke 'ee 'aho'a ijí huri 'eku'e? 'wamana.

²⁴ 'Enarena hu ea ka'ene ijá namijaji ijá 'iama Monia ka'ene nara vajahaji kú'o 'eka va'e ea ka'ene monia (K200) venaji maha 'iamana.

²⁵ 'Enakaivo pu hu ijá 'wava Natohwe huni monia (K200) namu 'wavara.

²⁶ Na ja 'waravu. Ea irara uneunecha rukini-jaho mapoka huri vajahuna. 'Enakaivo ea irara pa'ana re'amajaho raka ka'ene hununa'i navu-jaho 'etujahuna.

²⁷ 'Enakúne iviamaa nuni naka ka'ene nara puni natohwa'e rehunijaho ura parenajija aher-ame roe nuni una'i 'ania kwamasaha 'iamana.

*Niho'o Temaraji'i Jerusaremi Vaji Roa Arumajina
 (Matiu 21:1-11; Maka 11:1-11; Joni 12:12-19)*

²⁸ Jesuho ijá 'waravume pa'are'eme Hu urane Jerusaremi va'ana.

²⁹ Hu roe huri'a iha Arivi 'wavuraka ara iha Petapeje Petani 'wavujihuni roriji vai'i Huni tisaiporu no'ohe'i irechami'ika'i ika'ina 'waramana.

³⁰ Ja va'e ara pini usevi'i kave tonikia pirona i'ivananave namija ka'avajaho ea mai'o ijihuni toi pa'oji'inakúne rasame apene ro'avara.

³¹ Ea 'ahopo aporame ijá 'iava he'avajaho Ja iraka'e vene rasavo? 'iava he'avajaho ijá 'ia'avara. Nuni Natohwijara ura reju'e ijihuna'e avaju 'ia'avara 'iamana.

³² 'Ejume pu vai'i kivume uneunecha mapoka kajija areri Hu 'warama kaja'ina'e rejara.

³³ Pu tonikia pirona kaji rasa'eme ea anesuri aporame ijá 'iama Ja iraka'e ve'irono tonikia pirona kajaho rasavo? 'iamana.

³⁴ 'Ejume pu ijá 'wava Núni Natohwijara ura reju'e rasavu 'wavara.

³⁵ 'Ene pu tonikia pirona kajaho apene Jesuni roajivara. 'Ene ateha ijí tonikia 'aha kajino risaremu va'o Jesuho ni'ajaha apene ranavume ajime asuma hinana.

³⁶ 'Ene Hu va'eju'e pu ateha 'eke 'unamutoi risarevara.

³⁷ Pu va'ajime huri'a Arivi rori vutuijino tisaiporu mapoka'e piunime Godira uneunecha mavarasa'ina ka'ene vejume pu kivajihuna'e teimani 'wame 'ee ta'arohi'i va'ajivara.

38 Pu ijá 'umeja

Kinia ka'ene Natohwí jihuni iha 'ahi roujaho
merajaha! Matauví'ina 'akúpi 'ahi name
'ee Godí Ichutomaijí ta'aroha 'umejara.

39 'Ejume Parasia 'ahopo ea rira kajino Hu ijá
'wava Najuhi'ine Oni tisaiporu 'uraraha 'wavara.

40 'Ejume Hu eha vene ijá 'iama Na ja
'waravu. Pu irano'a are'avajaho muna ikipo
'urine mwasirihuna 'iamana.

Jesura Jerusaremiuumu Venajina

41 Hu ara natohwí jihuni rori roi kamarena
niramana.

42 Hu ijá 'wama A iviamaa uneka ka'ene venae
matauma hihuniji ape'ipisa nimaa roja'a kaivo
iviamaa a areri pakahuna.

43 Vea ijihunijara ro'eje oni nakapo roe a júhone
rora rora kaji rene roaji'eje a 'e'u'amajaho pu
tanu'urihuna.

44 Pu a niho'o tirakunahe 'ee oni sesamaa
pu'umo ea ka'ene ijihuni vaji hijujaho
ato'arumahe parane 'ee muna pina oni ruha
panahuna. Ijihuni maijaho Godira a ni'aja'i
'ahaume ro'ajaho a pakama jihuna'e avahuna
'wamana.

Jesura Temiporua Vaji Va'e Amairiajina

(Matiu 21:12-17; Maka 11:15-19; Joni 2:13-22)

45 Hu Temiporu vaji va'e ea ka'ene ijí
'ime'aravi'i hijajihija 'ararihiana.

46 Hu pu ijá 'iama Godira Huni ira vajijino
ika'ina venana.

Nuni sea Nuni siporua'e 'ohuni ara. 'Enakaivo ja
apene nesa apehuni ara'e veju 'iamana.

47 Hu veku veku Temiporu vaji va'e najahuna. 'Eju'e pirisitia mama'ina 'ee Sikuraipia 'ee emaa puni mama'inijipo 'ana'i 'ahiul'e vejura.

48 'Enakaivo pu areri parenauna. Ijihuni maijaho ea mapoka roe Hura vu'a ka'ene 'waramujaho niho'o ira avwanamie hejura.

20

*Jesuni Haruriji Rona Apovajina
(Matiu 21:23-27; Maka 11:27-33)*

1 Na'ia pini Hu Temiporu vaji hine najahe Godoni vu'a mamaiji 'wara'eme pirisitia mama'ina 'ee Sikuraipia 'ee ea mama'inapo

2 Hu ijá 'wava A harura irakijara rejuven'e 'ee irara harura ikaho mahu'e A uneunecha ika'ina venujaho 'waruve heja 'wavara.

3-4 'Ejume Hu eha vene ijá 'iama Ijinakúna ja mare'eje Na 'u'o ja aporave ja eha vene 'warihuna. Jonira ea toi samajaho akúpi 'ahi rena roana 'aho ema puni rena roane? 'iamana.

5 Pu hine aposarame ijá 'wava Nú ika 'wa'avajaho akúpi 'ahi rena roana 'wa'avajaho Hu ijá 'ú'ena 'Ene ja ichá vene panimaa rojare? 'ú'ena 'wavara.

6 'Enakaivo nú 'emaa punina 'wa'avajaho ea mapoka ikipo muni nú 'anúhuni jihuna'e pa'warahuna. Ijihuni maijaho pu Joniho poropetia nimaa rojura 'wavara.

7 'Enajihuna'e pu eha vene ijá 'wava Harura kajara ichihi rena roajaho nú puruva renu 'wavara.

8 'Ejume Jesura ijá 'iama Nijina'omo harura irakijara rejuven'e avajujaho Na pa'warahuna 'iamana.

*Aja'ina Juara 'Ajohi'inijihi Puni Haa
(Matiu 21:33-46; Maka 12:1-12)*

9 'Ejume Hu ea mapoka'e haa ikaho 'waramana. Ea pina juara mene ea 'aho'a'e arema'i kaivo hu kwaa jori va'e 'aha jopatu'ura hinana.

10 'E'eme juara'e sahuni vei roumakavi'i hu huni pwea ranavume va'e 'iruma huna'e 'eka ro'i 'ahaume va'ana. 'Enakaivo ea ka'ene ijí juara 'ajoha hijajipo ape hijahuva'o ranavume ija maisu va'ana.

11 'Ejume pwea pina ranavume va'ume pu apene hijahe 'ee vejume hu vahi'a apejumakavi'i ranavume ija maisu va'ana.

12 'Ejume hu huni pwea pina kú'o ranavume ijí ea ka'ene juasi'i hiju kajipo 'anae pi'onavume va'ana.

13 'Ejume eaka juara anesurijara ijá rona Na ichá'ina ve'ejo? Na nuni hariha ranave va'akame pu huni ira hena ve'eja ronana.

14 'Enakaivo ea ka'ene ijino juasi'i hijujipo kavume ariha roumakame pira'arame ijá 'wava Ea kajara juarakaho túna'i 'ajo'enakúne roe 'anaa kwa'irakúne juasi'akaho núna'e re'enakúna 'wavara.

15 'Enarame pu hu apena pi'onavume samai va'umakavi'i 'anaume kwamana. 'Enajihuna'e juara anesurijaho pu ichá 'ahi'ena?

16 Hu roareje ea ka'ene juara 'ajohajija 'anie kwamasaha 'ee juara kajaho apene ea 'aho'a'e mihuna 'iamana. 'Ejume ea kajipo henareja ijá 'wava Niho'o areri pana 'wavara.

17 'Ejume Hu kimuva'o ijá 'iama

Ike Godoni ira vaji vu'a ka'ene 'waruma ji-huni maijaho irake? Ijí muna ka'ene ara veji'inapo pi'onava kajara ivamaikaho ara kajihuni kúrúti tukeja natohwa'e rena namino? 'iamana.

¹⁸ Ea ka'ene ijihuni toi ariha ninavujaho niho'o pu'usahura 'ee muna kajara ea irahuni toi 'o'amajaho hu túa rene va ranahuna 'iamana.

*Sisana'i Takisia Vejuji Rone Apovajina
(Matiu 22:15-22; Maka 12:13-17)*

¹⁹ 'Ene Sikuraipia 'ee pirisitia mama'inijipo Hu nijihjakaro ape'i vejara. Ijihuni maijaho ijí haa kajaho pua'e ronarena 'waravume henareja ape'i vejara kaivo ea mapoka kajiji juhamareja a'revara.

²⁰ Pu Hu hamि kavi'i ea 'aho'a ea mapoka puni vaji ira'atijino ea arira rene puni vaji 'urahojara. Hura ira ichá'ina 'waravakame 'unama apene roe kavana ijí ma'irono 'urahojara.

²¹ Ijí ea kajipo Hu apoma ijá 'wava Najuhi'ine uneunecha ka'ene Ara 'warume najuhujaho nimaa. Nú nihena kavu. A ea kwini'wi vvihanuna pana kaivo Godoni 'unama nimaiji najuhu.

²² !Ú nú Sisa oni takisia vehunijaho varapa ho pane? 'wavara.

²³ 'Enakaivo Hu pura ira'ata ka'ene vejajaho kimarena ijá 'iama

²⁴ Monia oma pina najiha kavuma. Ijihuni toijaho irahuni húmatiji'o ihiji'o navo? 'iamana. 'Ejume pu Hu ijá 'wava Sisa ona 'wavara.

²⁵ 'Ejume Hu pu ijá 'iama Sisa oni kukuijaho Sisa vaja'i kaivo Godoni kukuijaho Godi vaja'avara 'iamana.

26 'Ejume pu emaa puni vaja kajino Jesu pisim-ihuna areri parenana. Pu Huni eha kaji henareja oja hianavumakame irano'a pa'arejara.

*Kwamasahé 'Urihuniji Rone Apovajina
(Matiu 22:23-33; Maka 12:18-27)*

27 Sajusi eaka kwamasahi'inijipo kú'o 'urihunijaho panimaa roji'ina'omo Huni roajivara.

28 'Ena'omo pu Hu apome ijá 'wava Najahi'ine Mosisira tamana ika'ina'e venana. Ei pini kwa'i kaivo naparaha hariha pa'ana'e ranamana. 'U'eahi napara kajaho 'wahareje pokaha ka'ene kwamajihuna'e hariha sarahuna.

29 Ea 'u'ua poka iropu no'o hijara. 'Ena'omo amurijara napara 'wahe napara hariha paape'eme hu 'u'o kwamana.

30-31 'Ejume huni ninahijara 'wahana kaivo hu 'u'o napara kajaho amuja pave'eme kwavume huni nijahijara 'wahana kaivo hu 'u'o kwamana. Ea iropu no'o napara nikwinu'ina kaji ahevvara kaivo hu amuja pave'eme pu kwamasa ranavara.

32 'E'eme napara kajaho ijí túna'i kwamana.

33 'Ena'omo vea ka'ene ea kwamasahajipo 'uri'avajaho hu irahuni napara re'ena? Ea iropu no'o hu 'wahara 'wavarā.

34-35 Jesura eha vene ijá 'iama Ea ka'ene ikino mwe'lí hijujipo napasi nehuna kaivo ea ka'ene kwamasahé 'urine majama hijujija panapasi ne-huna.

36 Pu areri Godoni 'ona oji'ina sa'ine 'ee pu Godoni harihija. Ijihuni maijaho pu Godoni ehije 'ee pu kú'o 'urihuni jihuni harihija.

³⁷ 'Enakaivo nitama Mosisira najuha ja'ina'e kwamasahi'inijija 'urijura. Ijihuni maijaho vea ka'ene veni icha vaji reji'i namajino Mosisira Natohwijaho ijá 'wama A Eparahami oni Godi 'ee Aisiki oni Godi 'ee Jekapi oni Godia 'wamana.

³⁸ Ijihuni hahi Hu iviamaa kwamasahi'ina puni Godi pana kaivo Hu mai'o hiju jihipuni Godi. 'Enakaivo Godira kimuni 'unamijaho ea mapoka mai'o hiju 'iamana.

³⁹ 'Ejumakame Sikuraipia 'aho'apo pu eha vene ijá 'wava Najahi'ine Oni eha niho'o mamaa 'wavara.

⁴⁰ 'Enareja pu unenu'u 'aho'a kú'o apohuna harura pa'arenaume paapovara.

Keriso Rone Apovajina

(Matiu 22:41-46; Maka 12:35-37)

⁴¹ Hu pu ijá 'iama Ichá vene Kerisoho Teviti oni Harihe 'úvo?

⁴²⁻⁴³ Ijihuni maijaho Tevitira ori'ini heha ka'ene Samusi vaji 'waramana.
Natohwijara nuni Natohwiji ijá 'wama A Nuni ija mana'inika'i asuma hi'eje Na Oni naka Oni mumora hari irechavuma 'wamana.

⁴⁴ Tevitira Hu Natohwa 'wamu kaivo ichá'ina vene Hu huni Hariha renane? 'iamana.

Jesura Varapa Tamaniji Najahi'iniji Jujuvu'a Waramajina

(Matiu 23:1-36; Maka 12:28-40)

⁴⁵ Ea ka'ene mapoka kajija hine he'eme Hu Huni tisaiporu ijá 'iama

⁴⁶ Sikuraipia hamि ki'avara. Pu ateha jojora same 'ee pu maketi ea 'aho'apo pu kimareje oja mihe hora puna vene 'ee hamि 'ajorame

'ee Sinakoku vaji ruha ka'ene mama'inijihi 'eke una'i kama hijura. 'Ee ahaja ijuri veijaho pu ura kahe eaka mapoki jihipuni una'a kahi hi'irono ura rena parajura.

⁴⁷ 'Ene pu amuna pisivisavi'i puni sea nesi 'eke 'ee pisivisame erapo ki'avarono siporua jojora 'ojura. Ijhuna'e ja niho'o ni'ima'ura namahuna 'iamana.

21

Amunijihuni Swarijina (Maka 12:41-44)

¹ Hu 'urine katua tevua rori ijí hina ea ka'ene uneunecha ani rejii'nijija roe puni swara savu kaji kivi'i hinana.

² 'E'eme amuna ka'ene uneunecha pa'amaijaho urupa va'aa no'o (tu toia) eru samana.

³ 'Ejume Hu ijá 'iama Na nimai ja 'waravu. Amuna uneunecha pa'amaa kajarahara moniaka ea mapoka kajipo roe katua ka'ene savajaho asita ranamana.

⁴ Ea pu monia mapoka vajaha jihuni maijaho pu monia rukini jihuni hahi avajara kaivo amuna kajaho uneunecha pa'ajihuna'e huna ka'ene areri navuji samajihuna'e hora eaka mapoka monia rukinijaho asita ranamana 'iamana.

Jesura Temiporu Tira'usahuna 'Waramajina (Matiu 24:1-2; Maka 13:1-2)

⁵ Pu ea 'aho'a Temiporu kaji kame 'ee muna mavarasa'ini 'eka vene 'ee swasa ka'ene ichá'ina'e vejuji hine 'wa'eme Jesura ijá 'iamana

6 Ike uneunecha ka'ene ja kivukaho vea ijihuni-jara mai'o ro'eje muna mapokakija tira'usunahe 'arii para'eje muna niho'o kwinu huni ruha panahuna 'iamana.

*Ahija 'Ee Sisei Hihunijina
(Matiu 24:3-14; Maka 13:3-13)*

7 'Ejume pu Hu apoma ijá 'wava Najuhi'ine ikaho vea vecha re'ena? 'Ee vea kakara pa'are'iro ve'amani urijaho marako'a aacha iraki reja ka'eja? 'wavara.

8 'Ejume Hu ijá 'iama Ja hami ka'avara. 'Ejakame pu ea ja papisimi'avara. Ijihuni mai-jaho ea mapoka'e Nuni iha 'ahi roe ijá 'iahune Na Kerisona'omo vea niape'i venu 'iava he'avajaho niho'o pa'ararihi'avara.

9 'Ejakame ja he'eje kwaa araka mapokija ajira vehune 'ee ijí ajira vehuni pinana kajaho 'urina rohuna. Ija'inijaho re'ena vo urijaho mai'o pava'a 'e'u'enakúne ja niho'o paju'avara 'iamana.

10 'Enarena Hu kú'o ijá 'iama Kwaa ara 'ahopo 'urine 'aho'a ninamahune 'ee ara 'ahopo 'urine ara 'aho'a ninamahuna.

11 Kwaa ara mapoka mwevarivura mama'ina rohuna. 'Ene sisemaapo roe 'ee kwaa ara mapoka 'ora vea rene 'ee atama siseapo kwaa ara mapokakaho ani rene 'ee aacha mama'ina ani'ina mapoka sisea akúpi 'ahi kihuna.

12 Uneunecha mapoka ikija mai'o re'i ve'eje Nuni ihijihuna'e ja aherama va'e sise'i 'ahie 'ee tipurai irechamie 'ee aherama va'e Sinakoku vaji aporame 'ee aherame kinia 'ee kavana epuni una'i vahuna.

13 Ja vea kajino areri Godoni vu'a mamaijaho pu najahuna.

14 'Enajihuna'e ja nimarako vvihanareje jara vu'a iraka ka'ene 'warahunijaho pavwiha'avara.

15 Ijihuni maijaho Nara vu'a ka'ene ara 'warahuna vajahakame oni naka ara vu'a ka'ene 'wara'amajaho hene pu areri patanu'urahe 'ee pu niho'o unenu'u pina areri pa'warahuna.

16 'Enakaivo emahu jona vwehu jona ehu jona napuhu jonapo nahamahe ea 'ahopo ja 'anie kwamasahuna.

17 Nuni ihijihuna'e ea 'ahopo ja senahuna.

18 'Enakaivo joni hūmata sapasa kwisu patausi-uhuna.

19 'Enajihuna'e ata kirasahe naminareje ja maja hihuna ape'avara.

*Jesura Jerusaremi Tira'usahuni Vu'a Ka'ene
'Waramajina*

(Matiu 24:15-21; Maka 13:14-19)

20 Ja kave Jerusaremiho amiapo outihe navaka'vari veijaho ja ika ro'avara. Ara kajara tira'usahuni vea nukehuna ro'avara.

21 'Ejakame ea ka'ene Jutia hijujija juhahe nahi 'ahi va'e 'ee ea ka'ene ara natohwa kajino hijujija 'usema va'aji'avare 'ee ea ka'ene nechi'i hijujija ara natohwa kajaho paro'avara.

22 Ijihuni maijaho eha ka'ene mihuna'e Godoni heha vaji 'waramajara nimaa rehuna.

23 Napara ka'ene hari'inijija 'ee napara ka'ene hariha musa iji'inijija vi ichá'ina'e ve'eja? Vea kajaho kwaa arakaho ea mapoka ajirijara sis-erana parajakame ea ikija ni'ima'ura siseisei temuka'eje hihuna.

²⁴ Pu so'wi pijihe kwamasaha 'ee tipurai aherame kwaa ara ani ani'ini vahuna. 'E'eje Jenitaruepo Jerusaremiho ajima tautia apena va'eje Jenitairu puni vea pa'arehuna.

Emaa Puni Harihijara Rohunijina
(Matiu 24:29-31; Maka 13:24-27)

²⁵ 'E'eje masapa 'ee china 'ee vea 'ee akúpa 'ahi aacha ani'ina kihuna. 'E'eje ea mapoka ka'ene mwe'l hijukija soha ka'ene sisea ani'ina'e amenareje ira ani'ina 'ume'amaji henareje tea juname 'ee niho'o puruva reti'eje hihuna.

²⁶ Emaa ijí unecha ka'ene iki mwe'l re'amaji kamareje niho'o juma paranareje kwapihuna. 'Ene uneunecha ka'ene akúpa 'ahi navujija akúpa kakara varivarimareje 'unirame usimahuna.

²⁷ 'E'eje Ema Puni Harihijaho 'imitia vaji Huni harura 'ee Huni hanaji'iniji'i maho'o roe ea mapoka kahuna.

²⁸ Vea ka'ene uneunecha kajipo ika'ina'e reja ki'avajaho 'urine nuana ahasirime a'ama niri'i hi'vara. Ijihuni maijaho jara matauma hihuni vea nitu'u rena paranu 'iamana.

Matakijara Najahajina
(Matiu 24:32-35; Maka 13:28-31)

²⁹ 'Enarena Hu haa ikaho 'waramana. Ja kaha! Mataka 'ee icha 'aho'ijihi kiha!

³⁰ Ijipo 'anaura'omo mai'o naheji'i sisira apúsavu'e kimare'e vea mara'i venu.

³¹ Vea ka'ene ijí aneja ki'avajaho Godoni ari rohunijaho tu'u rehuna ro'avara.

³² Na nimai ja 'waravukúne vwiha'vara. Eaka kijahija maho'o pakwamasa rana'eje ija'inarehuna.

³³ Akúpa mwe'ijaho pa'arehuna kaivo Nuni Ira kakaho papa'are'ena.

'Aiha Hami Veji'i Hiha

³⁴ Ja hamihami 'ajohareje pahine joni kaukararu vene 'ee toa sisea ine 'ee jara iviamaa 'unama ka'ene ichá'ina'e hamihihuna pavwhihaji'i hi'vara. Ijihuni maijaho ja ija'ina hi'eje vea kajaho areri ni'aha kwino kwavaha puna'i asuma va hihuna.

³⁵ Vea kajara re'amajaho ea maho'o mapoka ka'ene mwe'a 'ahakino hijujija renahuna.

³⁶ 'Enakúne vekuveku hine 'ajohe nia niriesiporua 'oji'i hi'irakúne ja areri harura renaeje uneka ka'ene re'iro vejujaho asima va'e Emaa Puni Harihijihuni una'i nami'vara 'iamana.

³⁷ Hu veiri'ijaho hine Temiporu vaji najahuva'o na'ivukavi'i va'e huri'a ka'ene Arivina 'wavujihuni 'ahi va'una.

³⁸ 'Eju'e ea mapoka'e sú'usú'u arihe va'e Temiporu vaji Huni vu'a he'i 'ahiu'e va'ajivura.

22

Jesu 'Ana'i Hemi Kosarame Ojajina

(Matiu 26:1-5; Maka 14:1-2; Joni 11:45-53)

¹ Puretia isitia pa'ana ka'ene Pasova 'wavujihuni sora 'ehuni vea roe turanana.

² 'Ejume pirisitia mama'ina 'ee Sikuraipia Hu 'anae kwahuni 'unama savara. Ijihuni maijaho pu ea mapokijihi juhavara.

*Jutasira Jesu Nahamahuna'e Nimaa Venajina
(Matiu 26:14-16; Maka 14:10-11)*

³ 'Ejume Huni tisaiporu pina ka'ene Jutasi Isikariatina 'wavujaho Setanira rosamana.

⁴ 'Ejume Jutasira va'e hora ichá'ina'e Jesu nahamahuniji pirisitia mama'ina 'ee sorutia pu'úmo 'unama amairiara.

⁵ Pu niho'o teamanavume eha monia vaja'i 'waravara.

⁶ Jutasi puni ira hene teamavumakame 'unama ka'ene Hu nahamahuniji hamu hemu parajakame ea niho'o areri pahehuniji samana.

*Jesura Pasova 'Truma I'irono Amairiaramajina
(Matiu 26:17-25; Maka 14:12-21; Joni 13:21-30)*

⁷ Puretia isitia pa'ajihuni vea aneja rejuvenakavi'i pu sipi 'u'ua 'anae swasa vehuna.

⁸ 'Ejume Hu Pita'o Joni'o irechamie ijá 'iama Va'e Pasova ihuniji amairie nú ija 'iamana.

⁹ 'Ejume pu apoma ijá 'wava Nú va'e ichihi 'iruma amairi'eja? 'wavara.

¹⁰ Hu ijá 'iama Ike heha. Ja ari va'eje ea pina toa 'ene vu'e piuni'ena. 'Ejakame ja hu 'arariha va'e sea ka'ene hu aji'amajino va'avara.

¹¹ 'Ene ja ika'ina sea anesura 'wa'avara Njahahi'inijara ika'ina'e a 'waramana. 'Ú 'iruma ijuritinia ka'ene Nara Nuni tisaiporu epu'úmo Pasova ihunijaho ichine? 'waha 'iamana.

¹² 'Ejakame hora ruha ka'ene ichuto niamairiarame namuji najahakame ijino amairiara'avara 'iamana.

¹³ 'Ejume pu va'ajime uneunecha mapoka areri Hura 'warama kaja'ina'e rejume pu Pasova ka'ene ihunijaho amairiaravara.

Natohwijara Kwamaji Vwihami'i Iruma Ihuni-jina

(*Matiu 26:26-30; Maka 14:22-26; 1 Koritia 11:23-25*)

¹⁴ Vea kaji apejume Hu Huni apasorua pu'úmo roe 'aijua rori asuma hijara.

¹⁵ 'Ejume Hu pu ijá 'iama Na ja pu'úmo Pasovakaho inareje iji'a haha hiana apehuna ura reniu.

¹⁶ 'Enajihuna'e Na nimai ja 'waravu Na kú'o 'iruma painu va'u'e Godoni ari jara roe nimaae rejakame iji'a ihuna 'iamana.

¹⁷ 'Enarena Hu kapusia apene Godiho teimani 'wa'ika'i ijá 'iama Ike apene vajúsarame iha.

¹⁸ Ijihuni maijaho ajina riha ikaho Na painuva'o vea ka'ene Godoni arijara ro'amaji ihuna 'iamana.

¹⁹ 'Enarena Hu puretia apene Godi teimani 'wa'ika'i tuame vajihii'i ijá 'iama Ikaho Nuni haha'e jonijihuna'e vajihukúne ina veji'i Na vwi-hani'avara 'iamana.

²⁰ Areri puretia ija'ina'e Hu toa kapusi rukina mihi'lí ijá 'iama Ike kapusia toa rukinakaho Nuni 'aa ka'ene jonijihuna'e arihuna'e maiu'inaka naha'ma 'waramajina 'iavi'i mihana.

²¹ 'Enakaivo heha! Ea ka'ene Naa'e nahamihu-nijaho iviamaa ikino nú pu'úmo 'aijua rori hinu.

²² Ijihuni hahi Ema Puni Harihijaho Godira vwi'hana ja'ina vehuna kaivo ea ka'ene Hu na-

hamahunijaho niho'o eha sisea ni'ima'ura ape-huna 'iamana.

²³ 'Ejume pu pusumano ea ka'ene nahamahu-nijaho ea irarana 'warahuniji ka'i 'ahiume 'wamareja puni vaja kajino pira'aravara.

Ea Irá Natohwiji Ka'i'ahiume Vahacharavajina

²⁴ Ea irara natohwa'e rehuniji puni vaja kajino hine pira'aravara.

²⁵ 'Ejume Hu pu ijá 'iama Jenitaru puni kinia ka'ene iki mwe'i hijujija ea 'ajohahuna harura rukina. 'Ee 'ajohi'ina kajija swara rukinijina 'wavura.

²⁶ 'Enakaivo ja ija'ina parehuna kaivo ea irara joni vaji natohwa'e re'i 'aha'amajaho hu areri sesamaa puna'i rene 'ee areri pwea sa'ina'e re'amana.

²⁷ 'Ú ea icharo natohwane? Ea ka'ene asuma hine 'iruma inujarana ho ea ka'ene namine 'iruma'e 'eka roe vajahujarane? Ea ka'ene asuma hine 'iruma'e inujaho natohwa kaivo Na ea ka'ene arini namine jaae 'iruma vajihujina.

²⁸ Vea ka'ene Na sisei hijujaho ja nú pu'úmo Nuni rori namijara.

²⁹ Nuni omijara Na Nuni kwaa 'ajohuna mi-haja'ina'e Na 'u'o ja mihu.

³⁰ 'Enajihuna'e Nara ja pijihakame ja Nú pu'úmo Nuni ari 'aijua 'ahi ahuma toa 'iruma ine 'ee ja Isureri puni amuja ka'ene iropu ropu no'o ruha ka'ene pua'e 'otua vetihunijino hine 'otua vetihuna 'iamana.

*Jesu Pitara Hemahuniji Rona 'Waramajina
(Matiu 26:31-35; Maka 4:27-31; Joni 13:36-38)*

³¹ 'Ejume Hu Saimani ijá 'wama Saimani hena! Setani aa'e apena'e areri 'witia ruarahu ja'ina'e ruara'i 'ahau'e ura reju'e ro 'ejahie 'warimana.

³² 'Enakaivo Na oni siporua 'ojura'omo ara nima'a ronujaho pa'ohuna. 'Enareje a kú'o 'uname Nuni ro'amajaho ara Nuni ehijakija najahakame pura nimaa rojujaho ija kisi apena puni una'i saname vehuna 'wamana.

³³ 'Ejume Pitara ijá 'wama Natohwé na niarerí rena hijura'omo A tipurai va'amajaho na A hu'úmo vahuna. 'Ee A kwa'amajaho na A hu'úmo kwahuna 'wamana.

³⁴ 'Ejume Hu ijá 'wama Pita Na nimaa aa'e 'waravu. 'U'ora iviasa mai'o pa'ume'eje a 'aha no'opisu Na pakimuna 'ia'eje iji'a 'u'ora 'umehuna 'wamana.

Pausia Tuja 'Ee So'wa

³⁵ 'Enarena Hu pu ijá 'iama Vea ka'ene Na ja irechamiume pausia 'ee tuja 'ee mumora sisā pa'a va'ajaho ja vi pivusahara raka? 'iamana. Pu ijá 'wava Niho'o pana 'wvara.

³⁶ 'Enakaivo Hu pu ijá 'iama 'Enakúne iviamaa ea irahuni pausia 'ee tuja na'amajaho 'eka va'amana. 'Ene ea irara so'wa pa'ana'e re'amajaho huni ateha 'eka va'e 'imenareje monia 'eke huni so'wa 'ime'amana.

³⁷ Ijihuni maijaho heha vaji venareje Naa'e ronarena 'waramajaho rehuna. Hu 'u'o ea sisea veji'ina pu'úmo tahuna 'úmajaho iviamai Nuni vaji nimaa roe rehuna 'iamana.

³⁸ 'Ejume pu ijá 'wava Natohwé kama! So'wa no'ohe'i ikenakúne kima! 'wvara. 'Ejume Hu pu ijá 'iama Ijaho arerina 'iamana.

*Jesura Arivi Huri'a 'Ahi Siporua 'Onajina
(Matiu 26:36-46; Maka 14:32-42)*

39 'Enarena ru'e'une nikú'o Hu venuja'ina'e huri'a Arivi va'ume Huni tisaiporu Hu 'ararihae va'ara.

40 Hu va'e ruha kajino 'e'unarena Hu pu ijá 'iama Ja Godoni siporua 'oji'i hijakame ja pavena ki'avara 'iamana.

41 'E'ika'i Hu pu irechami'ika'i va'e karokaro muna pi'onave va'e 'ohune sa'inijakaru nitupari same hiji'i siporua 'onana.

42 Hu ijá 'wama Amo A ura rena'ipisa kapusiakaho Nuni rora apena ruvaa'a. 'Enakaivo Nuni ura pana kaivo Oni ura ija'ina'e ve'amana 'wamana.

43 'E'eme 'ona ojil'ina akúpa 'ahi rena roe Hu harura mahana.

44 Hu hine oja hia'eme siporua 'ojumakame haha natohma'e hiame huni piropa 'aa muka sa'ina'e mwe'a 'ahi arihana.

45 Hu siporua 'onuva'o 'urine Huni tisaiporu puni va'i kimajaho pu hine temuki 'aninamiume notuara.

46 'Ejume Hu pu sie ijá 'iama Ja iraka vene notui'i navo? 'Urine siporua 'o'irakúne ja pavena ki'avara 'iamana.

*Jesu Kamovajina
(Matiu 26:47-56; Maka 14:43-50; Joni 18:3-11)*

47 Hu mai'o hine ijí 'wara'eme ni'aha kwinu Jutasi ka'ene iropu ropu no'o pinijara ea mapoka'e aherame roe hu Jesu ura mina ve'i 'ahaume roana.

48 'Ejume Jesura hu ijá 'wama 'Ú Jutasi a Na Emaa Puni Hariha nahamahare'e ura mina vena avano? 'wamana.

49 'Ejume ea ka'ene pu pu'úmo namijajipo uneka ka'ene re'i venaji kimareja pu ijá 'wava 'Ú Natohwe nú núni so'wi piji'eja? 'wavara.

50 'Enarena ea pini huni so'wi mavane 'urine pirisiti ni'inijihuni pwea pinijihuni ataa ka'ene mana'inijaho 'anaume 'uhu'usahana.

51 'Enakaivo Jesura eha vene ijá 'wama Ijá kajaho arema 'wa'ika'i Hu huni ataa iji 'unavume marańana.

52 'Enarena Jesura pirisitia mama'ina 'ee sorutia Temiporu 'ajohi'inijija 'ee emakina ka'ene Hua ape'i roajahi ijá 'iama 'Ú Na ea nesa apeji'ina'omo ja so'wa hajaa 'eke Naa'e apeni'i 'ahiume roare?

53 Na veku veku ja pu'úmo Temiporu vaji hijura kaivo ja Na paapeniura. 'Enakaivo iviamaa ike vea mukakaho 'ee mwe'a ike nutuvi'ina kehuni harurijaho jona 'iamana.

Pitara Jesu Hemahajina

(Matiu 26:57-58, 69-75; Maka 14:53-54, 66-72;
Joni 18:12-18, 25-27)

54 Pu Hu kamome apene pirisitia ni'inijihuni sei va'ume Pitaho ma kameri naminakivi'i 'arariha va'ana.

55 'E'eme vena nú'úha riri jaumakame Pitaho pu pu'úmo asuma hinana.

56 'E'eme hu ijino asuma hijume napara pwei pini Pita nia kanavi'i ijá 'iama Ea ike 'u'o Hu hu'úmo onuna 'iamana.

⁵⁷ 'Ejume hu heme ijá 'wama Napare niho'o na Hu pahene pakavi'ina 'wamana.

⁵⁸ Hu 'aha josu pare'eme emai pini kamarena ijá 'wama A 'u'o Huni ea pina 'wamana kaivo Pitara ijá 'wama Parue na niho'o pana 'wamana.

⁵⁹ Hu vea muka kwinu pa'are'eme ea pini roe pasonanananavi'i ijá 'iama Na nimaa 'waravu. Ea ika 'u'o Hu hu'úmo 'urahe onuna. Ijihuhi maijaho hu Karari ora 'iamana.

⁶⁰ 'Enakaivo Pitara ija 'wama Parue ara iraka ka'ene 'warimujaho na mai'o suja 'wamana. Hu ijí 'wara'eme ni'aha kwino 'u'ora 'umenana.

⁶¹⁻⁶² 'E'eme Natohwijara aroma Pita ka'eme Pitaho iji'a Natohwijara iraka ka'ene 'waramajaho vwihanana 'U'ora mai'o 'ume'i 'ahae ve'eje a 'aha no'opisu Na pakimuna 'i'ena 'wamana. 'Ejume Pitaho ijí vwihanarena samai va'e'une niho'o natohwa'e niramana.

Jesu 'Ijahe 'Ee Hijahajina

(Matiu 26:67-68; Maka 14:65)

⁶³ Ea ka'ene Jesu 'ajoha hijajipo apene 'ijahe 'ee hijahara.

⁶⁴ Pu Hu apene nia hwamahe 'anai'i ijá 'wava A unenu'u 'aho'a ka'ene vaji navujija henā kimuna 'úmunakúne ea irara A 'anaajaho 'waruva nú heja 'wavara.

⁶⁵ 'Ene pu uneunecha niho'o mapoka'e Hu niname 'ee 'urarahe ira sisea 'waravara.

Jesu Aheme Kanisoru Puni Una'i Roajina

(Matiu 26:59-66; Maka 14:55-64; Joni 18:19-24)

⁶⁶ Vea nituvume emaa puni mama'ina 'ee pirisitia mama'ina 'ee Sikuraipia roe kanisoru

puni nú'úhi ahuma hi'eme Jesuho puni una'i aheme roajivara.

⁶⁷ Pu apoma ijá 'wava 'Ú A Keriso re'amajaho 'waruma 'wavara. Hu ijá 'iama Na ja 'wara'ujaho ja panimaa rohuna.

⁶⁸ 'Ene Na jaa'e apora'ujaho ja eha pavene 'wari'eja.

⁶⁹ 'Enakaivo iviamaa rene Emaa Puni Harihijaho ija manal'ina ka'ene Godoni harurijal'i asuma hihuna 'iamana.

⁷⁰ Pu Hu apome ijá 'wava 'Ú A Godoni Harihe? 'wavara. 'Ejume Hu pu ijá 'iama Ja Na 'warivu kajaho Na nimaaijina 'iamana.

⁷¹ 'Ejume pu ijá 'wava Nú ea 'ahopo Hua'e ronareje namahuji hehuna pana. Ijihuni maijaho nú onúno Huni irijaho núni ataa ikino hejara 'wavara.

23

*Jesu Aheme Pairati Oni Una'i Roajina
(Matiu 27:1-2, 11-14; Maka 15:1-5; Joni 18:28-38)*

¹ 'Enarena ea mapoka kajipo 'urine Hu aheme Pairati oni va'ara.

² Pu aneja vene Hu namahi'i ijá 'wava Nú ka'eme ea ikaho ehu núnakija pisimie 'ee Sisa oni takisia pavehuna'e 'warume 'ee Hura 'warumujaho Hu Keriso ka'ene Kinijina 'úmunā 'wavara.

³ 'Ejume Pairatira Hu apoma ijá 'wama A Jua puni Kinie? 'wamana. 'Ejume Hu eha vene ijá 'wama Ara 'warimu kaja'ina 'wamana.

⁴ 'Ejume Pairatira pirisitia mama'ina 'ee ea mapoka kajih iijá 'iama Na ea ikehuni vaja sisea mai'o papiunavu 'iamana.

⁵ 'Enakaivo pu hina pasonananavi'i ira ajira'e ijá 'wava Hu ikaho ea mapokakihi najahu'e oja 'urinauna. Hu Karari rene najahe va'e Jutia vaja maho'o najahe onuva'o kwaa ike 'u'o iviamaa roana 'wavara.

Jesu Ranavume Heroti Oni Va'ajina

⁶ Pairatira ike henarena aporame ijá 'iama 'Ú ea ikaho Karari ore? 'iamana.

⁷ Hu henajaho Jesuho Herotira kwaa ka'ene 'ajohujino rena roana henarena hu ranavume Heroti oni va'ana. Ijihuni maijaho Heroti roe Jerusaremi hinana.

⁸ Herotiho Jesu kamajihuna'e niho'o natohwa'e teamamajihuni maijaho Hura raka ka'ene venuji henujhuna'e Hu aacha pina veja ka'i 'ahaume avanana.

⁹ 'Ejume Herotira 'aha jora'e Hu apomana kaivo Hu eha pavenana.

¹⁰ 'Ejume pirisitia mama'ina 'ee Sikuraipiepo ijí namine niho'o natohwa'e ajina'eme Jesuho namahara.

¹¹ 'Enarena Herotiho 'ee huni sorutia pu'úmo Jesuho apene 'urarahe 'ee sise'i 'ahae 'ee ateha niho'o mavarasa'ina apúsamahe ranavume Pairati oni 'uname va'ana.

¹² Maraku'ijaho Heroti'o Pairati'o naka vejura kaivo vea kajino pu no'o napura vejara.

Jesu 'Anaa Kwahuna Nimaa Vejajina

(Matiu 27:15-26; Maka 15:6-15; Joni 18:39-19:16)

¹³ 'Ejume Pairatira pirisitia mama'ina 'ee emaapuni ea mama'ina 'ee ea mapoka 'waravume ahuvara.

¹⁴ 'Ejume ijá 'iama Ja ea ikaho apene nuni roara. Hura veju'e ea oja 'urinau'e ea sisea vejura 'wa'l i ahema roara. 'Enakaivo na joni una'i vena kavujaho na ea ikehuni vaja sisea mai'o papiunavu kaivo jara Hua'e namahujiruna.

¹⁵ Heroti 'u'o vena kamajaho Hu sisea pave-nana'e kamarena nuni 'unama kú'o roana. Heha! Ea ikaho unenu'u pina sisea pavena jihuna'e Hu areri pakwahuna.

¹⁶ 'Enajihuna'e na hijahareje ranave va'ena 'iamana.

¹⁷ Puni tamani jihuna'e sora ijuri vea rejul'ukavi'i tipura ea kwinu ranavu'e samai va'una.

¹⁸ Ea mapoka kajipo ni'aha kwinu ahuma ijá 'umeja Ea ike ape'i kaivo Parapasi ranave samai ro 'e'unama 'umejara.

¹⁹ Parapasiho ara natohwa vaja kajino hine 'arahe 'ee ea'e 'aniume kwamasaha jihuna'e ranavume tipurai hinana.

²⁰ Pairatira ura renajaho Jesu ranave vahuna'e ura rejume ea mapokijihi kú'o 'waramana.

²¹ 'Enakaivo pu ira ajira'e ijá 'umeja Icha 'ahi 'anaa! Icha 'ahi 'anaa! 'umejara.

²² 'Ejume hu 'aha no'ohe'i ni'waramana'omo kú'o 'aha pina ijá 'iama Irakijihuna'e 'ana'uro 'umejo? Hu unenu'u pina sisea iraka'e venane? Hu unenu'u pina ve'ira'omo na 'anae kwahuna na pakavu. 'Ena'omo na 'warave pu hijaha ranave vahuna 'iamana.

23 'Enakaivo pu hine majama pasonananavi'i icha 'ahi 'anae kwa'amarono 'umenu va'o pura harura vene rarejara.

24 'Ejume pura raka ka'ene ura renajaho Pairatira ve'avarono 'waramana.

25 'Ejume Pairati ea ka'ene ara natohwa vaji 'arahe 'ee ea 'aniu'e kwamasahi'ina ka'ene tipurai hinana ka'ene pura rana'amarono ura renaji rana'ika'i Jesuho puni ura ijino ve'avarono mihana.

Jesu Korosi 'Anaajina

(*Matiu 27:32-44; Maka 15:21-32; Joni 19:17-27*)

26 'Ejume pu Jesuho ahema va'eme Saimani ka'ene Sairini orijaho huni ari rene ro'eme pu iji 'uname icha kajaho apena pimahe 'ejahaume apene Jesuni túna'i va'ana.

27 Ea niho'o mapoka mapoka'e va'aji'eme na-para 'aho'a puni rira kajino virisia vene niramaruvi'i 'ararihia va'ara.

28 'Ejume Jesura ta'arohe ijá 'iama Napara ka'ene Jerusaremi orakije Nunijihuna'e niramaruuvujaho are'i kaivo joni harihija 'ee ojono nira'ahusaraha.

29 Ijihuna'e heha! Vea mai'o nituma roe sa'eje ja ika 'wa'ejá Napara ka'ene hariha pa'eke 'ee panahena'e 'ee hariha pa'ajohai'inijija teamanahuna 'wahuna.

30 Ijaho vea ka'ene emaapo aneja vene nahara'e ika'ina jarima 'warahunjina 'Auma arihe ninamuha 'ee huri'a roe vahúha 'wahuna.

31 'Enajihuna'e pu icha maiu'ina vajijiano uneunecha ija'ina'e ve'avajaho vu pu icha sahasa vajijaho ichá ve'eja? 'iamana.

³² Pu ea sisea no'ohe'i Jesu pu'úmo 'ania kwa-masa'avarono aherame va'ajivara.

³³ 'Ejume pu roajime kwaa ka'ene Húmatata 'wavujino useme Jesuho icha 'ahi 'anae 'ee ea sisea pina mana'inija'i 'anae 'ee pina ana'inija'i 'anaara.

³⁴ 'Ejume Jesura ijá 'wama Amo pu raka ka'ene vejukaho puruva reti'eju'e vejukúne

Noinvwihanie are'amana 'wamana. 'E'eme pu pipia vene Huni ateha swara vena 'ekara.

³⁵ Ea mapoka kajija namine ki'eju'e puni mama'inijipo Jesuho apene 'ijahe ijá 'wava Hu ea 'aho'a ni'ajihu ja'ina'e maka'eje Hu Keriso ka'ene Godira iji pijahaji re'amajaho Hu ori'ini ni'ajara'amama 'wavara.

³⁶ 'Ejume sorutia ijija 'u'o Jesu apene 'ijahe toa sisea 'eka roe vajahi'i

³⁷ pu ijá 'wava A Jua puni Kinia re'amajaho orono ni'ajarama 'wavara.

³⁸ Ira ika'ina'e Huni hurijino vejara. Ikaho Jua Puni Kinijina.

³⁹ 'E'eme ea sisea pina ka'ene ropuna'i 'anaume namajara vu'a sisea Hu 'warame ijá 'wama 'Ú A nimaa Keriso re'amajaho A orono ni'ajarame nú 'u'o ni'ajúha 'wamana.

⁴⁰ 'Enakaivo ea pina ka'ene ronuna'i namajara 'urarahe ijá 'wama 'Ú a Godiho pajuhamo? Nú 'u'o iki pu pu'úmo areri ahume kwamasahu.

⁴¹ Nú eha apejujaho nijina. Ijihuni maijaho nú sisea'e vejajihuna'e eha apeju kaivo Hu unenu'u pina sisea pavenganan 'wamana.

⁴² 'Enarena hu ijá 'wama Jesu vea ka'ene

Ara Oni ari va'e'umajaho A na vwihani'amana 'wamana.

⁴³ 'Ejume Hu ijá 'wama Nara nima a 'waravu jihuna'e a iviasi Na hu'úmo Parataisi hihuna 'wamana.

Jesura Kwamajina

(*Matiu 27:45-56; Maka 15:33-41; Joni 19:28-30*)

⁴⁴ Ija'ina'e ve'eme vea va'e riri nami'eme kwaā mapokakaho vea na'ima namuva'o vea va'e hareha 'aha karohi naminana.

⁴⁵ 'E'eme vea na'i'eme Temiporu vaji ateha natohwa ka'ene 'uranavume namajaho rira mu'oi kajino isome no'ohe'i renana.

⁴⁶ 'E'eme Jesura ira ajira'e ijá 'umena Amo Oni ija 'ahi Na Nuni 'Avena ranavu 'wa'ika'i oja sumana.

⁴⁷ 'Ejume sorutia puni Natohwijara iraka ka'ene renaji kamarena Godi ta'arohi'i ijá 'wama Ea ikaho nima ariramaa 'wamana.

⁴⁸ 'Ejume ea mapoka ka'ene ijí ka'i 'ahiume ahuvajija Jesura kwavumakame tea junavume túrata puna 'anal'i 'uname ari va'ara.

⁴⁹ 'E'eme Huni napuhija maho'one 'ee napara ka'ene Karari rene Hu tamatihe roajija kameri namina raka ka'ene rena kajaho kavi'i namijara.

Jesu Kwananavajina

(*Matiu 27:57-61; Maka 15:42-47; Joni 19:38-42*)

⁵⁰ 'E'eme ea pina iha huna Josapina Hu kanisorua pine 'ee hu ea mamaa 'ee arimaa.

⁵¹ Hu pura vu'a ka'ene amairie 'ee raka ka'ene vejajaho hu panimaa venana. Hu Juapuni ara natohwa ka'ene Arimatia 'wavujino rena

roana'omo Godoni arijara rohuniji 'ajaha hinuna.

⁵² *'Enajihuna'e ea ikara va'e Pairati jarime Jesuni haha'e ape'irono 'waramana.*

⁵³ *'Ene hu roe Jesuni haha apene atehi mwame apena va'e muna ara maiul'ina ka'ene ea mai'o pairechavi'inijino ranamana.*

⁵⁴ *Vea kajaho Sapati amairiaravuri veijina. 'Ene Sapatia mai'o aneja ve'i 'ahaume vejajina.*

⁵⁵ *'Ejume napara ka'ene Karari rena roajija pu pu'úmo va'e eucha kajaho kame 'ee Huni haha ichá'ina'e mwame ranavajaho kavara.*

⁵⁶ *'Ejume pu 'unama va'e ari senisia 'ee iona amairiarame Sapatia'omo puni tamanijara 'warama ja'ina'e vene ojuta hwejara.*

24

Jesura Kú'o 'Urinajina

(Matiu 28:1-10; Maka 16:1-8; Joni 20:1-10)

¹ Hura natohwi sú'usú'u napara kajija senisia ka'ene pura amairia irechavajaho 'eke muna ara kajino roara.

² Pu vai'i kavajaho muna ka'ene vwicha'e kунавајахо таһума апене ruva'ara kavara.

³ *'Enakaivo pu va'e vaji aruvajaho Jesu ka'ene Natohwi jihuni haha pakavara.*

⁴ Pu puruva renaume ijá nami'eme ni'aha kwino ea no'ohe'i ateha sajasa'imaa savi'ina puni nina kajino namijara.

⁵ *Napara kajija niho'o tea jun'a'eme nuana vetiume parua kajipo ijá 'iava Ja ichá vene ea ka'ene kwamasahi'ina kihipuni vaji ea ka'ene mai'o hiji'inijaho savo?*

6 Hu ikaho pana kaivo Hu ni'urinana. Hu Karari hiji'i ja 'waramajaho ja pavvihajo?

7 Hu ja ijá 'iamane Ema Puni Harihijaho apene ea sisea veji'ina'e mihe icha 'ahi 'anaa kwama na-muva'o na'ia no'opisu pa'are'eje kú'o 'urihuna 'iamajaho ja pavvihajo? 'iavara.

8 'Ejume napara kajija iji'a Huni vu'a vviha-jara.

9 'Ene eucha are'i 'unama va'e ea iropu ropu kwinu 'ee ea 'aho'iji 'u'o uneunecha mapoka kajaho ijano 'waravara.

10 Napara kajija Meri Matarini ho Joana ho Meri ka'ene Jemisi oni ohijaho 'ee napara 'aho'a ka'ene pu pu'úmo 'urahe ojujipo apasorua une-unechakaho 'waravara.

11 'Enakaivo vu'a ka'ene pura 'wara'avajaho mavumaa sa'ina rejume pu panimaa rojara.

12 'Enarena Pitara 'urine ninuma va'e muna ari 'e'une aruhi kamajaho ateharu navume kimana. 'Enarena hu 'uname huni ari vai'i uné raki renana ronarena vvhaji'i va'ana.

*Imeasi Va'ajina
(Maka 16:12-13)*

13 Vea nikwinu'ina kajino ea no'ohe'i ara iha Emeasi va'ara. Ara kajaho Jerusaremi rena va'ujaho kwaa jora'omo (11 kiromita)

14 pu vai'i uneunecha mapoka ka'ene renaji 'wama apena va'ara.

15 Pu ijí 'wavi'i va'eme Jesuho roarena pu pu'úmo va'ana.

16 'Ejume puni nia nuhiume pu kavara kaivo pahena pakavara.

17 'Enarena Jesura pu ijá 'iama Ja no'o jaja-sumano vu'a iraka'e 'wavi'i va'ajivo? 'iavume pu no'o nina kaja'a ajuarasa'eme namijara.

18 'Ejume ea iha Kariopasira eha vene Hu ijá 'wama 'Ú A Asumano ikaho Jerusaremi ura vene roana'omo uneka ka'ene vea ikino rejajaho A pahenane? 'wamana.

19 'Ejume Hu pu ijá 'iama 'Ú uné raki renane? 'iamana. 'Ejume pu Hu ijá 'wava Un-eka ka'ene Jesuka Nasareti ora'e renajaho A vi henane? Ea ikaho poropetia 'ee ea uneunecha ani'ina mapoka'e mama'ina vene 'ee Godiho 'ee ea mapoka'e ikihipuni una'i vu'a mama'ina 'waramuna.

20 'Enakaivo núni pirisitia mama'ina 'ee ea 'ajoha'ina mama'inijipo apene 'anaa kwa'amarono mihume pu Hu icha 'ahi 'anaume kwamana.

21 'Ejume nú vwhajajaho Hu roe Isureri ora 'imena 'eka'i 'ahaume roana. 'Enakaivo ijiru pana vo uneunechakipo rejajaho iviasi na'i no'opisu pa'arenu.

22 'Enakaivo napara 'aho'a ka'ene nú pu'úmo ahuma oji'inijipo sú'o euchि va'e roe tatatúara.

23 Pu Huni haha pakamareja roe ijá 'úva Pu 'ona oji'ina visoni vaji kivume pu Hu mai'o hinu 'úvara 'wavara.

24 'Ejume ea 'aho'a ka'ene nú pu'úmo ahuma hijajipo euchि kaji va'ara kaivo niarerri napapo 'waruva ja'ina'e Hu pakavara 'wavara.

25 'Ejume Hu pu ijá 'iama Ea ka'ene niho'o pavwhajil'inakije uneunecha mapoka ka'ene poropetiepo 'waravajaho ja marako'a panimaa

rojara.

²⁶ Kerisoho uneunecha mapoka sisea Huni haha 'ahi marako rejakama'e iji'a Huni ara ka'ene hanaji'iniji vahuna 'iamana.

²⁷ 'Enarena Mosisi oni aneja rene roe poropetia maho'o puni vaji Godoni irijara Hua'e rone 'waramaji maho'o najahana.

²⁸ Puni ara ka'ene pu va'iro va'ajaho usehuna nituranana. 'Ejume Jesuho Hu maihename va'i 'ahaume venana.

²⁹ 'Enakaivo pu ijá 'wava Vea nusirevu'e vea nipa'arenukúne nú pu'úmo hina 'wavara. 'Ejume Hu pu pu'úmo va'e hinana.

³⁰ 'Ejumakame Hu pu pu'úmo ahuma 'iruma'e i'i 'ahaume puretia apene siporua 'one teimani 'wamarena tuama vajihana.

³¹ 'Ejume puni nia ka'ene nuhiajaho jaraume pu Hu kavara kaivo Hu puni rora kajano va'ume pakama arevara.

³² 'Enareja pu hine pira'arame ijá 'wava Hu 'unamutoi 'warume 'ee Godoni ira vaji namuji naju'eju'e núní oja vaja hianuma parajara 'wavara.

³³ 'Enarena pu vea muka kajino 'urine Jerusaremi ea iropu ropu kwinu 'ee 'aho'a ka'ene pu pu'úmo ahuma hijujino 'unama va'e ijá 'iava

³⁴ Natohwijahno nimaa nimaa 'urinana'omo Saimani oni una'i samaahiravume

Noinkamana 'iavara.

³⁵ 'Enarena ea no'ohe'i kajipo iraka ka'ene 'unamutoi vene 'ee pu ichá'ina'e Jesu marako kavajaho pahena pakavara kaivo Hu puretia tua'eme ni'aha kwinu pu Hu kavaji rone

'waravara.

Jesura Huni Tisaiporu Puni Una'i Samahirama-jina

(*Matiu 28:16-20; Maka 16:14-18; Joni 20:19-23; Akisi 1:6-8*)

³⁶ Pu hine ijí 'wara'eme ni'aha kwino Jesuho puni rira kajino naminana.

³⁷ Pu niho'o tea juna'eme ijá roja Pu 'avena kavu rojara.

³⁸ 'Enarena Hu pu ijá 'iama Ja iraka'e vene puruva retio? 'Ee ja ichá vene joni oja vaja ma'uako panimaa rojo?

³⁹ Nuni ija momorakake piuhika kiha! Naranakúne! 'Ene haha 'unirime kiha. Ijihuni maijaho 'avena haha 'ee ata areri Nuna ika'ina pana 'iamana.

⁴⁰ Hu ija'ina 'waramarena Huni ija mumora najahana.

⁴¹ 'Enakaivo pu hina teamanama parajara kaivo pu ma'uako panimaa ronareja hine vvihajara. 'Ejume Jesu aporame ijá 'iama 'Ú ja unenu'u 'aho'a ihuna vi navo 'iamana.

⁴²⁻⁴³ 'Ejume pu kija reji'ina mahume Hu apene puni una'a kajino inana.

⁴⁴ 'Enarena Hu pu ijá 'iama Uneunecha ikehija Na ja pu'úmo hijujino 'waravuta. Uneunecha ka'ene Mosisiho poropetiapo 'ee Samusi vaji Na rona 'waravajara nimaa iviamaa renu 'iamana.

⁴⁵ 'Enarena Hu puni vviha ijija Godi oni iriji hamि he'avarono jaraana.

⁴⁶ 'Ejume Hu pu ijá 'iama Ikaho iraka ka'ene Godoni ira vaji vejajina Keriso sise'i 'ahae

'anae kwamareja na'ia no'opiso pa'are'eje kú'o 'urihuna.

⁴⁷ 'Ene Huni iha 'ahiji Jerusaremi rene va'e eaka mapoka ka'ene kwaaka mapokakino hijujija najahe pu puni sisea vwhane temukave are-mamaa arevakame Godira puni sisea vwhanie arehuna.

⁴⁸ 'Enajihuna'e ja uneunecha mapokakipo rejija ja nihene kivara.

⁴⁹ Heha! Na Nuni Omijara raka ka'ene nahama ja 'waramajaho Nara ranave joni ro'enakúne ja ara natohwa ikino hi'eje Godoni harura kahino akúpa 'ahi rene roe ja sama'amana 'iamana.

Jesura 'Urina Akúpa 'Ahi Va'ajina

(Maka 16:19-20; Akisi 1:9-11)

⁵⁰ 'Enarena Hu aherame ara kajaho are'i kaivo va'e Petani rori hi'eme ija ahasiswa merajihana.

⁵¹ Hu pu hine merajiharena irechamie va'ana.

⁵²⁻⁵³ 'Ejume pu 'uname Jerusaremi niho'o teamanama para'eme mari'uvii'i roareja na'ia mapoka kajaho Temiporu vaji hine majamano Godi teamani 'wama ta'arohi'i hijura.

Godoni Vu'a Maiu'ina

**The New Testament in the Ese Language, also known
as the Managalasi Language, of Papua New Guinea
Nupela Testamen long tokples Mangalasi long Niugini**
copyright © 1975, 1999 Wycliffe Bible Translators, Inc.

Language: Managalasi (Ese or Managalasi)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Apr 2025 from source files
dated 31 Aug 2023

729c2a8f-9ea3-55ca-9318-793c2828d776